

## Aposoro Yeneac Siduc

<sup>1</sup> O Teofiro, ni warac yoac ohogenai, imoc Yesungo hanahema ua meec amma enacyoara kpounemmeec, imocac yoacsiduc seng anggen-darai.

<sup>2</sup> Ye uaya mekengkefu nasoya wegene haec imohai Tiri Asuac kucfu aposoro warac meis-ingyunuec, yeni uaareng dederecge ayemmema kurumennu enec, imocac siducnoc ohodarai.

<sup>3</sup> Yeng kpendzeng kpekecma homema mong-goc gborima yacma uameme 40ac manau yengenaoc fingsufu ayemmema faka hania hania mema Anutuac eucererenggac hania edekpou ayemmeec. Ayemmu yeni faka imoc hemma ye fora kecde, imoc negentegecgec.

<sup>4</sup> Amma yenigoc tacyac amma yoac yofi edeyunuec, “Ngeni Yerusareng bic mi wabisia. Manggacac dedeseriyoac edengunuba negenggec, imoc fora kpeudeac tomai kecbisia.

<sup>5</sup> Imoc yofiac, Yohane ye doku bic nadzicngem-mec nga yoc ine naso mi hereemanu Tiri Asu nadzicngemmeude.”

<sup>6</sup> Ifi deu kpedzucnema tacgec yeneng kpes-imigec, “Kebu, ge naso yomohai Israe ngicngac monggoc kpedzucnununa neni nenang bangec ngictauninagoc amma kecnide me?”

<sup>7</sup> Ifi degec yofi edeyunuec, “Manggac ye kuc minginango yeng wenac me yabungnaso hania hania faiec fede, imoc negentegecgecdeac kuc mi ngemme ngemmea.

<sup>8</sup> Negenggec, Tiri Asungo ngenearu mama kuc ngenmeu ngeni siducedefocna anggecde. Nga ngeni Yerusareng amma Yudaia nga Samaria bangec sasawa yerecgema yoacna dekenggec bangeha bangeha sokodacbeso.”

<sup>9</sup> Yesungo ifi edeyunuma kicngina witiau efaima enec. Emmanu hoengngo kicnginaungoc merucgema meenec.

<sup>10</sup> Meemmanu yeni fimodacma hofocgec ngic yohockang ngakpingira kongac kongacngo mi yenearu fingeacma nambesera i.

<sup>11</sup> Namma yofi edeyunuoc, “Gariraia bangec-funac ngic, ngeni kicngina sawau fimangoc mi nambisia. Anutungo Yesu kurumennu meenu ye wangunuma endac. Amma ngic enu hendau, yennoc kecma siriha ifiangoc habesande.”

<sup>12</sup> Anu aposoro yeni Oriwa tikibumaunac dzigenema mama Yerusarennu enggec, imoc sing wegenac anu sabata nasou sing imoc naric kengha angkecgec.\*

<sup>13</sup> Yerusarennu kemma ama tacyac angkecgec, imohai emma tacgec. Tacgec, yeneac kpac yofi: Petoro nga Yohane amma Yakobo, Anderea nga Firipo amma Toma, Batoromaio nga Mataio amma Yakobo Arifaioac medac, Simong Dzerote nga Yuda Yakoboac medac.

<sup>14</sup> Ngic imoc yenennoc uba mocgu amma nunumu ua tatahoc mekecgec. Ifi anggec Yesuac nonggea Maria nga ngac goa amma Yesuac munafora, yeneng yenigoc yenahafoc kecma nunumu ua momoc mekecgec.

---

\* **1:12:** Imoc 800 mitasac anec.

15 Anu Yesuac arengfora 120 nganoc ifingo kpedzucnema tacmagec Petorongo botucnginau namma yofi edeyunuec.

16 “Negen negensinggoc tosofocna, negenggec, Yudango ngic hesicyunuu kemma Yesu mendanggegec, yeacnoc Tiri Asungo bicngoc Dawidiac enacfu yoc faiu ohoec, imoc fora fingecbeso, imocac ifi anec.

17 Yuda warac nenang arennoc amma kefec, ye nenahafoc Kebuac uamemeac deneccdenemmea.”

18 “Amma ngic yeng faka manganaac dzo mema ua bangec mong bummeec, ihai kemma oruhango kpemeremma kekpeu wosea kpendziru keracbawa madarec.

19 Amma imocac siduc Yerusareng ngicngac sasawa negendacma bangec, imocac kpara Akedama degec, titiha yofi, ‘Bangec sac maecfu.’ ”

20 “Mitiyegecfu yoc yofi oho ohoya fede,  
‘Ye amabangeha kisi fingeru ngic mongngo yeac  
kporuchedzou mi tacbeso.’ *(Mitiyegec  
69:25)*

Amma monggoc yofi,

‘Ngic mongngo yeac ngicenaraac tatac mebeso.’  
*(Mitiyegec 109:8)*

21-22 Imocac amma ngic mong yeac turunga meis-  
inggebesonga. Yohanengo Yesu mitidoku nadz-  
icmiu uaya hanahema mema nenanggoc kengha  
kecma kurumennu enec, naso imohai ngic ne-  
nanggoc kecgec, ngic imoc yeneac botucfunac  
ngic mong isinggeni yeng nenanggoc Yesu home-  
cfunac yarec, imocac siduc nenahafoc debisina.”

<sup>23</sup> Petorongo ifi deu ngic yohockang meficyurugec: Mong kpara Yosefe Basaba dekecgec, yeac kpara mong Yusto, amma ogea Matia.

<sup>24</sup> Meficyuruma yofi dema numugec, “O, Kebu ubaheheng mingina, ge ngic yohockang yoc yerearunac daoc meisinggema edzacnununa henni.

<sup>25</sup> Henni yeng aposoro kpac mema Yudaac tatac mebeso. Yuda ye tataha imoc wama yengena sing monnu kenec.”

<sup>26</sup> Ifi dema numuma meisinggeudeac kpeing kpegec Matia heficgeu aposoro 11 yenearu torokpegec.

## 2

<sup>1</sup> Pentekos tacyacac naso wegenemanu yenahafoc ama mocguu kpedzucnema engensicfu tacgec.\*

<sup>2</sup> Tacmagec kurumennunac udumengtoa mong firang kucgoc kpeande, imocac udumeng isoc ioha yombong fingecma maec. Mama ama tacgec, ihai emma wakeu

<sup>3</sup> yeni siriha yofi henggec: Nedzarang gerecborang isoc fingecma ngicngac orucnginasoc tohoma tackenec.

<sup>4</sup> Anu Tiri Asungo ubanginau kemema wakeec. Wakeu yoc siriha mong mong degec. Asungo minginasoc meficgeyemmu yoc dekenggec.

---

\* **2:1:** Pentekos tacyacac naso imoc Yuda yeneac hombang mong anec. Imocac oho ohoya yomohai fede: Makekeng 23:16; Sese-meme 23:15-16; 34:22; Bangec kisiu 28:26-31; Dedeseri 16:9-12.

<sup>5</sup> Anu yudangic homac bangec noboc nobocnac hahayango Yerusareng taonnu tacgec, yeni Anu-tuac yoac modacma kecgec.

<sup>6</sup> Nga udumengtoa fingeru habu homacngo imoc negemma hama kpedzucnema kerectegec anggec. Imoc yofiac, Tiri Asugoc yeneng ngicngac yeneac yoacnginausing tembus tembus degec negenggec.

<sup>7</sup> Negemma kerectegec amma warecyunuma degec, “Ngc yomoc yoac andae, yeni sasawango gariraiangic.

<sup>8</sup> Nga yeni dafiu nenang yoacninausing yombong tembus tembus degec negendimbe?

<sup>9</sup> Neni yoc patangic nga medengic amma erangngic, me Mesopotamia bangecfunac nga Yudaia bangecfunac amma Kapadokia bangecfunac, neni Ponto bangecfunac nga Asia bangecfunac,

<sup>10</sup> amma monggoc Firingia bangecfunac, neni Pamfria bangecfunac nga Aigita bangecfunac amma Ribia bangecfu Kirene ama tegia tegia, imohacnac amma Roma taongtoaunac hading.

<sup>11</sup> Amma yudangic nga bangec monnunac ngic yudangic yenigoc torokpegec, kretangic amma arabiangic. Nenang ifingoc kecma yoacninasoc Anutu fakatoayaac yoacsiduc degec negendimbe.”

<sup>12</sup> Ifi dema kerectegec amma obohoma dene-geng amma degec, “Faka fingece, imoc wiac sir-ihha mong yombong, imoc mi negentegedimbe.”

<sup>13</sup> Goango ine yeneac deendema amma yofi degec, “Yeni waingdoku homac nedauac ubangina sufude.”

14 Ifi degec Petoro ye tosofora 11 yenigoc namma ubea meyadima yofi edeyunuec, “Yudangicngac amma ngicngac sasawa Yerusarennu kecdae, ni faka yomocac hania dekperagingemmeba negenggec.

15 Ngeni ngic yomoc yenemma yofi negensidae, ‘Waingdoku nema ubangina sufude.’ ifi kpac. Yaguc asoac 9 kirocsac andeac waingdoku mi nedau, kpac.

16 Nga faka yomocacnoc, profete Yoelengo yoac yofi deec,

17 ‘Kebungo yofi dede, “Naso wisickebeso ammanu ni Asuna kpakeba mau ngicngac sasawango medacgecde. Amma naroang medacfocngina yeni profeteyoac degecde nga sebigborifocngina onga henggecde amma yadafocngina gaukpefing henggecde.

18 Amma naso imohainoc ni enac tofoc tofoho ngicngacfocna, yenearu Asuna kpakeba mau yeni profeteyoac degecde.

19 Amma deba wi sawau soi fingerude. Nga emu bangecfu faka bibiagoc siria hania hania fingerude. Naso imohai sac nga gerec amma ho-suctoa fingerude.

20 Kebuac nasotoaac kuc kibikperagiagoc mi fin-gecmanu wenackiwa meremma kundung kpeude nga afokiwa sac isoc anude.

21 Anu Ngicngac yeneng KEBUAC kpac kpacgec Anutungo yeni sasawa kopocsicnginaac ebicfunac mesiyunuu komoc kpegecde.” ’ (*Yoele 2:28-32*)

<sup>22</sup> Israengic, ni edengunuba negenggec, Yesu Nadzaretenc, ye Anutungo meefaima nonggo tacmimanu botucnginau faka kuhagoc nga negensinggegedec faka kuhagoc nga faka mi hengenaa meec. Imoc bic irecireckeaa hania hentegecgec.

<sup>23</sup> Yeacnoc Anutungo bicngoc negenu feec, imocac sing desima ngeneac mariu faiec. Ngeneng ye bangec monnunac ngic, dedeseria kpac kecdae, yeneac mariu faima edeyunugec yeni ye mariponnu kpegec homeec.

<sup>24</sup> Anu homecngo ye naric mi segereec. Imocac Anutungo homecac kpendzennunac megboriu yarec.

<sup>25</sup> Dawidingo yeac enac mema yofi deec,

‘Ni nasosoc kicna KEBUARU fikecduae. Yeng foinaugeng kecdeac wiac mongngo menuu goroc goroc naric mi ambade.

<sup>26</sup> Imocac ubaherenango ubangerec negemma nedzarannango sogaiu sebina ifingoc ruaegoc anude.

<sup>27</sup> Geng ubaongana wana homec amau naric mi kemeude. Ge enac tofoc tofohongicga ongonggena kicsere naric mi henude.

<sup>28</sup> Geng kekecac sing kpounennec. Geac kicfu sogac sogai hafoangoc fede nga foigaugeng ubangerec feengkefude.’

*(Mityegec*

*16:8-11)*

Yoc imoc Dawidingo dekperagiec.

<sup>29</sup> Tosofocna, bangecnina Dawidiac hania dema enacefac yofi edengunuba, ye homeu tonggogec. Anu kicserea feecngo yaguc fede.

<sup>30</sup> Ye profete kefecac yofi negenec, ‘Anutungo yeac bangecyombonga yeneac arenunac medaha mong meisinggema ye ngictautatahau faiu tarudeac deseriec.’ *(Mitiyegec 132:11)*

<sup>31</sup> Imoc kpefing hemma negemma Kristo yacyahaac yofi deec,

‘Anutungo enac tofoc tofohongiha onggonggeu kicsere naric mi henude.’ *(Mitiyegec 16:10)*

<sup>32</sup> Anu Yesu yenoc Anutungo homecfunac midiu yaru neni kicinango fora hendaring.

<sup>33</sup> Ye yacma dzigene enu Anutu marifoiano seseheec. Nga Mamango warac Tiri Asu miudeac deec, ye imoc mema kpakeu maec, imoc yagucnoc hennegeng andae.

<sup>34</sup> Dawidi ye kurumennu mi enec, kpac. Yeng ine yoac yofi deec,

‘KEBUNGO neac Kebuna yofi edeec, “Ge foinaugeng tacmana

<sup>35</sup> ngabafocga hanigaac bageau faiyunuba yeni hanititiga anggecde.” ’ *(Mitiyegec 110:1)*

<sup>36</sup> Imocac amma israengicngac sasawa, ngeni yofi negengyombonggebisia: Ngeni Yesu mariponnu kpegec, ngic imocnoc Anutungo Kebu nga Mesianina fainemmeec kecde.”

<sup>37</sup> Petorongo yoac ifi edeyunuu herengina yaru, yengena nga aposoro arengfora yofi kpesiyemmegec, “Tosofoc, neni dafi anni, ngereeude?”

<sup>38</sup> Ifi degec Petorongo yofi edeyunuec, “Kopoc-sicngina kpac anudeac ngeni tembuc tembuc Yesu Kristoac kpacfu ubangina dzigeneu doku nadzicgec. Ifi anggec Anutungo wosoefahaac Tiri Asuya ngemmeude.



39 Nga dedeseriyoac imoc ngenang nga nambaracfocngina amma hereau kecdae, Kebu Anutuninango kpacngunuma heitaingunuudesoc, ngeni naric megecde.”

40 Petoro ye ifi dema gorongina kpema yoac homac torokpema edeyunuec, “Kebungo ngic mangac manganea yeneac faka imohacnac mesingunuu ngeni komoc kpebisia! Yenigoc manganema kpac ambauac.”

41 Anu wenac ihai ngicngac 3 tauseng yeni Petoroac yoac negensinggema doku nadzicma Yesuac habuu torokpegec.

42 Anu aposoro yeneng siduc gombung kpouyemmegec imoc negenggecdeac yenang singngina meserima kecma ubango dedzege amma uba urecfu yaka nema nunumu ua mekecgec.

43 Nga aposoro yenearu faka kuhagoc nga faka morora hania hania fingectegerecac ngicngac sasawango kerecgec anggec.

44 Anu Yesu negensinggec, yeni uba urecfu wiac sasawangina imoc mekecgec.

45 Amma yeni bangec nga hiefinacngina suegec dzo kirecgeu tosofocngina wiac hofocgecsoc medereyemmegec.

46 Nga ngicngac wenacsoc Anutuac womonnu uba mocgu amma kpedzucnekecgec, yeni uba urecfu amaya amaya yaka nekecma yakangina imoc ubangerecgec mederema emenec angkecgec.

47 Ifi amma Anutu dengerema kecgec ngicngac habutoango yeneng dzidziema ewehihei ayam-gec. Anu Kebungo wenaha wenaha ngicngac

kopocsicfunac mesiyunuu komoc kpegec yengena arennu torokpeyunuec.

### 3

<sup>1</sup> Wenac monnu 3 kiroc marai nunumunaso anu Petoro nga Yohane yeri Anutuac womonnu enoc.

<sup>2</sup> Anu ngic mong hanimangang nonggo heremanaunac ifia fingerec, ye Kebuac womonnu nagu mong kpara Nagukereng, ihai wenaha wenaha tofoho emma faigec takefec. Ye ngicngac womonnu engemmama anggec, yenearu ubangerecac wiacac derecgeudeac ifi anggec.

<sup>3</sup> Ngic imocngo Petoro nga Yohane yeri womonnu embeso ammaec yeremma ifingoc ubangerecac wiacac derecgeyemerec.

<sup>4</sup> Derecgeyemeru yereng ye henserioc. Henserima Petorongo yofi edeec, “Ge nerenna!”

<sup>5</sup> Ifi deu “Yereng wiac mong nembesonga dedape.” ifi negemma kic fima yerenece.

<sup>6</sup> Yeremmanu Petorongo yofi edeec, “Ni hiedzona kpac nga wiac mocgu fenende, imoc ine gamba mena! Yesu Kristo Nadzaretenac, yea kpacfu yacma kenna.”

<sup>7</sup> Ifi dema marifoiau mema miaru imohaingoc hania ubea seriec.

<sup>8</sup> Seriu kucbiric yacma namma yerigoc womonnu enggec. Emma yeng yu engemmama nga sing kengha amma Kebu dengereec.

<sup>9</sup> Kebu dengerema kengha anu ngicngac hafoangoc yeneng hemma degec.

<sup>10</sup> “Yennoc womonggac nagu kpara Nagukereng, ihai hiedzoac derecgeyemmeudeac take-

fec.” Ifi dema hensima kpidohoma dzonong fede fede anggec.

<sup>11</sup> Ngic ye Petoro nga Yohane yerearu kpeketaheu ngicngac homacngo Anutuac womong mana kakasang mong feec, kpara Saromo, imohai yerearu kemma kpedzucnedacma kerecgec anggec.

<sup>12</sup> Ifi anggec Petorongo yenemma ngicngac yofi edeyunuec, “Israe ngicngac, ngeni ngic yomoc hemma kerecgec mi ambisia. Amma ngeni neri mi nerenseribisia. Faka imoc nereac kucac mi fingecdac nga imoc nereng Kebuac kicfu gombunga kecdipeac mi fingecdac.

<sup>13</sup> Imoc kpahac, kisicfocngina Abrahang nga Isaka amma Yakobo, yeneac Anutu yennoc enac tofoc tofohoa Yesu ngickunenggac kuc kibikperagiagoc miec. Ngeni ine ye ngadehema bangec monnunac ngic Anutu mi negemmidae, yenearu faigec. Foracngoc, Piratongo yoara isinggema yungecbesonga desiec. Nga ngeneng ine wagec.

<sup>14</sup> Yenoc ngic kpetiac nga faka dindingac mekecde nga ngeneng ine ye wagec. Amma godzungicngo ngic mong kpeu homeec, ngeni yenoc yungecngemmeudeac serima dema

<sup>15</sup> kekecac enarameme kpegec. Nga Anutungo ye homecfunac megboriu yarec, neni imocac hepuc aning.

<sup>16</sup> Nga neri Yesuac kpac kpacma negensinggedicac ngic yomoc hendae, ye kuc medac. Nga Yesuac kpacfu negen negensinggoc kecdipe, imocac amma ye ngereehomedac. Ngeni sasawango faka imoc hendae.

17 Tosofocna, ngeni nga garengfocngina Yesuac hania mi negemma ifi anggec, imoc yaguc negentegecduae.

18 Foracngoc, Anutungo Messia meisinggeec, yeng kpendzeng kpekecma homeudeac profete sasawa yeneac enacfu yoac faiu degec, imoc sasawa Anutu deecfu finge.cdarec.

19 Imocac ngeni kopocsicngina kpac anudeac ubangina dzigeneu Anutu hoangebisia.

20 Ifi anggecdeu Anutuac hoannunac kenec kuhagoc haude. Amma bicngoc Messia meisinggemmeec, ye suengemmeude, imoc Yesunoc.

21 Ye kurumennu emma kecmanungoc, wiac sasawaac mengec mengere naso hau dzigeneude. Imocac yoac Anutungo bicngoc yombong kpetiac profetefora enacnginau faiu dekperagigec.

22 Mosengo yofi deec,  
‘Kebu Anutunginango ngeneac arenunac profete mong ni isoc, ifia meficgengemmeu yeng yoac sasawa deude, imoc negendacbisia.

23 Anu mongngo profete imocac yoac mi tofohoudeu ye arengnginaunac meickema kpehomebesonga.’ *(Dedeseri 18:15,18-19)*

24 Naso yomohai faka finge.cdac, imoc Samuearunac profete sasawa nangeregec, yeneng bic dekperagigec.

25 Anutungo kisicfocngina yenigoc dzadzahac mema Abrahang yofi edeec,

‘Bangecfocga yeneac arennu ngicngac bangeha bangeha keneheyunudacbade.’ *(Fingec fingec 22:18; 26:4)*

Ngeni dzadzahac imoc nga profete yeneac yoac maridzoming imoc mekecdae.

<sup>26</sup> Ngeneacnoc bic negensima Anutungo medaha sueu mama fingerec, imoc ngeni sasawa kpeng-godzuac sinnunac merengngunudacma kenecngunuudeac ifinoc anec.”

## 4

<sup>1</sup> Petoro nga Yohane yeri ngicngac yoac ifi edeyunuma nammaec womong gareng amma womonggac tebengic enara nga sadukaio yeni yenhafoc yerearu kemma ihai nanggec.

<sup>2</sup> Nga ngic nanggec yereng yoac edekpou ayem-mema Yesu ye enaranina mema homecfunac yarec, imocac yoacsiduc desaheyemmedarec yeni herebu negemma ngaba ayecmegec.

<sup>3</sup> Ifi ayecmema mendangyuruma ama bic marai anecac witicamau faiyurugec tacmaec ama wereckenec.

<sup>4</sup> Anu habutoango Petoro yoac deu negenggec, yeneacunac homacngo imoc negensinggema Yesuac habuu torokpegec. Anu ngicngac imoc kpetengina 5 tauseng anec.

<sup>5</sup> Wereckengau yudangic yeneac tutumang-toaac memba nga enarafocngina amma mitiac negen negengngic, yeni Yerusarennu kpeturanggec.

<sup>6</sup> Kpeturanggema womong garengtoa Hanasi nga Kaifa amma Yohane nga Aresande amma womong gareng enara kecdae, yeneac arengfocngina sasawa yenhafoc kpedzucnema tacgec.

<sup>7</sup> Tacma Petoro nga Yohane meyuru hama kicnginau faiyurugec. Faiyuruma yofi dekpesi

ayecmegec, “Ngeri noc kucfu nga meracac kpacfu faka yomoc medaoc?”

<sup>8</sup> Kpesiyecmegec Petoro ye Tiri Asungo ubeau wakeu yofi edeyunuec, “Enarameme nga Israe garengfocnina deba negenggec.

<sup>9</sup> Ngeni ngic hanimangang ye dafi ngereedac amma yearu faka gombunga dafi fingecmidac, imohaingoc kpesinecmebau.

<sup>10</sup> Ngeni nga israengic sasawa negenggecdeac yoac yofi deireckebea, ngeneng Yesu Kristo Nadzaretenc mariponnu kpegec homeu Anutungo ye homecfunac megboriu yarec kecde. Nga yeac kpacfu ngic imoc ngereema kicnginau nande.

<sup>11</sup> ‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude.’ *(Mitiyegec 118:22)*

<sup>12</sup> Ngic monggaru kpeketahegec yeng kopocsicac ebicfunac naric mi mesiyunuude, komoc kpegecdeac sing mong mi fede, kpac. Bangeha bangeha nenang Yesuac kpacfu kecni yeng kopocsicac ebicfunac mesinunuu komoc kpenide.”

<sup>13</sup> Anu Petoro nga Yohane yeri kibiamaya yadau mong mi tarocngo kengeha kpac enacefacngoc yoac deocac yeni imoc negemma kerectegec anggec. Amma yeri Yesugoc kefoc, imoc yerensigec.

<sup>14</sup> Anu ngic sebia ngereec, yeng yerigoc nanu henggecac yoac merengyecmegecdeac obohogec.

<sup>15</sup> Obohoma tutumangtoanac ayecmegec sobennu mama nammaec yenaocngoc yoac yofi dema denegeng anggec.

16 “Nenang ngic yohockang dafi ayecmenideac obohode. Yeri negensingegecdeac faka kuhagoc yombong meec fingectegeru Yerusarennac ngicngac yeneng siduha bic negendacdau, imocac basic naric mi kpenide.

17 Nga yoac imoc amasoc kenu negendacbauac yeri Yesuac kpacfu yoac monggoc mi edekpou ayemmeecdeac dekengec ayecmeni.”

18 Ifi dema kpacyuruma yofi edeyurugec, “Ngeri Yesuac kpac ngic monggoc edekpou mi ayem-mebesera.”

19-20 Ifi degec Petoro nga Yohane yereng yoac yofi merengyemmeoc, “Wiac kicinango hening amma kedzacninango negening, imoc basic naric mi kpenide. Ngeni ngenaoc negenghenggec, ngeneac yoac me Anutuac yoac tofohobesonga. Damocngo Anutuac kicfu ngereede?”

21 Ifi deec yeni dekengec yoac monggoc ayecmema eng faiyurugec kenoc. Imoc yofiac, faka fingerecac ngicngac sasawa Anutu dengeregec. Imocac aposoro dafi ayemmebeso, imocac obohogec.

22 Nga ngic faka kuhagoc sebiau fingeru ngereec, ye ngicyada kifaya 40 feraheecac yeni aposoro eng wayurugec.

23 Wayurugec Petoro nga Yohane yeri arengfocngira yenearu dzigenema kenoc. Kemma womong gareng enara amma garengfocngina yoac edeyurugec, imocac yoacsiduc edeyunudarec negenggec.

24 Negemma yeni uba mocgu amma Anutu kpacma dengerema yofi degec, “Kuctoa mingina

Anutu, ge kurumeng nga bangec amma kondung nga imocac iwai hania hania meficyununec.

<sup>25</sup> Geng bicngoc Tiri Asu edena yeng kiscinina amma enac tofoc tofohoga Dawidi, yeac enara meefaina yeng yoac yofi deec,

‘Foracngoc bangeha bangeha ngicngac areng, yeni faka mangana anggecdeac yoac dedzege andae nga ngiha ngiha yeni negen negeng ua mema kpedzongemeandae, imoc mi ngereede.

<sup>26</sup> Bangecac ngictau yeni efaigec ngic enara uayoacnginagoc, yeni kpeturanggema KEBU memadae. Nga yeng ngic meisinggema kerecdokungo nadzicmiec, ye ifingoc memagecdeac yoac dedae.’ *(Mitiyegec 2:1-2)*

<sup>27</sup> Geac enac tofoc tofohoga kpetiac, imoc Yesu Kristo nga geng ye kerecdokungo nadzicminec. Nga taong yomohainoc Herode nga Pontio Pirato, yereng bangec monnunac ngic Anutu mi negemidae, yeneng israe ngicngac yenigoc kpeturanggema ye keracmangang ammigec.

<sup>28</sup> Amma waracngoc geangga kucfu nga enacgango denecac sirihau ifi ammidacgec.

<sup>29</sup> O Kebu, yomoc ine dekengec yoacngina henegeng amma enac tofoc tofohofocga kuc mefinunuma nanggenununa yoacga kengeha kpac dekperagiyemmebisina.

<sup>30</sup> Demina mariga sinena sebiu ngerec ngeree nga negensinggegecdeac faka kuhagoc nga faka mi hehena kpetiac enac tofoc tofohoga Yesu, yeac kpacfu fingeckembeso.”

<sup>31</sup> Ifi numugec wisickemanu amabangec



kpedzucnema tacgec, imoc kpididieu Tiri Asungo ubanginau wakeu Anutuac yoac kengeha kpac ngic enacefac deireckeyemmegec.

<sup>32</sup> Yesu negensinggec, habu imoc yeni uba mocgu amma wiac feyemmeec, imocac neac geac mi dema urecngina mekecgec.

<sup>33</sup> Aposoro yeneng Kebu Yesu homecfunac yarec, siduc imocac hepuc amma kuhagoc dekperagigec. Nga danggunuctoayango sokoyunudacma feec.

<sup>34</sup> Yeneac botucnginau mongngo wiac monggac mi obohoec, kpac. Ngicngac sasawa amabangecnginagoc kecgec, yeni amabangecngina imoc desigec hiedzo kirecgeu

<sup>35</sup> Aposoro yenearu faigec. Faigec, yeneng ngic yeni iwaiac obohogecsoc medereyemmekecgec.

<sup>36</sup> Anu ngic mong kefec kpara Yosefe, aposoro yeneng kpara mong Banaba degec, imocac titiha yofi: Demeseri medac. Ye Rewiac arenunac Kipiro nucfu fingerec.

<sup>37</sup> Ngic yeng bangeha mong desiu hiedzo kirecgeu aposoro yenearu mekemma faidarec.

## 5

<sup>1</sup> Anu ngic mong kefec kpara Anania, ye enema Safiragoc bangecngira noboha mong desiec dzo kirecgeec.

<sup>2</sup> Kirecgeu dzo tosea meickema faiu tarudeac enema edeu negentegeru uba mocgu anoc. Amma toseasac aposoro yenearu mekemma faiec.

<sup>3</sup> Faiu Petorongo yofi edeec, “Anania negenna, Satangngo ubagau kemeu geng Tiri Asu ikoc am-mima bangecga nobohaac bung tosea herandzina fede.

<sup>4</sup> Amabangecga noboha fegembeso dema fegembac me desina dzo kirecgeu imocngo ‘ifi me ifi amba’ dema ambang. Ge ubagango tobangguu ifi andang, imoc naric mi ande. Negen nec, ge ikoc annec, imoc ngic neni mi anemmenec, kpac. Ge Anutunoc ikoc ammidang.”

<sup>5</sup> Ifi deu Anania ye yoac imoc negemma imo-haingoc todingge makpeu asu heifeec, imoc kpac anu homeec. Anu yeni sasawango faka fingerec, imocac siduha negemma damuyunuu kengectoa anggec.

<sup>6</sup> Nga ngicmedac yeneng yacma farenga bi-ranggema tofoho kemma tonggogec.

<sup>7</sup> Tonggomagec aua harebec wisickeu enema ye ewearu faka fingerec, imoc mi negemma haec.

<sup>8</sup> Hau Petorongo yofi kpesimiec, “Bangec nobo-hango dzo kirecgedac, imocsac me?” kpesimiu yeng deec, “Oc, imocsacnoc.”

<sup>9</sup> Ifi deu Petorongo yofi edeec, “foracngoc, ngeri Kebuac Asu tobanggeecdeac denegeng amma uba mocgu andaoc. Negen nec, ewega tonggoma hadau, yeni nagu ngadeau nandae, mi heree-manu ge ifingoc tofogu kemma tonggogugecde.”

<sup>10</sup> Ifi edemanu ye imohaingoc haniau todingge makpeu asuya ereu homeec. Homeu ngicmedac yeni ama manau emma ye bic homeec, ifi hemma farenga tofoho kemma ewea fec, imocac tegiau tonggogec.

11 Anu kpebung sasawa amma ngicngac sasawa yeneng siducngira negemma damuyunuu kengectoa anggec.

12 Aposoro yeneng negensinggegecdeac faka kuhagoc nga faka mi hehena, imoc homac ngicngac yenearu megec. Nga Yesuac habu sasawa yeni Anutuac womong mana mong katapa mi kpekpea feec, kpara Saromo, ihai uba mocgu amma kpeturanggema kecgec.\*

13 Kpeturanggegec ngicngac yeneng kengec amma yenearu mi torokpegec. Amma yeni sifu eweheihei ayemmema kecgec.

14 Ifi anggecac ngicngac homac yeni Kebu negensinggema yenearu kentorokpe anggec Yesuac habu yadieci.

15 Aposoro yeni faka kuhagoc megec henggecac amma yeni hafeigoc fefe nga dzakegoc sinnu yofi dema faiyunugec, “Petorongong kengha anu sifunec ongeango kpahacyunuu hafeingina kpac ambeso.”

16 Amma Yerusareng taong yerec yerec amabangec hereau tackende, imohacnac ngicngac homac hafeinginagoc amma asu seuhagocngo memanganeyunugec, yeni hesicyunu kenggec ngereedacgec.

17 Faka ifia fingeru womong garengtoa nga arengfora sadukaio ngichabu, yeneng keracmanggang angkecma

18 aposoro mendangyunuma witicamau faiyunugec.

---

\* 5:12: Imocac onga hafac 615nu nga 617nu fede.

19 Faiyunugec tofocnac imohai Kebuac angero mongngo nagu meyemmema hesicyunuu mama yofi edeyunuec.

20 “Ngeni Anutuac womonnu emma namma kekec gboriaac hania ngicngac sasawa edeyunudadacbisia.”

21 Ifi edeyunuu negemma ama werec wereck-  
enggcac womonnu emma ngicngac edekpou ayem-  
megec.

Naso imohai womong garengtoango arengforagoc yudangic yeneac tutumangtoa, imocac memba nga israe ngicngac yeneac enaratoa kpacyunuu hadacma kpeturanggegec. Kpeturanggema aposoro meyunu hagecdeac witicamau yoac faigec kenec.

22 Kenu keracnatang yeni kensikema witicamau hofocyunuma dzigene hama degec,

23 “Neni kensikema nagu kia seria yombong memea henni gareng yeni nagu nandau. Anu nagu witima emma ngic hofocyunuma ine ngic mong mi hending.”

24 Yoac imoc degec womonggcac tebengic enara nga womong gareng enara, yeneng faka fingec-  
dac, imocac obohogec.

25 Ifi ammagec ngic mongngo hama deec, “Nengendae, ngic witicamau faiyunudau, yeni womonnu ngicngac kpouyemmema nandae.”

26 Ifi deu tebengic kunengngina yeng keracnatang meyunuu kenggec. Nga ngic yeneng hocngo yenerebauac kengecyunuu aposoro yumeau hesicyunu hagec.

<sup>27</sup> Nga yudangic yeneac gamang, imocac memba, tutumannu faiyunuget nammagec womong garengtoango yoac yofi kpesiyemmeec.

<sup>28</sup> “Ngeni ngic yeac kpacsiduha ngicngac edekpou mi ayemmegecdeac dederac angemmeing. Nga ngeni ine yoac imoc edekpou ayemmema Yerusarennu monggoc desahadae. Amma ngic imoc yeac sawaac kopocsic, imoc neneac witiu faibeso dedae.”

<sup>29</sup> Ifi degec Petoro nga aposoro goa yeneng yoac yofi merengyemmegec, “Anutuac yoac wama ngicyoac tofoc tofoho, imoc naric mi ambesonga.

<sup>30</sup> Ngeni Yesu maringinango mariponnu kpema kpehomegec kisicfocninaac Anutungo ye homec-funac megboriu yarec.

<sup>31</sup> Yaru Anutungo meemma enaramemetoanina nga memengerecna amma kasonina gununggeu foiau nande. Nga isaengic ngeni ubangina dzigeneu kopocsicngina kpac anudeac ifi anec.

<sup>32</sup> Anutungo Tiri Asu enac tofoc tofohofora yemmeande. Nga Tiri Asu nga neni Yesuac siduc imoc nenahafoc dekperagidimbe.”

<sup>33</sup> Yoac ifi edeyunuu wosongina meu aposoro yunuhomegecdeac degec.

<sup>34</sup> Ifi degec tutumangnginau farisaiongic mongtarec, kpara Gamarie, ye mitiac negen negengngic nga ngicngac yeneng yeac ewea heikecgec. Yeng deec, “Ngeni ngic yomoc ama sobennu meyunu kemema nammagec.”

<sup>35</sup> Ifi deu meyunu kemegec enarameme arengfora yofi edeyunuec, “Israengic, ngeni ngic yomoc haniangina negentegecma faka ayemmebisia.

<sup>36</sup> Warac naso mong ngic mong kpara Teuda yengenaoc fingeema deec, 'Ni ngickunengngina.' ifi deu ngic 400 isoc yearu kpeketahegec. Nga ye yengena dzikac kima homeu arengfora ticpac tehegec uangina kpac anec.

<sup>37</sup> Ye kpac anu takesiac amma kpac oso oso nga oho oho naso megec, naso imohai Gariraia bangecfunac ngic mong kpara Yuda, ye ngic goa herengina miaru yeni ye modacegec. Yuda yengena ifingoc kpegec kpac anu arengfora ticpac tehedacegec.

<sup>38</sup> Imocac amma yofi edengunuba negenggec, ngeni ngic yomoc wayunugec kenggec. Yeni uaareng yomoc ngic negen negennu medaeu imoc bic kpac andarude.

<sup>39</sup> Nga Anutungo nonggo tacmanu medaeu ngeni mi kpetariyemmegecdeacsoc anggecde. Kecma Anutu ngaba ammibauac."

<sup>40</sup> Ifi edeyunuu ireckema aposoro kpacyunugec hagec dzikacngo yunugecdeac edeyunugec. Yunugec wisickeu yeni yoac monggoc Yesuac kpacfu mi dekperagigecdeac deracyunuma sueyunugec.

<sup>41</sup> Sueyunugec, yeni naric Yesu kparaac amma gamekpekpe ayemmegec, imocac ubangerecfu tutumannunac mama kenggec.

<sup>42</sup> Amma yeni wenaha wenaha Anutuac womonnu nga amaya amaya, imohai Yesu ye Messia imocac siduc gombung edekpou ayemmema ua imoc mi wagec.

## 6

<sup>1</sup> Naso imohai Yesuac habu sokoma kenec.

Sokoma kenu nenesemeng wenacsoc mendzi-cyemmekecma yudangic grikyoac dekecgec, yeneac hodzec medadangyunugec. Ifi anggec, yeni yudangic ama mingina kecgec, yeneac ubakpekpe anggec

<sup>2</sup> aposoro 12 yeneng Yesuac habu kpacyunudacma yofi edeyunugec, “Neni yaka hendzic hendzic ua imoc nanggema Anutuac yoac dede, imocac ua wadacni mau naric mi ngereeude.

<sup>3</sup> Negen negensinggoc tosofocna, ngeni imocac amma ngic 7 ngenang botucfunac meis- ingyunubisia. Ngic Asungo ubangina wakeu negen negeng nga fakangina gombunga yenengkec- dae, ngic fakangina ifia meis ingyunubisia. Nga neneng ua imoc yemmeni mebisia.

<sup>4</sup> Nenaoc ine ua imoc wama nunumu nga Anu- tuac enacdede ua mekecbisina.”

<sup>5</sup> Yoac ifi degec habutoa yeneng negenggec ngereec. Anu ngic yofiguc meis ingyunugec: Ste- fano, ye negen negensingtoayagoc amma Tiri Asu wake wakea femiec, amma Firipo nga Porokoro amma Nikano, Timong nga Pamena amma Niko- rao. Nikorao ye Antiokianac nga ye bangec monnunac ngicngo warac Anutu mi negemmima kecma yudangic yenearu torokpeec.

<sup>6</sup> Yeni ngic imoc aposoro yeneac hoannu faiyunugec nanggec aposoro yeneng maringina sebinginau faima yeneac amma numugec.

<sup>7</sup> Anu Anutuac yoacngo Yerusarennu yadima sokoma kenu Yesuac habu yenearu nasoya na- soya torokpeu torokpe fingeckenec. Fingeckenu

Anutuac womong gareng, yenearunac homacngo siduc gombang negensingema modacgec.

<sup>8</sup> Stefano ye Anutuac danggunuc nga kuc homac femiec. Imocac amma yeng ngicngac botucnginau kecma Kebu negensinggegedeac faka kuhagoc nga faka mi hehena homac meec.

<sup>9</sup> Anu yudangic yeneac kpekpeturang amangina mong kpara Feackekek\* degec, yenearunac ngic goango yacma Stefanogoc yoacngina engemama anec. Ngic imoc yeni Kirene nga Are sandria amaunac amma Kirikia nga Asia bangectoanac.

<sup>10</sup> Nga Stefano ye Tiri Asuac kucfu yoac negentegecma deu yeni yoac turunga merembesonga osigec.

<sup>11</sup> Osima ngic goa fenggeyunugec, yeneng Stefanoc yofi degec, “Ngcic ye Mose nga Anutu demanganeyuruu negening.”

<sup>12</sup> Ifi degec ngicngac habutoa amma yudangic enarafocngina nga mitiac negen negengngic, yeneac wosongina miacgec. Miacgec yeni Stefano mema mendanggema yudangic yeneac tutumangtoau mekemma

<sup>13</sup> ihai ngic ikoha faiyunugec yeneng hepuc amma yofi degec, “Ngcic imoc ye nenanggac ama kpetiac nga dedeseriyoacnina wisic wisickea kpac tatahoc demanganeande.”

<sup>14</sup> Yeng yoac yofi deu negening, “Yesu Nadzaretenc, yennoc ama yomoc iriringgema

---

\* **6:9:** Kpekpeturang ama imocac memba yeni warac ebicfu kecgec. Yeni ngickuneng mocgu mocgu yeneac wanac kecgec. Kecma yenaocngoc hiedzo kpeturanggema bummeemema ngic imoc wayunugec.



singyoac Mosengo deficgenemmeec, imoc wama yoac gboria heficgenemmeande.”

<sup>15</sup> Nga yudangic sasawa tutumangtoanginau tacgec, yeneng Stefano henserima henggec kicmesuyango angero yeneac siric isoc anec.

## 7

<sup>1</sup> Womong garengtoango Stefano kpesimiec, “Yoac dedae, imoc fora me?”

<sup>2</sup> Ifi deu Stefanongo yofi deec, “Mangfocna nga sactosofocna, yoac deba negenggec: Kisicnina Abrahang ye Harang taonnu mi kemma Mesopotamia bangecfu kecmanu Anutu kuc nga kibikperagi mingina, yennoc fingecmima yofi edeec,

<sup>3</sup> ‘Ge amabangecga nga arengfocga wayunuma neng bangec mong edzacubade, ihai kemma kecbesena.’ *(Fingec fingec 12:1)*

<sup>4</sup> Anu ye yoac ifi negemma Kardea bangec wama Harang taonnu kemma kefec. Ihai kecmanu mama homeec. Homeu Anutungo bangec ngeni yofinenggac kecdae, Abrahang imohai sueu haec.

<sup>5</sup> Hesicke hama bangec mong mi wamiu tiuenec, imoc kpac yombong. Ye nga bangecfora dengec tigecec enudeac areng kpeyemmeec, imoc nambaraha kpac kecmanu edeec.\*

<sup>6</sup> Amma Anutungo yoac mong yofi deec, ‘Esangaboga nga bangecfocga yeni kifa 400 ngic mong yeneac bangecfu kuric kecma enac tofoc tofoho ua mema sisic witiau kecbesandae.’

<sup>7</sup> Amma yoac mong yofi torokpeec,

---

\* 7:5: *Fingec fingec 17:8; 48:4*

'Enactofoc tofohofocngina meyunugecde,  
 ngic imoc yeni turunga yemmede  
 nga nambaracfocga faiyunugec bangec  
 yomohai dzigene hama enac tofoc tofoho  
 anemma kecbesandae.' (*Fingec fingec*  
*15:13-14*)

<sup>8</sup> Anutungo Abrahang dzadzahac mima sebi  
 tosangina herecgegecdeac† Anutungo Abrahang  
 edeec. Ifi edeecac medaha Isaka kpeficgeu  
 fingecma uameme 8 femanu medahaac sebi tosea  
 herecgeec. Anu Isakango Yakobo kpeficgeec nga  
 Yakobongo kisicfocnina 12 kpeficyunuec.

<sup>9</sup> Kisicfocnina yeni munangina Yosefe kerac-  
 mangang ammima Aigita bangecfu faigec ngic  
 goa yeneng bummema mekenggec. Ihai kecmanu  
 Anutungo yegoc kefecac amma

<sup>10</sup> kpendzennunac meickema ubangerecgoc  
 kekec hefigemiec. Yeng Yosefe wosoefac  
 ammima negen negentegec miu Aigita ngictau  
 Faraongo negen negenga imoc hengngereema  
 yengena amagerec nga aigitangicfora momoc  
 garengyunuma kefudeac ngickuneng faiec.

<sup>11</sup> Faiu kecmanu Aigita nga Kanaang bangecfu  
 bodi fingeru ebic kuneng meficgegec. Ifi fin-  
 geru kisicfocnina yeni nenesemenggac homema  
 kecgec.

<sup>12</sup> Kecmagec 'Aigita bangecfu semeng fede' ifi  
 degec negemma Yakobongo medacfora sueyunuu  
 ihai kenggec.

<sup>13</sup> Kecma naso monnu monggoc kenggec

---

† **7:8:** Sebi tosea, imoc ngicmedac fusacnginaac dumbengaac  
 sebera fede, imoc herecgeandae.

Yosefengo dacfora haniaya dekperagiyemmeec. Dekperagiyemmeu Faraongo Yosefe yengena nga arengfora haniangina negentegerec.

<sup>14</sup> Ifi anu Yosefengo dacfora edeyunuu kemma mangngina Yakobo nga arengfocngina sasawa bic kpacyunugec hagec. Nga ngicngac hagec, yeneac kpetengina 75 anec.

<sup>15</sup> Nga Yakobo ye Aigita bangecfu kemma kecma homeec nga medacfora kisicfocnina yeni ifingoc ihaingoc homedacgec.

<sup>16</sup> Homegec farengngina Sikeng amau meyunu hagec. Hama Abrahango Sikeng amau Hamoro medacfora yeneacunac bangec mong kicsereac amma siriwa dzo dafigucngo bummeec, imohai tonggoyunugec.”

<sup>17</sup> “Anutungo wiac Abrahang miudeac bicngoc deseriec, imoc fora fingerudeac naso wegemanu Yakobo esangabofora nga bangecfora yeni Aigita bangecfu homac fingeceahe anggec.

<sup>18</sup> Ifi amma kecmagec Aigita ngictau gboria mong fingerec, yeng Yosefeac hania mi negenec. *(Makekeng 1:8)*

<sup>19</sup> Anu ngictau yennoc kisicfocnina meenti memati ayemmema memanganeyunudarec. Amma yeng yofi edeyunuec, ‘Ngeni sabacfocngina wayunugec homedacbisia.’ ”

<sup>20</sup> “Mose ye naso imohai fingeru Anutungo sabac gombunga imoc henu ngereec. Nga ye mamaac amau afo harebec kefu garenggegec.

<sup>21</sup> Ifi amma mekemma ama ngadeau tihereema faigec feec. Femanu Farao naroangango meficgema yengena medac isoc mema mekefu

yadiec.

<sup>22</sup> Yadiu Farao ngicfora yeneng aigitangic yeneac faka nga negen negeng kpoumigec negentegecma kecma wiac deme anu kuhagoc anec.”

<sup>23</sup> “Kecma kifaya 40 anu ye israengic ogofora yenennegeng anudeac ubea efaiu kenec.

<sup>24</sup> Kemma aigitangic mongngo israengic mong eng kpeu hemma ogea meficgema turunga meremma aigitangic homemea kpeec.

<sup>25</sup> Kpema yofi negenec, ‘Ni arengfocna Faraoc mariunac mesiyunubadeac dema Anutungo ua nende, imoc negentegecdae gedang.’ Ye ifi negenec anu israe ngicngac yeneng imoc ine mi negentegecgec.

<sup>26</sup> Anu wereckengau monggoc kemma israengic yohockang eng eweec meficyuruma demefac ayecmema yofi edeyuruec, ‘Ngihoc waec, ngeri areng mocgungo ewedape, imoc naric kpac.’ ”

<sup>27</sup> “Ifi deu ngic ogea kpeecngo Mose kpefahama yofi deec, ‘Mongngo mi nereac desidesingic me gareng faigued.

<sup>28</sup> Ge worang aigitangic kpehomedang, ifi isoc ni gedang ifingoc nubeso annec.’ (*Makekeng 2:14*)

<sup>29</sup> Ifi deu Mosengo yoc imoc negemma imohaingoc worama Midiang bangecfu kemma kuric kefec. Ihai kecma ngac mema medac yohockang kpeficyuruec.”

<sup>30</sup> “Anu kifa 40 monggoc kecma Sinai tikiugeng bangec hocsiragocfu kemma kecmanu angero mongngo icbarama susiau gerechorang manau fingeru henec.

<sup>31</sup> Hemma kpidohoma hentegerudeac kenu Ke-  
buac yoac yofi fingerec,

<sup>32</sup> ‘Ni kisicfocga yeneac Anutu, Abrahang nga  
Isaka amma Yakobo, yeneac Anutunoc.’ Fingeru  
Mose ye dzonong fede fede amma kengec kpeu  
kiwa sufuma ngonducnema nanec.

<sup>33</sup> Nammanu Kebungo yofi edeec, ‘Bangec nan-  
nec, imoc bangec kpetiac, imocac hanitabega  
hesina.

<sup>34</sup> Ni ngicfocna Aigita bangecfu sisicyunugec  
kiacudumeng anggec ereu yenenduae. Amma  
mesiyunubadeac yaguc maduae. Imocac Aigita  
bangecfu sueguba bic kembesena.’ ” *(Makekeng  
3:2-10)*

<sup>35</sup> “Ngic yeneng Moseac yoac wama yofi degec,  
‘Mongngo ge neneac desidesingic me gareng mi  
faiguec, kpac’ *(Makekeng 2:14)*

Anutungo ngic yenoc israengic yeneac  
enarameme nga mesi mesingicngina anudeac  
dema angero sueu gerecborang manau  
fingecmima ua imoc demiec.

<sup>36</sup> Ifi amma Anutungo Mose sueu kemma hesi-  
cyunu haec. Ye Aigita bangecfu nga Kondung  
sacsacfu nga bangec kisiu faka mi hehena nga  
negensinggegecdeac faka kuhagoc homac mema  
kecmanu kifa 40 anec.”

<sup>37</sup> “Amma Mose yennoc israengic yofi  
edeyunuec,

‘Anutungo arengfocngina yeneac botucfunac  
profete mong ni isoc meficgengemmeude.’  
*(Dedeseri 18:15)*

<sup>38</sup> Amma yengngoc bangec hocsiragocfu kisicfoc-  
nina yeneac kpebungoc kpeturangema kecma

Sinai tikiu emma angeroac enacfunac yoac kekehagoc negemma mama edenunuec.”

<sup>39</sup> “Kisicfocnina yeni yengena wama yoara membaickema Aigita bangecfu dzigenegecdeac ubangina suema

<sup>40</sup> Arong yofi edegec, ‘Ge nemuonga mong menemmena nemu imocngo warainemmebeso. Mosengo Aigita bangecfunac hesicnunu haec, ye gedang bic sufuma kpac anec.’ (*Makekeng 32:1*)

<sup>41</sup> Ifi dema naso imohai nemuonga burumaka medaha siric isoc mema hosuc heimigec. Yeni maringinango onga mema imoc deafehe ammima hoanggegc.

<sup>42</sup> Ifi anggec Anutungo ngadeyunuma sawau onga hadehade afeheyunugecdeac wayemmec. Profete yeneac kibi u yoac imocac yofi bic oho ohoya fede,

‘Israe mingina, ngeni kifa 40 bangec hocsiragocfu kecma yang hosuc heima me sesegerec goa mong mi ohonenggec, kpac.

<sup>43</sup> Ngeni nemu Morokoac kporucedzo tofohokegcgc nga nemu Refang, yeac asomeng onga mekegcgc. Wiac imocnoc numumigecdeac memengere anggecac amma ni Babirong bangec hereau faingunubade.’ ” (*Amosi 5:25-27*)

<sup>44</sup> “Kisicfocnina yeni bangec hocsiragoc, ihai Anutuac kporucedzo megcgc, imoc Anutungo Mose sirih a edzahema derecgemiec, imocac sirihau memea.

<sup>45</sup> Bedzo imocnoc kisicfocnina Yosuang o enara meyemmeu yei bangecareng goa yeneac bangecfu mehama tadcgcgc. Tacmagec Anutungo bangecareng kegcgc moc, yeni

yunukporac ayemmeu kisicfocnina yeni bangec tigeç enu Anutuac kporucedzo imohaingoc torokpeu torokpe mekengkecmagec Dawidi fingerec.”

<sup>46</sup> “Anutungo Dawidi wosoefac ammiu yeng Yakoboac Anutu, yeac amawomong mong meficgeudeac numumiec.

<sup>47</sup> Foracngoc, imoc yengenaoc kpac, Saromongo Anutuac womong memiec.

<sup>48</sup> Engenatoa yeng ine ngic yeneng womong mong maringo memea, ihai tacyac mi angande. Profete mongngo enacyoac yofinoc deec,

<sup>49</sup> ‘Ngictau tatacna imoc kurumeng nga bangec imocngo titiserina, Kebungo ifi dede. Ngeneng amatatacna mong menenggec imoc ine mi ngereeude amma fefe monggac manau tacnegembade, imoc obohoude.

<sup>50</sup> Foracngoc, ni marinango wiac sasawa meficgedarai.’ ” *(Yesaia 66:1-2)*

<sup>51</sup> “Ngicngac gori goria, ngeni ubakedzacngina fonggo fonggoya, kisicfocngina yeni Tiri Asu deendema ammikecgec, ngeni ifingoc ifi andae.

<sup>52</sup> Kisicfocngina yeni profete sasawa yunukporac ayemmegec. Profete yeneng dindingac mingina fingerudeac kpefingyoac degec nga ngenec kisicfocngina yenennoc yenhafoc profete imoc yunugec. Kecma Ngic Dindingac yengena fingeru ngenennoc doc mema ye kpehomegec.

<sup>53</sup> Ngeni angeroac enacfunac dedeseriyoac megec nga imoc ine sifu wagec.”

<sup>54</sup> Stefanongo yoac ifi edeyunuu negemma wosonginau meu yeni herebu kuneng negemma

yearubigeng fima enacngina kisaranggema nangengngina manganeeec.

<sup>55</sup> Stefano ye ine Tiri Asungo ubeau wakeu kurumennu fiu enu Anutuac kuc kibikperagiau Yesu Anutu foiau nanu hemma deec,

<sup>56</sup> “Negendae, ni kurumeng anggeu Ngicac Medacngo Anutu foiau nanu henduae.”

<sup>57</sup> Ifi deu yeni sasawango kpeborongtoa kpema kedzacngina kpefonggema yearu ururunggema kpefahe kpefahe kemma

<sup>58</sup> taong ngadeau kensikema hocngo ukuma heigec. Ifi amma hepucngic yeni ngakpingina herea hesima ngicmedac mong kpara Sauro, yeac haniu guruhegec.

<sup>59</sup> Guruhema Stefano hocngo heigec yeng yofi dema numuec, “O Kebu Yesu, ge ubaongana mena.”

<sup>60</sup> ifi dema fafoc heima arohoma kpacma deec, “Kebu ge kopocsicngina yomoc wayemmena.” ifi dema homeec. Homeu Saurongo faka imocac negenu ngereec.

## 8

<sup>1</sup> So, naso imohaingoc Yerusarennu kpebung kecgec, yeni hanahema yunukporac ayemmegec. Ayemmegec ticpac tehema Yudaia nga Samaria bangectoau kendacgec aposoro yeneng ine tacgec.

<sup>2</sup> Amma ngic goa Kebu eweheimima kecgec, yeneng Stefano mema kiacsonggongtoa yombong ammima tonggogec.



<sup>3</sup> Anu Sauro ye kpebung yunukporac ayam-meudeac amaya amaya emma ngicngac metai ayemmema witicamau faiyunuec.

<sup>4</sup> Yesuac habu yeni ticpac tehema kenggecngo ine guruamasoc kecma ngicngac Anutuac enacyoac dekperagiyemmekecgec.

<sup>5</sup> Ifi ammagec Firipongo samariangic yeneac taonnu sikema Kristoac yoacsiduc dekperagiyemmec.

<sup>6</sup> Dekperagiyemmema negensinggegecdeac faka kuhagoc meu hemma kedzac kpema yoara yenahafoc negenggec.

<sup>7</sup> Imoc yofiac, ye asu seuhagoc homac kisangyunuu ngic hereunac erema arohoma woragec. Amma ye puring hania hania homac mengereyunuec.

<sup>8</sup> Ifi anu taong imohai ngicngac yeni ubangerec kuneng negenggec.

<sup>9</sup> Anu taong imohai ngic mong kefec kpara Simong, ye bangecac hadehadegoc ua mekefu samariangichabu yeneng henggec bibiagoc anec. Ye yengenaac negenu engena anec.

<sup>10</sup> Anu engena mamea yeni yenahafoc yeac negenggec engena anu eweheimima yofi dema kecgec, "Anutuac kuc kunengngo yearu fede."

<sup>11</sup> Ye boru mema kerec ayemmeu kpidohoma yearu kpeketahema nasoherec kecgec.

<sup>12</sup> Anu Firipongo Anutuac eucererenggac siduc nga Yesu Kristoac hania deireckeyemmeu ngicngac yenahafoc negensinggema mitidoku nadzicgec.

<sup>13</sup> Ifi anggec Simongngo ifingoc Yesu negensinggema doku nadzicma Firipoac hoannu kefec.

Firipongo faka kuhagoc nga faka mi hehena meu Simong ye imoc hemma kpidohoma negen negeng ua homac meec.

<sup>14</sup> Samariangicngac yeni Anutuac yoac negenguba anggec, imocac siduc Yerusarennu aposoro yenearu kenu negenggec. Negemma Petoro nga Yohane sueyurugec kenoc.

<sup>15</sup> Ihai kemema yeni Tiri Asugoc anggecdeac Kebu numumioc.

<sup>16</sup> Tiri Asungo warac yenearu mong mi mananu yeni Kebu Yesuac kpacfusac mitidoku nadzicgec.

<sup>17</sup> So, aposoro yeri maringirango sebinginau faiec yeni Tiri Asugoc anggec.

<sup>18</sup> Aposoro yeri ngic yeneac sebiu maringira faiec Tiri Asugoc anggec, Simongngo imoc hemma dzo yerearu mehama

<sup>19</sup> yofi edeyuruec, “Ngeri uayoac nga kuc imoc ni ifingoc nenec neng ifingoc ngicsebinginau marina faiba Tiri Asugoc ambisia.”

<sup>20</sup> Ifi deu Petorongo yofi edeec, “Anutuac wosoefac imoc hiedzongo bummebeso negennecac hiedzogagoc ngerahafoc hofeu kemebesera.

<sup>21</sup> Anutungo uba ikocga hendeac kuc yomocngo mong mi yafinggumanu entegeng kecnade.

<sup>22</sup> Ge manganaga imoc wama ubaga dzigeneu Kebu numumina ubagau songo ikoha dzuacgembac.

<sup>23</sup> Manganaac hodungango ge memanganeguu ngicngac memanganeyununadeac fakango fuseguecnoc.” imoc henduae.

24 Ifi deu Simongngo deec, “Wiac dedapemoc, imoc mi fingece nbeso. Imocac ngeraoc neac amma Kebu numumiec.”

25 Anu aposoro yeri ngicngac Kebuac yoc de kperagima edekpou ayemmema Yerusarennu dzigenebeso dema Samaria guruama tackendesoc siduc gombang de kperagiyemmema kenoc.

26 Kebuac angero mongngo Firipo yofi dema edeec, “Ge efaima sing Yerusarennunac emu Gadza taonnu kemedede, imohai kembesena. Sing imoc kisi fede.”

27 Ifi dema edeu Firipongo efaima kenec. Anu Etiopia bangectoau ngactau mong kefec kpara Kandake, yeac ngickuneng mong\* dzofinahaac garengtoa, yeng Yerusarennu Kebu afeheudeac kengenecfunac

28 dzigenema keretafcu tacma ferecge kemma profete Yesaia, yeac yoackibi osoec.

29 Ifi ammanu Asungo Firipo yofi edeec, “Ge bic kereta edimocac hoangau kenna.”†

30 Ifi deu Firipongo yearu nedzima kemma ngic ye profete Yesaia, yeac yoackibi osou negemma kpesimiec, “Yoc osonec, imocac hania negentegecne me?”

31 Kpesimiu deec, “Mongngo mi de kperaginemanu neannaoc naric mi negentegecbade.” Ifi dema Firipo ye kereta enu yerahafoc tarecdeac derecgemiec.

---

\* **8:27:** Ngic imoc ye ghomea meic meickea. † **8:29:** Ge ifin-goc Dedeseri 23:1 nga Yesaia 56:3-7 osona. Warac ngic ifia yeni Anutuac hoannu naric mi hagec. Yaguc Tiri Asungo sing gboria meficgenemmede.

<sup>32</sup> Yoackibi osoec, imoc yofi,

“Rama mong kpehou anggecdeac mekengandae me ramamedahango dzoea merec merec-gengic yearu waickema feande, siriha imocacsoc amma enara mong mi anggeec.

<sup>33</sup> Yeni yoacfu kuha memama yeac yoacac fora mi dema bangecfu kekeha meickegec. Anu yeac esangabofora yeneac kpetengina mongngo oso osoac siriha kpac. Imoc yofiac, Kebuac arengfora yeneng kekeha bangecfunac wangecegc.” (*Yesaia 53:7-8*)

<sup>34</sup> Ifi osoma ngickunengngo Firipo yofi dema kpesimiec, “Profete ye meracac ifi dede, ye yengenaac me ngic monggac?”

<sup>35</sup> Kpesimiu Firipongo enara anggema mitikibiacc yoac imohacnac torokpema Yesuac siduc gombunggac hania edekpou ammiac.

<sup>36</sup> Ifi amma kengkecma doku monnu kensikema ngickunengngo yofi deec, “Henna, doku yoc fede, ge naric mitidoku nadzicnembang me?”

<sup>37</sup> Ifi deu Firipongo deec, “Ubaga hafoangoc negensinggenadeu naric ambade.” deu yoac yofi meremmiac, “Yesu Kristo ye Kebuac medac, imoc negensinggeduae.”

<sup>38</sup> Ifi dema keretac dzegeu taru Firipo nga ngickuneng yerahafoc dokuu kemema Firipongo doku nadzicmiac.

<sup>39</sup> Nga dokuunac eremaec Kebuac Asungo Firipo ioha wangecma kenu ngickunengngo monggoc mi hemma ubangerec negemma kenec.

<sup>40</sup> Firipongo ine Asodoc taonnu kenu henggec. Amma ihacnac hanahema amea amea siduc gom-

bung dekperagiyemmema kengkecma Kaisarea taonnu mesiec.

## 9

<sup>1</sup> Sauroac hereu ubagerec kuneng fekefecac Yesuac habu ngaba ayemmema yunumeme amma womong garengtoa yearu kemma yofi edeec,

<sup>2</sup> “Ngic me ngac Damasko taonnu sing gboria modacdae, yeni meficyunuma meyunuma maringina dedeckema Yerusareng taonnu meyunu habadeac Damasko kpekpeturang amaac enara, yeneac kibi mong ohoma nenna.”

<sup>3</sup> Miu ye kemma Damasko mewegenebeso amanu imohaingoc kurumennunac kperagingo ioha mama neraranggeec.

<sup>4</sup> Neraranggeu ye bangecfu todingge kpeu fema yoac mong yofi fingeru negenec, “Sauro, Sauro, ge nocac nukporac anemma kecannec?”

<sup>5</sup> ifi deu Saurongo kpesimiec, “Kebu ge merac?” ifi deu deec, “Nukporac anengkecnec, Yesu ninoc.

<sup>6</sup> Imocac ge yacma amau kenna! Ihai kecmana dafi ambesonga, imocac yoac edegugecde.”

<sup>7</sup> Anu ngic yegoc kenggec, yeni yoacngina kpac anu engsac iridzagec amma nanggec. Nocac yeni yoac negenggec amma ngic mong ine mi henggec.

<sup>8</sup> Nga Saurongo yacma kic fiudeac kpanggung manggung anu ngicfora yeneng mariaua mema Damasko mekenggec.

<sup>9</sup> Mekenggec ihai uameme harebec kiwa nomanu tacma nenedoku mong mi neec.

10 Damasko taonnu ubamereng ngic mong kefec kpara Anania, ye Kebungo ongau fingecmima kparec, “Anania.” kparu deec, “Kebu ni yomoc.”

11 deu Kebungo yofi edeec, “Ge yacma sing kpara Dindingac deandae, ihai kemma Yudaac amau emma ngic mong kpara Sauro, Tarso taonunac, ye hofocma meficgebesena. Negenna, ye numuma tacde.

12 Ye ongau kpefing yofi hendac: Ngic mong kpara Anania, yeng yearu kemma kiwa fiudeac dema maria sebiau faidac.”

13 Ifi deu deec, “Kebu, ngic yeac homac degec negenganduae. Ye geac kpetiac arengfocga Yerusarennu megigi noc efea ayemmeande.

14 Nga yei ifingoc kpacga kpacma dengereandimbe, neni sasawa witicnunuma menunu kenudeac womong gareng enara yeneng uakibi migece yofinenggac mekecede.”

15 Ifi deu Kebungo yofi edeec, “Ge kenna. Ni ngic yenoc meisinggeba ye siducedena bangec monnunac ngicngac nga ngictaufocngina amma israe medacfora yenearu kpacsiducna deyadibeso.

16 Ammanu kpacnaac amma sueba kpendzeng nga ebic hania haniaac witiau kecbeso, imoc edzahema kpoumibade.”

17 Ifi deu Anania ye kemma ama dedea, ihai emma Sauroac sebiu maria faima deec, “Tosona Sauro, yacna. Kebu Yesu sinnu fingecgenec, yennoc suenude. Ge kicga fina Tiri Asungo ubagau wakeudeac haduae.”

18 Ifi demanu ye imohaingoc kiwaunac wiac mong fonoc isoc mau kiwa fima yacma mitidoku nadzirec.

19 Nadzicma yaka nema seriec.

Sauro ye Yesuac habu Damasko kecgec, yenigoc uameme goa kefec.

20 Kecma imohaingoc yudangic yeneac kpekpeturang amau emma Yesuac hania dekperagiyemmema yofi edeyunuec, “Yesu ye Anutuac medac.”

21 Ifi edeyunuu yeni negemma kpidohoma yofi degec, “Ngi imocngonoc Yerusareng taonnu kpac imocnoc ewehieihei ammigec megigi ayemmema yei ifingoc witicyunuma womong gareng enara yenearu meyunu kenudeac haec.”

22 Ifi degec Saurongo serima yofi deec, “Foracngoc, Yesu ye Messia.” Ye imocac hania edzacyunuu yudangic Damasko kecgec, yeni negemma kpidohoma yoara turunga mi merenggec.

23 Ye uameme homac ifi angkefu yudangic yeneng Sauro kpegecdeac yoac dedzege anggec.

24 Ifi amma yeni kpegecdeac dema oda naguyau hadzing tofocnac gareng faiyunugec nangkecgec. Yeac dekiric anggec, imoc yengenaaru hau negenec.

25 Anu Sauro yoaraac uba merenggec, yeneng tofocnac ye uficfu barima oda titingau sing faigec ngadeau kemema kenec.

26 Kemma Yerusarennu kensikema Yesuac habu yenearu torokpeudeac yoara deu yeni sasawango kengec anggec. Nga ye ubamereng fora anec, imoc mi negensinggec.

27 Anu Banabango Sauro mema aposoro yenearu hesicke kemma yofi edeyunuec, “Kebungo Sauro sinnu finge cmima yoac edeec. Ifi anu

ye Damasko taonnu kengeha kpac Yesuac hania dekperagiec.”

<sup>28</sup> Anu Saurongo yenigoc Yerusarennu tacyac amma yoac kengeha kpac deede ayemmema kengha anec.

<sup>29</sup> Amma Kebuac kpacfu serima namma ngic siduc gombung kengeha kpac, enacefac edeyunuec. Edeyunuu yudangicngo grikyoac dekecgec, yenigoc Anutuac enacyoac denegenggac amma yoacngina engemmama anec. Anu ngic imoc yeneng ye kpebeso anggec.

<sup>30</sup> Ifi anggec Yesuac habu yeneng imoc negemma Kaisarea taonnu hesicke kemema faigec kengkecma Tarso taonnu kengsikeec.

<sup>31</sup> Anu kpebung Yudaia nga Gariraia amma Samaria bangecfu kecgec, yenearu ruae fingerec. Fingeru ruaegoc kecma kpetengina kuneng amma sahema Kebu eweheimima ubango hoanggema afehegec. Anu Tiri Asungo ubaebicngina meickeec.

<sup>32</sup> Petoro ye amabangec tackende, imoc yerecgema kengkecma Yesuac kpetiac areng\* Rida taonnu kecgec, yenearu kemesikeec.

<sup>33</sup> Sikema ihai ngic mong henec, kpara Ainea, ye puring amma fefeu fekefu kifa 8 bic anec.

<sup>34</sup> Nga Petorongo yofi edeec, “Ainea, Yesu Kristongo mengeregudeac yacma fefega geanggaoc mengerena.” deu ye imohaingoc yacma nanec.

<sup>35</sup> Ifi anu ngicngac Rida taong nga Sarong bangecfunacngo ye hemma ubangina meremma

---

\* **9:32:** Yesuac kpacfu kopocsic deficgema mengadehedae, yeni Anutuac kicfu kpetiac andae.



Kebuaru kenggec.

<sup>36</sup> Yope taonnu ubamereng ngac mong kefec, kpara Tabita, kpara grikyoacfusing Dorkas. Yearu memeficac faka gombunga feecac makpekpea meficyunuma kefec.

<sup>37</sup> Anu naso imohai Tabita ye hafei fingecmiu homeec. Homeu yeni farenga kerec nadzicmima amamana monnu meemma faigec feec.

<sup>38</sup> Nga Yope imoc Rida taong wegenac tarecac Yesuac habu yeni Petorongo Rida tacde, imoc negemma ngic yohockang sueyurugec yearu kemma yofi desambic ammima edeoc, “Ge naric nenearu bic habang me?”

<sup>39</sup> Deec Petoro ye negemma efaiu yerigoc kenggec. Kensikeu fareng feecfu hesicke enggec. Enu ngachodzec sasawa yeni oronggema kiacubamangang anggec. Nga Tabita gbori kecma ngakpikporuc kpebiyemmekefec, imoc edzahedacgec.

<sup>40</sup> Edzahegec Petorongo sueyunuu kemedacgec fafoc heima numuec. Numuu wisickeu farenga feecfu dzigenema yofi edeec, “Tabita ge yacna.” deu ye kiwa fima Petoro hemma yacma tarec.

<sup>41</sup> Tacmanu Petorongo mariaiu mema miaru yacma nanec. Nanu Yesuac kpetiac areng amma ngachodzec Tabita gborima yarec, imoc henggecdeac kpacyunuec. Kpacyunuu hagec Tabita yarec, imoc edzacyunuec.

<sup>42</sup> Nga yeni siduc imoc degec, imocngo Yope taonnu sokoma kenu homacngo Kebu negensinggegec.

<sup>43</sup> Nga Petorongo ngic mong kpara Simong,

yamberec seberameme, yeac amau naso herea isoc tacyac anec.

## 10

<sup>1</sup> Kaisarea taonnu ngic mong kefec, kpara Kone-rio. Ye Itaria wasaiareng tosea, yenearunac ngic 100, yeneac kunengngina kefec.

<sup>2</sup> Ye yengena nga arengfora sasawa, yeneng heregoc Anutuac songo negemma eweheimima kecgec. Konerio ye ubangereac wiac homac ngicngac makpekpea yemmekefec amma Anutu wencacsoc numumikefec.

<sup>3</sup> Konerio ye 3 kirocac ua memanu Anutuac angero mongngo ongau yearu fingecma edec, “Konerio.”

<sup>4</sup> Ifi deu kpidohoma kengec kpeu kiwango gbong henserima deec, “Kebu noc wiac?” deu yeng deec, “Nunumuga nga ubangerecgaac wiac makpekpea yemmeannec, imoc sese isoc Anutuaru enu ye imocac negengngerekecde.

<sup>5</sup> Imocac ge yaguc Yope taonnu ngic sueyununa kemma ngic mong kpara Simong, kpara mong Petoro, ye hesicke habisia.

<sup>6</sup> Ye yamberec seberameme ngic mong kpara Simong, yeac amau kecde. Amea imoc kondung tegiau tacde.”

<sup>7</sup> Angerongo yoc imoc edema kenu Konerio ye enac tofoc tofohongic yohockang nga wasaingickereng mong, ngic imoc heitaiyunuma yoc deu negenec.

<sup>8</sup> Imoc ayemmedacma Yope taonnu sueyunuu kenggec.

9 Ngic yeni kengkecma sinnu fegec ama wereckenu monggoc kengkecma ama mewegenebeso ammagec, Petorongo wenac dzongiau numuudeac ama witiau waranda isoc feec, ihai enec.\*

10 Emma yakaac homema deu yaka ohomagec Kebungo kiwa merecgeu faka yofi henec:

11 Kurumeng anggeu wiac mong henec. Imoc kporuc isoc tegia noboc noboc mema bangecfu faigec mama, ifi isoc anec.

12 Imocac manau yamberec amma nengboud-zoc hania hania feec.

13 Mamanu yoac mong yofi fingerec, “Petoro ge yacma kpenec anna.”

14 Ifi fingeru Petorongo yofi deec, “Kebu imoc naric kpac, ni wiac wonongagoc nga Kebungo kpaefae, imoc mong mi neai nga naric mi nebade.”

15 Ifi deu atac yohockang anu deec, “Anutungo kpaefae imoc meickede, imocac ge wonongagoc mi dena.”

16 Nga faka imoc fingeru atac harebec anu imohaingoc kporuhagoc kpedziu kurumennu monggoc enec.

17 Enu Petoro ye onga henec, imocac negengfagung amma tacmanu Konerio ngicfora yeni Yope taonnu sikema Simonggac amaac kpesi kpesi kengkecma odanaguyau namma

18 kpachofoc amma kpesigec, “Simong kpara mong Petoro, ye ama yei kecde me?”

---

\* **10:9:** Israe ngic yeni amangina siriha dafi megec imoc ongau hafac 247nu fede.

19 Nga Petorongo onga henecac negengfagung amma kecmanu Asungo yofi edeec, “Negenec, ngic harebec yeni hama ge hofocgudae.

20 Imocac ge yacma kemema yenigoc kembesonga dema negengyohoc mi ambesena. Ngic imoc yeni neng sueyunuba hadae.”

21 Ifi deu Petorongo yenearu kemema deec, “Ngic hofocdau ni yomocnoc, ngeni dafiac hadae?”

22 Ifi deu ngic yeneng yofi degec, “Wasaingic gareng Konerio ye Anutu eweheimima faka gombunga modackecde. Nga yudangic sasawa yeni yeac negenggec ngereeande, yenoc angero kpetiac mongngo fingecmima ameau heitaiguma enacgaunac yocac negenudeac edeec.”

23 Ifi degec Petorongo amau heitaiyunuma edoc bedoc ayemmu fegec.

Fema wereckengau yacma ye nga ngic imoc yeni kembeso anggec Yesuac habuunac goa Yope kecgec, yeni yenahafoc kenggec.

24 Yeni sinnu tofocnac mong fema ama wereckenu yacma kengkecma Kaisarea kensikegec. Konerio ye arengfora amma tosofora heitaiyunuu tomal kecmagec kensikegec.

25 Kemma Petorongo amau embesonga amanu Koneriongo hama hoangau fafoc heima numumiec.

26 Numumiu Petorongo mema miacma yofi edeec, “Yacna ni ngicogogangoc.”

27 Ifi denegeng amma ye ama manau emma ngic kpedzucnema tacgec, yenemma yofi edeyunuec.

28 “Ngeni yudangic neneac faka negendae. Neni bangec monnunac ngic ngenigoc ogo nga en-

gemma kekec ifi mi annideac kpaeyoac seria fede. Ni ine ngeni ngic wonongnginagoc dema desusuic mi dengemmebadeac Anutungo imoc edeedzacnu anec.

<sup>29</sup> Imocacnoc heitainugec haba dema mi obohoai. Anu yoc heitainudae, imocac hania degec negemba.”

<sup>30</sup> Ifi deu Koneriongo yofi edeec, “Uameme 4 bic wisickemanu marai 3 kirocac ua memanu numubare ngic mong ngakpia kperagiagocngo nearu fingecma

<sup>31</sup> yofi edenuc, ‘Konerio negenna, Anutungo nunumuga nga ubangerecgaac wiac makpekpea yemmeannec, imocac negengngereede.

<sup>32</sup> Imocac ge Yope taonnu ngic sueyununa Simong kpara mong Petoro, ye hesicke habisia. Yeng yamberec seberameme Simong, yeac amau kecde. Amea imoc kondung tegiau tacde.’

<sup>33</sup> Yoac ifi deu ni imocacnoc gereagoc sueyunuba gearu hadau. Hagec geng yoacna negemma hanecac naric ande. Nga Kebungo yoac edeguec, imoc seng dena negennideac Anutuac kicfu nenahafoc kpedzucnema tacdimbe.”

<sup>34</sup> Ifi deu Petorongo enacefac amma yofi edeyunuec, “Anutungo ngicngac isinnunuma monggac songo negemma mong mi waude, imoc foracngoc negentegecyombonggeduae.

<sup>35</sup> Ngic bangeha bangeha eweheimima angammeme dindingac angkecdae, yeneac negenu ngereeande.

<sup>36</sup> Foracngoc, Anutungo Yesu Kristo mocgu, ngic sasawa nenang Kebunoc sueu maec. Yeng ruae

yoac gombang israe ngicngac nenearu deficgen-  
emmeec, imoc ngeni negendae.

<sup>37</sup> Amma Gariraia bangecfu hanahema wiac fin-  
gecma Yudaia bangec sokoma kenec, imoc ngeni  
negendae. Imoc yofi: Yohane ye ngic dokunadzi-  
cac yoac edeyunuec.

<sup>38</sup> Anu Anutungo Yesu Nadzaretenc kuc nga  
Tiri Asu faimiu yeng bangec yerecgema kengha  
amma ngic meficyunuma mengereyunukefec nga  
mangana minginaac kucngo ngicngac kekecng-  
ina memanganedarec, yeni mengereyunudarec.  
Anutungo nonggo tacmimanu yeng ua imoc meec.

<sup>39</sup> Anu Yesungo yudangic neneac bangecfu nga  
Yerusarennu ua meec, imoc hennegeng andaring.  
Ifi amma kecmanu yeni ye mariponnu kpegec  
homeec.

<sup>40</sup> Homema femanu wenac harebec anu Anu-  
tungo ye megboriu yacma ngicngac fingecyem-  
meu henggec.

<sup>41</sup> Ngicngac sasawa yenearu mi fingerec,  
kpac. Anutungo waracngoc siducededefora  
meisinnunuec, nenearusac fingerec. Ye  
homecfunac yaru neninoc nenedoku yegoc neing.

<sup>42</sup> Nga Anutungo ngic yenoc ngic gbori  
nga homemea angammemenina desiudeac  
gununggeec, yoac imocac hepuc amma  
ngichabu gorongina kpema desaheyemmenideac  
denemmeec.

<sup>43</sup> Anu profete sasawa yeneng yeacnoc hepuc  
amma yoac yofi degec, 'Ye negensinggegede, yeni  
yeac kpacfu kopocsicngina kpac anude.' "

<sup>44</sup> Petoro ye yoac ifi dema nammanungoc  
negemma tacgec Tiri Asungo yenearu mama

ubangina wakeec.

<sup>45</sup> Wakeu ngic sebi tosangina herec herecgeango Yesu negensinggegec nga Petorogoc kenggec, yeni Tiri Asungo wosoefahaac kuc bangec monnunac ngicngac, yenearu ifingoc faiyemmeu

<sup>46</sup> nedzarangyoac dema Anutu dengerema deaf-ehe ammigec, yeni imoc negemma kerectegec anggec. Ifi anggec Petorongo yofi deec,

<sup>47</sup> “Nenang Tiri Asugoc aning, faka imoc ngic yomoc ifingoc fingecyemmeu mitidoku naric mi segereyemmebesonga.”

<sup>48</sup> Ifi dema yeni Yesu Kristoac kpacfu doku nadz-icgecdeac deyemmec. Nga yenigoc uameme goa tarudeac edegec.

## 11

<sup>1</sup> Aposoro goa nga Yesuac habu Yudaia bangecfu kecgec, yeni bangec monnunac ngicngo Anutuac yoac negenguba anggec, imocac siduc negenggec.

<sup>2</sup> Nga Petorongo Yerusarennu dzigene kenu sebi tosangina herec herecgea, yeneng dehau am-mima

<sup>3</sup> yofi edegec, “Ge nocac sebi tosangina mi herec herecgea, yeneac amau emma yenigoc yaka nedang?”

<sup>4</sup> Ifi degec Petorongo faka haniaunacngoc finge-cereec, imoc edeyunuec.

<sup>5</sup> “Ni Yope taonnu numuma kecbare kicna merecgeu onga mong yofi henai: Wiac mong kporuc kuneng isocngo tegia noboc noboc menamma kurumennunac nearu faigec maec, ifi isoc anec.

<sup>6</sup> Mau hereema kperirickema yofi henai, yamberec kuneng kapia nga goa enacnginagoc amma nengboudzoc hania hania feec.

<sup>7</sup> Ifi yenembare nearu kpakpac yofi fingerec, ‘Ge yacma kpenec anna.’

<sup>8</sup> Ifi deu yofi deai, ‘Kebu imoc naric kpac. Ni wiac wonongagoc nga Kebungo wiac mong kpaefaeic, imoc enacna mi kpesereecfu mi kpesereude.’

<sup>9</sup> Ifi deba kurumennunac yoc mong fingeru atac yohockang anec, ‘Anutungo kpaefaeic imoc meickedede, imoc wonongagoc mi debesena.’

<sup>10</sup> Faka imoc fingeru atac harebec anu iwai imoc kporuhagoc monggoc kpedziu kurumennu enec.

<sup>11</sup> Anu negenggec, naso imohaingoc Kaisarea taonnunac ngic harebec sueyunugec nearu hama ama kefai, ihai nammaggec

<sup>12</sup> Asungo yofi edenuc, ‘Ge yenigoc kembeso dema negengyohoc mi ambesena.’

Ifi deu kamba negen negensinggoc tosofocna 6 yomoc, yeneng modacnugec kemma wasaingic-gareng yeac amau ening.

<sup>13</sup> Enni yeng yoacsiduc yofi anemmeec, ‘Neac amau angero mongngo fingecnemma yofi edenuc, “Ge Yope amau ngic sueyununa kemma Simong kpapa mong Petoro, ye hesicke hagec.

<sup>14</sup> Yeng yoc edeguu ge nga arengfocga ngeni yoc imoc negemma hoangema komoc kpegedede.” ’

<sup>15</sup> Anu ni siduc gombung edeyunubare warac nenannu Tiri Asu maec, ifi isocngoc yenearu madac.

<sup>16</sup> Ni imoc hemma Kebungo yoc yofi deec, imoc negensiai, ‘Yohane ye doku nadzicngemmeec, yoc ine Tiri Asu nadzicngemmeude.’



17 Nga nenang Kebu Yesu Kristo negensingemina Anutungo wosoefahaac kuc nemmeec, yeng ine wosoefahaac kuc siriha imocngoc yemmeu ni ifiango Anutu naric mi kpetarimibade.”

18 Petorongo ifi dema edeyunuu yeni negemma ubangina kuha mau Anutu afehema yofi degec, “Foracngoc, Anutungo bangec monnunac ngicngac ubangina meremma kekecseriac fora anggedeac ifinoc ande.”

19 Ngicngac yeni Stefano kpema Yesuac habu goa yenhafoc yunukporac ayemmegec ticpac tehema goango Foiniki bangecfu nga Kipiro nucfu amma Antiokia taonnungoc kensikegec. Kemma kecma yudangicsac siduc gombang dekperagiyemmegec.

20 Anu Yesuac habu botucnginau ngicngac Kipiro nucfunac nga Kirene bangecfunac kegec, yeni Antiokia taonnu hama grikgic yenigoc ifingoc denegeng amma Kebu Yesuac siduc gombang dekperagiyemmegec.

21 Dekperagiyemmegec Kebungo kuc yemmeu ngicngac habutoa yeni negensinggema ubangina Kebuaru faigec.

22 Imocac yoacsiduc kpebung Yerusarennu kegec, yeneac kedzacfu kemeu yeni imoc negemma Banaba suegec Antiokia amau kenec.

23 Kensikema Anutungo danggunuc uaya bic meficgeec, ye imoc hemma ubangerec negemma ubanginango Kebuaru heiserigecdeac demeechai ayemmeec.

24 Ye ngic gombunga amma ye ubeau Tiri Asu nga negen negensing wake wakea femiu ngicngac homacngo imoc hemma Kebuaru torokpegec.

25 Nga Banabango Sauro hofocma meficgeudeac Tarso kenec.

26 Kemma meficgema hesickeu Antiokia taonnu hama kpebung yenigoc kifa mocgu kecma ngic homac Anutuac enacyoac edekpou ayemmeoc. Nga Antiokia amau hanahema ngicngo Yesuac habu, yeneac kpac Kristoac ngic deficgeyem-megec.

27 Naso imohai profetengic goa Yerusarennac Antiokia taonnu magec.

28 Yenearunac tosongina mong kpara Agabo. Asungo kpefing edeu yeng yacma bangecsoc bod-itoa fingerudeac deficgeec. Nga bodi imoc Roma ngictau Sisa Kraudio kecmanu naso imohai fingerec.

29 Fingeru Yesuac habu yeni yoc imoc negemma Yudaia bangecfu negen negensingoc tosofocngina kecgec meficyunugecdeac hiedzo feyemmeecsoc kpeturanggema yenearu faigec kenudeac deserigec.

30 Deserima hiedzo meficgegec, imoc Banaba nga Sauro yemecgec yeri imoc mekemma Yesuac habu Yerusarennu enarafocngina kecgec, yeni yemmegec.

## 12

1 Naso imohai ngictau Herodengo kpebung kecgec, yenearunac ngicngac goa yunuma memanganeyunuudeac negemma mendangyunuma witicamau faiyunuec. Ifi ayemmema ngade yocafu faiyunuma ngaba ayemmema yunubeso negenec.

<sup>2</sup> Amma yeng deu Yohane dara Yakobo wa-saibeangno kpehomegec.

<sup>3</sup> Ifi anu yudangic yenisongo negenggec nga yeng yenemma ic sogong yisya kpac nene, imocac tacyacnasou deu Petoro ifingoc mendanggema witicamau faigec.

<sup>4</sup> Ye makekenggac tacyacnasou wisickeu Petoro\* yudangic yeneac kicfu yoacfu faiudeac negensima deu witicamau faiec. Faima wasaingic 16 yeneng areng 4 nga 4 hendzicma namma garenggegec.

<sup>5</sup> Ifi anggec Petoro ye witicamau tacmanu kpebung yenitatahoc Anutuaru numukegec.

<sup>6</sup> Anu Herodengo ama wereckenu Petoro yoacfu faiudeac deec, naso imoc wegenemanu tofocnac imohaingoc wasaingic yohockang yereng Petoro seng yohockangno yeranggoc witickema faiec botucngirau feec. Femagec wasai goa yeninagu ngadeau gareng nangegec.

<sup>7</sup> Yeni ama manau ifi fegec Kebuac angero mongngo hama ihai nanu amamana imoc kperagidarec. Kperagiu angerongo Petoro pandzen-gau kpeserema midima deec, “Ge bic yacna.” demanu seng imohaingoc Petoroac mariaunac ftockema mau

<sup>8</sup> angerongo deec, “Ge fadengga dzegema hanitabega heina kemeu.” Dema angerongo monggoc edeec, “Ngakpiga herea heina kemeu modacnuna.”

<sup>9</sup> Ifi deu Petorongo yacma angero modacma

---

\* **12:4:** Ge Makekeng nadung 12 nga 13 imohai osoma negengecna. Ihai tacyac yohockanggac hania dekperackperagia fede.

kenec. Kemma angerongo faka yearu meec, imocac negenu onga isoc anec.

<sup>10</sup> Nga yeri nagu yohockanggac gareng nanggec, imoc feracyunuma kemma aieng nagutoa taonggac kiwaugeng mewegenemaec, imoc yengenaoc anggeu kemeoc. Kemema sinnu kemma angero ye ioha aockeec.

<sup>11</sup> Ifi anu Petoro ye negen negenga sariu yofi deec, “Yaguc negentegecduae, Kebungo angeroya sueu Herodeac mariunac nga yudangic yeneac herebuunac mesinude.”

<sup>12</sup> Ifi negentegecma kemma Yohane Marekoac nonggea kpara Maria, yeac amau sikeec. Ihai homacngoc kpeturanggema numuma tacgec.

<sup>13</sup> Tacmagec Petorongo ama naguyau namma nagu heiu uanaroang mong kpara Rode, yeng imoc negemma mama

<sup>14</sup> Petorongo yoac deu ubea negemma nagu mi witiwiti, eng sogaima ama manau emma, “Petoro ye hadac nagu nande.” dema edeyunuec.

<sup>15</sup> Edeyunuu yeni negemma degec, “Ubaga sufude me?” degec, yeng serima deec, “Fora yombong, yeng nande.” deu yeneng degec, “Imoc angeroyango gedang.”

<sup>16</sup> Nga Petoro ye heimangoc nammanu yeni nagu witima yengena hemma kpidohogec.

<sup>17</sup> Kpidohogec yeng maribarac tuema dera-cyunudacma Kebungo witicamaunac yungeru maec, imocac yoacsiduc ayemmema deec, “Ngeni siducna yomoc Yakobo nga negen negensinggoc tosofocnina edeyunugec.” Ifi dema meickema monnu kenec.

18 Ama wereckenu wasaingic yeni Petoro hofocma degec, “Ye dafiu aockedac?” dema kpidohoma oboc kpoboc yombong anggec

19 Herodengo meficgegecdeac deu hofocbibiegec. Hofocbibiegec dekpesi ayemmeu kpac anu wasai yeneng nagugareng imoc yunuhomegecdeac desiec. Desiyunuma Yudaia bangec wama Kaisarea kemema kefec.

20 Herodengo Tiro nga Sidonggac ngicngac herebu meficgemyemmekefec. Imoc yofiac, yeni nenesemengngina Herodeac bangecfnac megecac amma yeni kpedzucnema yearu hama ngaba kpac anu ruae fingerudeac kpesimigec. Yeni warac Herodeac ngickereng mong kpara Birasto, ye Herodeac gaufefe amea garenggema kefec, yearu kemma yeng yenigoc kefudeac dengombong ammigec.

21 Herodengo yoac imoc negemma imocac turunga merengyemmeudeac naso edeyunuec. Naso imohai ye ngictau ngakpia heima ngictautatahau matacma urecyoacngina edeyunuec.

22 Edeyunuu ngic yeni sasawango horianggemima yofi degec, “Yoaac imoc ngicyoac kpac, imoc Anutuac yoac.”

23 Anu ye Anutu mi afeheecac amma naso imohaingoc Kebuac angerongo Herode kpeu kamango kigec homeec.

24 Homemanu Anutuac yoacngo yadima kenec.

25 Anu Banaba nga Sauro Yerusarennu sueyurugec, yeri ua imoc medarec wisickeu dzigene Antiokia kenecdeac Yohane kpara mong Mareko

hesickeec yenahafoc kenggec.

## 13

<sup>1</sup> Kpebung Antiokia kecgec, yeneac botucfu profete nga kpoukpou yofingo kecgec: Banaba nga Simong, kpara mong Nige, Rukeo Kirene amaunac nga Sauro amma Manaeng.\*

<sup>2</sup> Anu yeni naso monnu yakasege kecma Kebu afehegecdeac kpedzucnema kecgec Tiri Asungo yoac yofi edeyunuec, “Banaba nga Sauro yeri neac ua meecdeac kpacyuruma ua yemerai, ngeni imoc meecdeac desiyecmegec.”

<sup>3</sup> Ifi deu yeni yakasege kecma maringina sebingirau faima numukenehe ayecmema faiyurugec kenoc.

<sup>4</sup> Tiri Asungo ifi dema sueyuruu yeri Sereukia taonnu kemeoc. Ihai sikema kporucwageu emma kengkecma Kipiro nucfu enoc.

<sup>5</sup> Emma Sarami taong ihai kemma yudangic yeneac kpekpeturang amangina tackenecsoc, ihai emma Anutuac yoac deireckeyemmenoc. Kenec Yohanengo yerigoc yenahafoc kecma meficyuruec.

<sup>6</sup> Anu nuc imohai hanising ferecge kengkecma Pafu amau kenggec. Ihai kensikema yudangic mong bangecac hadehadegoc nga profete ikoha kefec kpara Bara Yesu, ye meficgegec.

<sup>7</sup> Ngic yeac tosoya kia mong kpara Sergio Pauro. Kia imoc ye negen negengtoayagoc nga Anutuac yoac negembesonga ammiu Banaba nga Sauro kpacyuruec.

---

\* **13:1:** Ngickereng Herodeac nonggomama yereng Manaeng heibeging ammima mekefec yadieci.

<sup>8</sup> Kpacyuruu Erima, ngic bangecac hadehade-goc,† yeng yereac yoac mefahema kiango Yesu negensingebacac deraheec.

<sup>9</sup> Ifi anu Tiri Asungo Sauro, kpara mong Pauro ubeau wakeu Erima kiwango henseriserima yofi edeec,

<sup>10</sup> “Mangana minginaac medac, ge Kebuac sing dindingac fekende, imocac ngaba seria amma kecna ubagau ikoc nga manganango wake wakea. Ge Kebuac sing dindingac femanu mengbar-inggekecnec nasoherec ifi kecma faka imoc mi wanec.

<sup>11</sup> Imocac yaguc Kebuac kuc gearu fingeru hembesena. Kicga kundung kpeu naso botuc yomoc wenac kperagia mi heheng kecbesena.” Ifi deu imohaingoc wiac hoeng hoeng isocngo kiwa sangoheu kiwa kundung kpeu mariango meang kpeang amma mariaua megecdeac deec.

<sup>12</sup> Faka imoc fingeru kiango hemma Kebuac siduc gombang kpoumigeac, imocac negenu en-gena anec.

<sup>13</sup> Pauro nga ngicfora yeni Pafo taong wama wageu monggoc emma kengkecma Pamfiria bangecfu Perege taonnu kensikegec. Kensikegec Yohanengo ihai wayunuma Yerusarenu dzigeneec.

<sup>14</sup> Dzigeneu yeni Perege wama kengkecma Pisia bangecfu Antiokia taong waseau, ihai kensikegec. Ihai kecmagec sabata naso anu yeni yudangic yeneac kpekpeturang amau emma tacgec.

<sup>15</sup> Tacgec gareng yeneng Anutuac dedeseriyoac nga profete yeneac yoackibi goa oso wisickema

---

† **13:8:** Kpac imoc titiha bangecac hadehadegoc.

yofi edeyunuec, “Tosohocnina ngereng Anutuac enacyoac mong negendape isoc demeseri anem-meec negenni.”

<sup>16</sup> Ifi degec Paurongo yacma waickema tadcagecdeac maribarac kpouyemmema yofi edeyunuec, “Israengicngac, ngeni nga habu goa Anutu eweheimiandae, ngeni edengunuba negenggec:

<sup>17</sup> Israengicngac nenang Anutungo kisicfocnina meisingyunuu yeni Aigita bangecfu kuric kecma sahegec. Amma ye kuctoayango imohacnac hesicyunu hama

<sup>18</sup> bangec kisiu hocsiragocfu faiyunuma yenenggareng ayemmeec. Yenenggareng amma mebibieyunuma kecmanu kifa 40 wisickeec.

<sup>19</sup> Wisickeu yeng Kanaang bangecfu amabangec seweng kpedzongyunuma kisicfocnina bangec imoc yemmeu minginasoc amma kecmagec kifa 450 wisickeec.

<sup>20</sup> Wisickeu Kanaang bangecfu kecmagec yeng dedesingic meficyunuu keceremagec profete Samue fingerec.

<sup>21</sup> ‘Ngictaunina mong fingeru.’ degec Anutungo Benyaminggac arenunac Kisi medaha kpara Sauro, ye meficgeyemmeu kifa 40 enaramemengina amma kefec.

<sup>22</sup> Kecmanu ye meickema ngictaungina Dawidi faiec. Amma yeac hania yofi dekperagiec, ‘Ni Dawidi, Isaiac medac yeac ubana ngeree ye hengising ammiai. Yennoc enac tofoc tofohona kefude.’ ” *(Mitiyegec 89:20; Yesaia 13:14)*

<sup>23</sup> “Anu yoac yofi dedea fede, ‘Dawidi arengfora yenearunac israengicngac nenang kopoc-



sicac ebicfunac mesinunuudeac ngic mong fingerude.’ Anutungo imoc deserinemmeec, imocac fora fingerec nga imoc Yesunoc.

<sup>24</sup> Anu Yohanengo ngic botucfu mi fingectegecma kecmanu israengicngac sasawa ubangina dzigeneu mitidoku nadzicgecdeac edeyunuec.

<sup>25</sup> Edeyunuma uaya mesiu wisickebeso amanu yofi edeyunuec, ‘Ngeni ngic negennuandae, ni ye kpac. Negenggec, neac ngadeu hade, ye engenatoa nga ni ifiango yeac hanitabe witiha yungecba mi ngereeude.’

<sup>26</sup> Tosofocna, Abrahanggac bangecfora nga habu goa Anutu eweheimiandae, ngeni yoacna deba negenggec, kopocsicac ebicfunac mesi mesiac sing fede nga komoc kpeni, yoac imoc nenannu faiec fede.

<sup>27</sup> Nga Yerusareng ngic engena mamea, yeneng Yesu mi hentegecma ye kpegecdeac desigec. Yoacfu ifi faima desigec nga sabata tatac nasosoc profete yeneac kpefingyoac osonegeng angandimbe, imoc seriec.

<sup>28</sup> Foracngoc, yeni Yesuac kopocsic hofocbi-biema eng hodzinggema Piratoac mariu faigec, yeng desiu kpehomegecdeac degec.

<sup>29</sup> Anu mitikibiu yoacsiduha oho ohoya fede, yeni imoc ammidacma mariponnunac mesima kicsereu mekenggec. Yeni mekemma kedzebe ngicngongo miac miackeau sinegec emma feec.

<sup>30</sup> Feu Anutungo ine homecfunac megboriu yarec.

<sup>31</sup> Yacma ye ngicngac yegoc Gariraia bangecfunac Yerusareng taonnu yenhafoc

kenggec, yeni uameme homac fingecyemmeec. Fingecyemmeu henggec, yenennoc siducdede-fora anggec kecdae.

<sup>32</sup> Anu Antungo bangecfocnina hanahema wiac yemmeudeac deseriyemmeec,

<sup>33</sup> imoc Yesu megboriu nambaracfocngina nannu fora fingeru imocac siduc gombung eden-gunuandimbe. Imocacnoc Mitiyegec nadung yohockang, imohai yoac yofi oho ohoya fede, 'Ni yagucnoc megudua. Ge medacna nga ni geac Mangga.' *(Mitiyegec 2:7)*

<sup>34</sup> Yeng Yesu megboriu yarec nga ye ngade home-home nga hoachoe imoc yearu monggoc mi fingerude. Yoac imocac Anutungo yofi deec, 'Ni Dawidigoc dzahacemeic, imocac fora kenec kenehe kpetiac ngemmede.' *(Yesaia 55:3)*

<sup>35</sup> Amma Mitiyegec monnu yoac yofi fede, 'Ge kpetiac ngicga onggongena ye mi hoabeso.' *(Mitiyegec 16:10)*

<sup>36</sup> Dawidiac yofi negendimbe, Anutungo ye ua demiec, imoc ngicfora yenearu mesima homeec. Homeu esangabofora faiyunugec, ihaingoc tong-gogec hoama kpac anec.

<sup>37</sup> Anu Anutungo ngic megboriec, yeng ine hoac hoaea kpac.

<sup>38</sup> Tosofocna yofi edengunuba negenggec: Kopocsic dzuac dzuac, imoc ngic yennoc meficgeec, dedekperagi yoac imocngo ngenearu haec.

<sup>39</sup> Nga Moseac dedeseriyoacngo kopocsicngina naric mi dzuarec. Nga Yesu negensinggegec kopocsicngina dzuaru kpac anude, imoc ine fede.

40 Profete yeneng yoac yofi degec, imoc nge-nearu seribacac nono edengunuduae.

41 ‘Ngicngac ngeni defagoc angkecdae henggec. Ni naso imohai faka morora meba ngeni imoc hengkipidoc amma hofeu kemegecde. Ngic mongngo edengunuu imoc naric mi negensingebau.’ ” *(Habakuc 1:5)*

42 Ifi deu Pauro nga Banaba yeri kpekpeturang amaunac mamaec ngic yeneng sabata tatac naso monggac yoac imocacngoc edeyunuecdeac derecgeyemecgec.

43 Tutumang wisickeu mama yudangic nga bangec monnunac ngic homacngo yudangic yenearu torokpema kecgec, yeni yenahafocngoc Pauro nga Banaba modacyurugec Anutuac wosoefahaac arennu seria kecgecdeac demeseri ayemmeoc.

44 Nga sabata tatac nasongina monggoc anu taong imocac ngicngac yeni Anutuac yoac negenggecdeac ebiriango sikegec.

45 Sikegec yudangic yeneng yenemma Pauro nga Banaba keracmangang ayecmegec Paurongo yoac deu yeneng yegoc yoacngina engemmama anu yoara kpema desusuic ammgic.

46 Ifi anggec Pauro nga Banaba yeri yoac kucgoc kengeha kpac yofi edeyunuoc, “Hanahema yudangic ngeni Anutuac yoac dekperagingemebesonga. Yaguc ngeni ngenaoc wama kekecseriac areng mi ambeso dedaeac neni wangunuma bangec monnunac ngicngac, yenearu kennide.

47 Kebungo yofi denemmeec,

‘Neng ge bangec monnunac ngicngac, yeneac kifa faiguba geng ngicngac kopocsicac ebicfunac mesiyununa dema ge ua imoc gamba mekengkecma bangec tegiau mekemma ebicfunac mesiyununa komoc kpegecde.’ ”  
(*Yesaia 49:6*)

<sup>48</sup> Ifi degec bangec monnunac ngicngac, yeneng imoc negemma ubangina ngereeu Kebuac yoacac dedengerec anggec. Nga kekec wisic wisickea kpac, imocac areng anggecdeac Anutungo negengyemmeecsoc, yeni Kebu negensinggegec.

<sup>49</sup> Nga amabangec ihai Kebuac yoacngo wakema kenec.

<sup>50</sup> Taong imocac ngac kuneng goa yeni yudangic yenearu torokpema kecegec. Yudangic yeni amagareng nga ngac imoc wosoumeme ayemmema meyunu kemma Pauro nga Banaba yurukporac ayecmema amabangecngina segerema kisangyurugec kenoc.

<sup>51</sup> Kemma fakanginaac amma haningiraunac yube kpefanggeec mau wayunuma Ikoniong taonnu kenoc.

<sup>52</sup> Nga Yesuac habu yeneac ubau songo kuneng nga Tiri Asu wake wakea fingecyemme kenec.

## 14

<sup>1</sup> Yeri Ikoniong taonnu sikema ihai ifingoc yudangic yeneac kpekpeturang amau emma siduc gombung kuhagoc deireckeyemmeoc. Imocac yudangic nga grikgic homacngo Yesu negensinggegec.

<sup>2</sup> Yudangic goa yeneng ine yoac imoc wama bangec monnunac ngic Anutu mi negensigec, yeni

fenggeyunugec negen negensingoc tosofocnina herebu negengyemmegec.

<sup>3</sup> Negengyemmegec yeri serima naso herea taong ihai kecma kengeha kpac Kebuac yoac kuhagoc dekefoc. Ammanu Kebu danggunuhaac yoac meseriudeac yengenaoc nonggo tacyecmanu yeri negensingegecdeac faka kuhagoc nga faka mi hehena homac mema kefoc.

<sup>4</sup> Ifi anec taong imocac ngic tohoma goa yudangic yenearu kenggec nga goa aposoro yerearu kenggec.

<sup>5</sup> Nga bangec monnunac ngic nga yudangic goa yeni garengfocnginagoc aposoro mangana ayecmema hocngo yereregecdeac yoac dzegegec.

<sup>6</sup> Dzegegec yeri imoc negemma worama Rikaonia bangecfu kenoc. Kemma ihai Ristera nga Derebe nga amabangec goa wegenac tarecfu

<sup>7</sup> siduc gombang dekperagiyemme kenoc.

<sup>8</sup> Ristera taonnu ngic mong tarec, ye hanihora mangac manganea. Ye nonggo heremanaunac ifia fingecma kenghaya kpac eng takefec.

<sup>9</sup> Tackefu Paurongo siduc gombang edeyunuu ngic ye negemma tacmanu yearu kic dindiangac fima haniaya yofi negenec, “Ngc imoc ye ngerec ngereeac negen negensing femidenoc.”

<sup>10</sup> Ifi negemma yoac kuhagoc yofi edeec, “Ge yacma hongngoc nanna.” ifi deu ngic ye porat-acke yacma kengha anec.

<sup>11</sup> Anu ngic habutoa yeneng Paurongo faka meec, imoc hemma kucgoc kpacma Rikaonia yoacnginau sing yofi degec, “Nemu yeneng ngic-sebi mema botucninau magec kecdae.”

<sup>12</sup> Amma yeni Banaba ye nemu mong kpara Dia, ifi degec nga Pauro ye yoac dederecgeac ngic, imocac amma nemu mong kpara Hermes, ifi degec.

<sup>13</sup> Nga nemu Dia yeac sesememengicngo deu yeni burumaka ngiwa goa nga dzundzaring taong tegiau odanaguyau mekemema ngihoc yereac eweheima hosuc heibeso anggec.

<sup>14</sup> Ammagec aposoro yeri imoc negemma ubaebic mema ngakpingira merecgema amangira wama bic habu yeneac botucfu kemma yofi arohooc,

<sup>15</sup> “Yei, ngicngac ngeni noc andae? Neri ngic ngeni isoc, ngeneac siric. Ngeni nemungina kucmama kecdae, yeni ngadeyunuma Anutu kekehagoc mewegenegecdeac siduc gombung dekperagingemmekecdipe. Yeng wiac sasawa bangecfu nga kurumennu nga kondunnu fedacde, imoc meficgedarec.

<sup>16</sup> Ngicngac warac kecgec, naso imohai bangec monnunac ngicngac negengyemmanu yeni ubanginaac nga kekecnginaac songo hania hania, imocac kpaea mi faiyemmanu yeni keceregec.

<sup>17</sup> Keceregec ihoc bahoc mong mi angemmec, kpac. Ye haniaya negenggecdeac ubangerec angemmema deu kiawenac sawaunac nasoyau fingeckecde. Nga ye nenesemeng nasoyau deu fingeru yakangina homac meficgengemmu songo witiau kecdae.”

<sup>18</sup> Ngihoc yereng yoac ifi gadzea mema yoac ua ebiriangoc mekecma dekpetari ayemmec yereac hosucheihei imoc wagec.

<sup>19</sup> Yeri ihai kecmaec yudangic Antiokia nga Iko-

niong taonnunac sikema yereac ua desakoigec. Desakoima ngicngac wangecyunugec, yenhafoc Pauro hocngo heigec. Heima negenggec, “Ye bic homedac.” ifi dema ama ngadeau taikemma faigec feec.

<sup>20</sup> Femanu Yesuac habu yeneng hama oronggema memidi ammigec gborima yacma amau enec. Nga wereckengau ye Banabagoc Derebe taonnu kenoc.

<sup>21</sup> Yeri kemma ihai siduc gombung dekperagiyemmeec ngic homacngo Yesu negensinggec. Ifi amma sing kenocfu, ihai monggoc dzigenema Ristera nga Ikoniong amma Antiokia taonnu tacyac hakefoc.

<sup>22</sup> Hakecma amasoc sikema Yesuac habu negen negensingina kpedzucnema kecgecdeac demeseri ayemmema yofi edeyunuoc, “Nenang Anutuac eucererennu ennideac kpendzeng hania hania fingecnemmeu imocac witiau kecbisina.”

<sup>23</sup> Amma kpebung taong mocgu mocgu kecgec, yeneac enarafocngina meisingyunugec. Nga ngicngac Yesu negensinggec, yeneac amma yakasege amma numuma kenecyunuma Kebuac hoannu faiyunuoc.

<sup>24</sup> Nga yeri Pisidia bangec ferecgema kengkecma Pamfiria bangecfu kenoc.

<sup>25</sup> Ihai kemma Perege taonnu yoac edeyunuma Ataria taonnu kemeoc.

<sup>26</sup> Kemema kporucwageu emma kengkecma Antiokia dzigeneoc. Taong imohainoc Yesuac habu yeni warac Kebuac kenecfu faiyuruma ua deyecmegec, imohai sikema mesioc.

<sup>27</sup> Ihai hasikema kpebung kpedzucyunuma Anutungo nonggo tayecmemanu ua sasawa meoc amma bangec monnunac ngicngac, yenearu ua nagu mong meyecmeu Yesu negensinggecec, imoc edeyunudaroc.

<sup>28</sup> Amma yeri naso hereangoc Yesuac habu yeneac botucfu kefoc.

## 15

<sup>1</sup> Yudaia bangecfunac ngic goa yeni Antiokia taonnu kemema Yesuac habu yofi kpouyem-mecec, “Ngeni Moseac yoacfu sebi tosangina mi herecgema komoc naric mi kpegecde.”

<sup>2</sup> Ifi degec Pauro nga Banaba yerigoc yoacngina engemmama anu uba mocgu mi anggec. Ifi angkecma yeni aposoro nga Yerusarennu habu enarafocngina yenigoc yoac imoc dengeregecdeac Pauro nga Banaba amma ngic goa meisingyunuma Yerusarennu sueyunugec kenggec.

<sup>3</sup> Nga kpebung yeneng singgac wiac yemmema sueyunugec kenggec. Kemma Foinike nga Samaria bangec kensikema Yesuac habu ihai kecgec, yeni yofi edeyunugec, “Bangec monnunac ngicngac homacngo ubamereng anggec.” Ifi degec, yeni imoc negemma ubangerec kuneng negenggec.

<sup>4</sup> Nga yeni kengkecma Yerusarennu kensikegec. Kensikema kpebung nga aposoro amma Yerusareng kpebung enarafocngina, yeneng ama heiyemmecec. Heiyemmecec, yeni Anutungo nonggo tacyemmemanu misingua mecec fora fingerec, imocac siduc meyemmecec.



<sup>5</sup> Meyemmegec farisaioac mitiarennunac goango Yesu negensinggegec, yenearunac goa yacma yofi degec, “Bangec monnunac ngic yeni sebi tosangina herecgebesonga amma Moseac dedeseriyoac tofohogecdeac demeseri ayemmebesonga.”

<sup>6</sup> Ifi degec aposoro nga enara yeni kpedzucnema yoac imoc tambuc denegeng anggec.

<sup>7</sup> Yoacua mekecma Petorongo yacma yofi deec, “Tosofocna, bangec monnunac ngicngac, yeni neac enacfunac siduc gombung negemma negensinggegecdeac Anutungo warac nenang botucfunac meisinnuec, imoc negendae.

<sup>8</sup> Anutu ye uba hehengngo warac Tiri Asu nemmeec, imoc ifingoc bangec monnunac ngicngac, yeneac negenecac Tiri Asu yemmeec.

<sup>9</sup> Nenang negensinggeing, ifi isoc yeni negensinggegec Anutungo ubangina dzuarec.

<sup>10</sup> Ifi anu ngeni Anutu tobanggema Moseac dedeseri, imocac tofo kuneng Yesuac habu yeneac witiu faibeso dedae, imoc naric mi ande. Bangecfocnina nga esangabofocnina amma nenang imoc tofobibiema obohoing.

<sup>11</sup> Nga yofi negensinggedimbe, Kebu Yesungo yudangic nga bangec monnunac ngicngac, neni nenahafoc danggunuha nemmema ebicfunac mesinunuu komoc kpenide.”

<sup>12</sup> Ifi deu habutoa yeni engsac negemma tacgec. Nga Anutungo Pauro nga Banaba nonggo tacyemecmanu ua meoc, imocac siduc meyemmeoc. Yeri bangec monnunac ngicngac, yenearu negensinggegecdeac faka kuhagoc nga

faka mi hehena homac meoc, imoc edeyunuoc.

<sup>13</sup> Siduc meyemmeec wisickeu Yakobongo yoac yofi edeyunuec, “Tosofocna, deba negenggec,

<sup>14</sup> Anutungo hanahema bangec monnunac ngicngac, yenearunac ngicngac meyunuu yeac arengfora anggecdeac sing meficgeec,\* imocac yoac Simongngo dekperagiu negending.

<sup>15</sup> Negenni yeac yoacngo profete yeneac yoacgoc socfungoc ande. Negenggec, mitikibiu yoac yofi ohogec fede.

<sup>16</sup> ‘ “Neng ngade kecma dzigenema Dawidiac amabara sesuhau monggoc heighborima meseribade.

<sup>17</sup> Nga ngic toseango Kebu ni kpachofoc anemma meficnugecde amma bangec monnunac ngicngac, yeneng ifingoc arengfocna ambisia.” (*Amosi 9:11-12*)

<sup>18</sup> Kebu ye bicngoc yoac ifia deereecngo dedenoc.’

<sup>19</sup> Imocac negengising amma yofi deduae, bangec monnunac ngicngac, yenearunacngo Anutu ubanginango hoanggema kecdae, yeni ebictoa mi yemmebisina.

<sup>20</sup> Yofisac deserima kibi ohoyemmebisina, ngicngac yeneng nemunginaac sese dema wiac heiyemmekecdae, wiac wonongagoc ifia wabisia. Yeni serima kecma kaisero mi ambisia nga yamberec fusia sawagoc amma sacac segekecbisia.

<sup>21</sup> Yeni Moseac yoac bic negendae. Nga imoc esea bicngoc yuda yeneng hanahema taonsoc osohakecgec. Amma imoc yofinenggac ifingoc sabata

---

\* **15:14:** Sing imoc Konerioac amau hanahema fingerec.

tatac nasoyau kpekpeturang amanginasoc osonegeng angandae.”

<sup>22</sup> Anu aposoro nga kpebunggac enarafocngina amma kpebungtoa, yeni negenggec imoc naric anec. Nga yenearunac ngic enara yohockang meisingyurugec mong kpara Yuda, yeac kpara mong Basaba, amma Sira. Meisingyuruma yeri Pauro nga Banaba yerigoc yenahafoc Antiokia taonnu kenggecdeac sueyurugec.

<sup>23</sup> Amma yoackibi mong yofi dema ohoma yemmegec kenggec,

“Neni tosofocngina aposoro nga enarango bangec monggac habuunac tosofocnina Antiokia nga Siria amma Kirikia bangecfu kecdae, ngenearu yoackibi yoc faingemmedimbe.

<sup>24</sup> Wenacngerec. Neni mi sueyunumina neneearunac ngic goa yeni yenaoc ngenearu hama yoac edengunuma negen negengngina mesufugec negengyohoc anggec, imoc negending.

<sup>25</sup> Neni imoc negemma uba mocgu amma ngic yohockang meisingyuruma tosohocnina Banaba nga Pauro yerigoc sueyuruni hadae.

<sup>26</sup> Ngic yerinoc Kebunina Yesu Kristo, yeac amma kekecngira waoc.

<sup>27</sup> Anu ngic imoc meisingyuruding, yeri hama yoac imoc enacfu dekperagingemmeec negembisia.

<sup>28</sup> Tiri Asu nga neni nenahafoc ebic goa witinginau mi faingemmenideac negenni ngereede. Ngeni singyoac yomocsac modacgecdeac faingemmeni ngereede:

29 Ngicngac nemunginagoc yeneng nemungina yeneac sese dema yang heiyemmegec, ngeni imoc wama mi nebisia. Ngeni yamberec fusia sawagoc mi nebisia amma sac mi nebisia. Nga kaisero mi ambisia. Ngeni imoc sasawa wadacgec ngereeude.

Imocac ngeni ubangerecgoc kecbisia.”

30 Anu kpebung yeni ngic imocnoc sueyunugec kenggec. Kengkecma yeni Antiokia kemesikema Yesuac habu Antiokia kecgec, yeni kpedzucyunuma yoackibi imoc yemmegec.

31 Yemmegec memeseri yoackibi imoc hemma osoma ubangerec negenggec.

32 Amma Yuda nga Sira yeri profete kefo-cac yoac homac dema Yesuac habu ubangina meefaima demeseri ayemmeoc.

33 Ifi angkefec naso wisickeu Yesuac habu yenearu dzigenebesonga turunga ruae nga kenecyoac ayecmegec kenoc.

34 Nga Sirango ine ihai kecbeso negenec.

35 Pauro nga Banaba yeri Antiokia taonnu uan-gira monggoc torokpema mekefoc. Mekefec ngic homac yenigoc memefic amma Kebuac yoac ng-icngac edekpou ayemmema siduc gombunggac hania dekperagiyemmeec.

36 Kecma Paurongo Banaba yofi edeec, “Nerang monggoc dzigene kemma taonnu Kebuac yoac dekperagiyemmeic, ihai negen negensingoc tosofocnina dafi kecdae, imoc kemma hennegeng ambisira.”

37 Ifi deu Banabango Yohane Mareko yenhafoc kenggecdeac deec.

<sup>38</sup> Nga Mareko ye warac yerigoc kengkecma Pamfiria bangecfu ua wama woraecac amma Pauro rongo yegoc kenggecdeac negenu mi ngereec.

<sup>39</sup> Ifi amma Banabagoc yoacngira engemmama anu wama faiemeoc. Faiemema Banabango Mareko hesickeu kemma kporucwageu emma Kipiro nucfu kenoc.

<sup>40</sup> Nga Pauro ye Sira meu kembeso deec Yesuac habu yeneng Kebuac danggunucngo ngerearu febeso degec kenoc.

<sup>41</sup> Kemma yeri Siria nga Kirikia bangecfu kengkecma kpebung demeseri ayemmekenoc.

## 16

<sup>1</sup> Pauro ye kengkecma Derebe nga Ristera taonnu kenec. Anu Ristera ihai ubamereng ngic mong kefec, kpara Timoteo. Yeac nonggea yudangac nga ye Yesuac arennu toroc torokpea anu mama ye griknigic.

<sup>2</sup> Amma Yesuac habu Ristera nga Ikoniong taonnu kegec, yeneng Pauro yofi edegec, “Timoteo ye fakaya gombunga.”

<sup>3</sup> Edegec Pauro ngo yerahafoc kenecdeac edeu naric deec. Anu yudangic bangec imohai kegec, yeneng Timoteo mama ye griknigic, imoc negendagec. Imocac Pauro ngo yeneac amma Timoteoac sebi tosea herecgeec.

<sup>4</sup> Nga yeri amaea amaea kemma aposoro nga Yerusareng habuac enarafocngina singyoac dedzege anggec, imoc tofohogecdeac Yesuac habu edeyunukenoc.

<sup>5</sup> Ifi amma ua meec kpebung yeneac negen negensing yadie. Nga wenacsoc bangec mon-nunac ngicngac, yeneng aposoro yenearu kemma torokpekegec homac anggec.

<sup>6</sup> Asia bangectoau yoa dekperagiyemmebeso degec Tiri Asungo kpetariyemmeu Firigia nga Garatia bangec eng ferecgema kenggec.

<sup>7</sup> Kengkecma Misia bangec nga Asia bangec botucngirau namma Bitinia bangecфу kembeso degec Yesuac Asungo kpae heiyemmeec.

<sup>8</sup> Imocac yeni Misia bangec ferahema kengkecma Troa taonnu kemegec.

<sup>9</sup> Ihai sikema tofocnac imohai Paurongo onga mong yofi henec, Makedoniangic mongngo yearu fingeцma namma desambic ammima yofi edeec, “Ge dokutoa ferecgema Makedonia bangecфу hama meficnunubesena.”

<sup>10</sup> Pauro ye wiac imoc henu Anutungo neni Makedonia bangecфу kemma siduc gombung deкperagiyemmenideac kpacnude, ifi negentegecma Troa wanideac bic efaiing.

<sup>11</sup> Efaima kporucwageu emma Troa wama ferecgema kengkecma Samotrake nucфу kensikeing. Kensikema wereckengau imohacnac kengkecma Neapori taonnu sikeing.

<sup>12</sup> Sikema ihai wageunac mama hanising kengkecma Firipi taonnu sikeing. Imoc Makedonia bangectoа imocac taongyada. Romangic yeneng warac bangec imoc megec. Anu taong imohai uameme goa kecmina

<sup>13</sup> sabata naso anu taong odanagu wegenacфу doku mong feec, imohai yofi dema kemeing, “Ngicngac numuandae, yeneac tacyac mong doku

tegiau fede me kpac, imoc kemema henni.” Ifi dema kemema ngac kpedzucnema kecmagec meficyunuma matacma yenigoc yoac yoac aning.

<sup>14</sup> Yeneac botucfunac ngac mong Tiatira taon-nunac kpara Ridia, ye finacama mingina nga kporuc sacsac faikefec. Ye Anutu eweheimima kefu Kebungo ubea mekperagiu Pauroac yoac kedzac kpema negenec.

<sup>15</sup> Amma ye yengena nga arengfora mitidoku nadzicma yofi derecgenemmeec, “Ngeni negen-nugec ni Kebu fora negensinggeanduaeu neac amau erema nigoc tacyac ambisia.” Ifi dema ngombonnunuu ening.

<sup>16</sup> Naso monnu numukecgec, imohai monggoc kememina ihai wanac naroang mongngo mefic-nunuec. Naroang ye yafingagoc kecma ngicngac yeneac kpefingdede kefec. Ifi amma ngic ming-ingfora hiedzotoa kirecgeyemmekefec.\*

<sup>17</sup> Anu yennoc meficnunuma Pauro nga neni modacnunuma kpacma arohoec, “Ngic yomocngo Anutu Engenatoa, yeac enac tofoc tofoho nga kopocsicac ebicfunac mesi mesi amma komoc kpegecdeac sing mong derecgenemmedacgec ngeni sing imohai komoc kpegecde.”

<sup>18</sup> Faka imoc wenacsoc anemmekefu Paurongo imocac modzea tiu sisirema dzigene yafing yofi edeec, “Ni Yesu Kristo yeac kpacfu demekiri amma edeguba, ge ngac hereunac erema kenna.” Ifi deu ye imohaingoc erema kenec.

---

\* **16:16:** Ngicngo bereckasi bummeandimbe isoc naroang ifi bum-megec. Naso imohai yenearu faka ifia feec.

<sup>19</sup> Kenu ngac mingingfora yeni hiedzongina fin-gecyemmeande, imoc kpac anu negemma Pauro nga Sira mendangyuruma kpedziyuruma yoaclu faiyurugecdeac kia yeneac amasobennu kenggec.

<sup>20</sup> Kemma kia yenearu faiyuruma yofi degec, “Yeri yudangicngo amaninau dzomu meficgema tacyacnina memangedape.

<sup>21</sup> Amma faka goa furia romangic nenaoc menideac kpaeyoac dedea fede, imocnoc mema modacdacnideac edenunudape.”

<sup>22</sup> Ifi degec ngichabutoango uba mocgu amma herebu negengyecmegec. Negengyecmegec kiango deu ngakpingira kucbiric hesigec. Hesima dzikacngo yurugec.

<sup>23</sup> Dzikacngo homac kperec merecgeyuruma witicamau faiyuruma garengngo nagu seria heima gombunga yombong garengyuruudeac edegec.

<sup>24</sup> Yoac seria ifia edegecac amma ye witicama mana ungguruha monnu faiyuruma haningira ic hendzic hendzirau faiu kindanggeu feoc.

<sup>25</sup> Tofocnac dzongiau Pauro nga Sira yeri Anutu yegec nunumu ammioc. Ammioc witicngic goango kedzac kpema negengyecmegec.

<sup>26</sup> Negengyecmemagec, imohaingoc usoctoa kuhagoc meu witicama kpemindzaheu naguya bic anggedarec amma ngic sasawa witicngina fotokedarec.

<sup>27</sup> Anu witicama garengngo gauunac kpidohoma yacma nagu anggema nandaru hemma, yofi negenec, “Witicngic woradau.” ifi negemma wasaibeanga taima ewehomebeso anu



28 Paurongo kungengnoc kpacma deec, “Ge sebiga mi kpena, neni hafoangoc tacdimbe.”

29 Ifi deu gareng ye arengfora deu kifa migec ama manau emma dzonong fede fede amma Pauro nga Sira yereac haniu makpema feec.

30 Amma yacma ama manaunac hesicyuru mama kpesiyecmeec, “Ngickunenghocna, ni dafi amma komoc kpebade?”

31 Ifi deu yereng yofi edeoc, “Ge nga arengfocga ngeni Kebu Yesu Kristo negensinggegec yeng ebicfunac mesingunuu komoc kpegecde.”

32 Ifi dema ye nga arengfora Kebuac yoac edeyunuoc.

33 Edeyunuec gareng ye yacma tofocnac imohaingoc amau emma kubecngira dzuacsangohe ayecmema deu yengena nga arengfora doku nadzicgec.

34 Nadzicgec wisickeu yengena ama manau faiyuruma deu yaka gombunga mengerema yemecgec neoc. Anu ye nga arengfora yeni Anutuac ngic anggecac ubangina ngereeu sogaiגע.

35 Ama wereckenu kia yeneng witicama gareng ngic yohockang yungecyuruudeac keracnatang sueyunugec.

36 Sueyunugec garengngo yoac imoc negemma Pauro yofi edeoc, “Ni fainguruba kenecdeac kia yeneng yoac faigec hade. Imocac ngeri mama kemma ruaegoc kecbesera.”

37 Ifi deu Paurongo yofi edeoc, “Neri romangic arennu torokpema kecde, yeni hanianira mi negendacma ngic kicfu eng dzikacngo nuruma witicamau fainurugec. Nga yoc waic waic suenuruge-

cac negendae, imoc naric kpac. Yeni yenaoc hama hesicnurugec kendede.”

<sup>38</sup> Anu Paurongo yoac ifi deu keracnatang yeni dzigene kemma kia yoac yofi edeyunugec, “Ngic yeri romangic arenunacngo kecdape.” Ifi degec yeni siduc imoc negemma damuyunuu kengec amma

<sup>39</sup> ngihoc yerearu hama demembanang ayecmema witicamaunac hesicyuru mama amangina wama keneceac edeyurugec.

<sup>40</sup> Ifi edeyurugec yeri witicamaunac mama Ridia yeac amau emma Yesuac habu yenemma demeseri ayemmema kenoc.

## 17

<sup>1</sup> Pauro nga Sira yeri Amfipori nga Aporonia taong ferecgema Tesaronike taonnu kenoc. Nga ihai yudangic yeneac kpekpeturang ama mong tarec.

<sup>2</sup> Nga Paurongo angande, ifi amma kpekpeturang amanginau emma sabata naso harebec yenigoc Anutuac yoac denegeng anggec.

<sup>3</sup> Ifi amma yoac yofi dema mitikibiu yoac edzacyunuma deireckeyemmeec, “Messiango kpendzeng kpekecma homema monggoc gborima yarude, imoc mitikibiu dedea fede. Amma Yesu yennoc Messia, imoc dekperagikecduae.”

<sup>4</sup> Ye ifi seria deireckeyemmeu yudangic goango ireckema Pauro nga Sira, yerearu kpeketahegec. Nga grikgic Anutu eweheimima kecandae nga ngac kuneng yeni homacngo yerearu torokpegec.

<sup>5</sup> Anu ngic homacngo siduc gombang negenggec yudangic yeneng keracmangang

ayemmema kpedzaroc sobennu kemma yarengic kpcyunugec. Kpcyunuma taonnu dzomugerec mefigema Yasonggac amau Pauro nga Sira taroc, imohai kpedzucnedacgec. Kpedzucnedacma ngihoc meyuruma ngic yeneac botucfu faiyurubesonga degec.

<sup>6</sup> Dema hofocyuruma Yasong nga Yesuac habuunac goa meyunuma amaac enarameme yeneac kicfu kpedziyunuma kenggec. Imoc yofi dema aro aro kenggec, “Bangeha bangeha dzomugerec mefigema ngicuba miacyemmeandae, ngic imongonoc nenearu ifingoc hadau.

<sup>7</sup> Haec Yasongngo ama heiyemeru tacdape. Yeri Ngictau Sisaac dedeseriyoac kpema ngictau furia mong kpara Yesu, ye kpanggema dedape.”

<sup>8</sup> Yeni yoac ifi dema amangic nga enara wosong-ina megec.

<sup>9</sup> Ifi anu gareng yeni Yasong nga tosofora ayemmegec sebingina kaso kpema hiedzo faigec wayunugec kenggec.

<sup>10</sup> Ama toforeu Yesuac habu yeneng imohain-goc Pauro nga Sira Berea taonnu sueyurugec kenoc. Kemma ihai yudangic yeneac kpekpetu-rang amau emma siduc gombung deoc.

<sup>11</sup> Deec taong imocac yudangic yeni fakangina nga angammemengina kpacgoc nga Tesaronike yeneac faka isoc kpahac, imocac enacyoac ubae-fac hafoangoc negemma hoanggegec. Amma yoacngira ikoha me fora dema wenaha wenaha mitikibi osoma deusu anggec.

<sup>12</sup> Ifiac amma yudangic yenearunac homacngo

Yesu negensinggegec amma griknngic nga griknngac kuneng homacngo yerearu torokpegec.

<sup>13</sup> Torokpegec Paurongo Berea taonnu Anutuac yoac dekperagi siduc imocngo Tesaronike kenu yudangic yeneng negenggec. Negemma Berea hama habutoa imoc demanganema herengina miacgec.

<sup>14</sup> Ifi anggec Yesuac habu yeneng imohaingoc Pauro kondunnu suegec kemeec. Nga Sira nga Timoteo yeri ihaingoc kefoc.

<sup>15</sup> Anu ngic yeneng Pauro hesicke kengkecma Ateng taonnu faigec. Faigec yeng Sira nga Timoteo bic haecdeac edeyunuu ngic yeni dzigenegec.

<sup>16</sup> Pauro ye Ateng taonnu yereac tomai kefec. Nga nemuonga wakemangoc tackenggec ye imoc hemma ubahodung kuneng negenec.

<sup>17</sup> Amma ye yudangic yeneac kpekpeturang amau emma yudangic yenang nga griknngic goa yudangic yenearu torokpema kecgec, yeni yena-hafoc mitiac denegeng anggec. Amma ye ifingoc wenaha wenaha kpedzaroc sobennu kemma ngic tacgec, yenigoc miti denegeng anggec.

<sup>18</sup> Anu taong imohai kekecac hania negen negengngic kecgec, kpacngina epikuengic nga stoikengic. Ngic imoc yeneng Paurogoc yoac demereng anggec goango Pauroac yofi degec, “Ngc imoc yennoc yadi yadima yoac debeso ande, imoc mi negendimbe.” ifi degec toseango yofi degec, “Ye nemu furiaac dedekperagi ngic.” Paurongo Yesuac siduc nga homecfnac yacyac, yoac imoc deecac yeni ifi degec.

<sup>19</sup> Ifi dema sobengtoa mong kpara Areopage ihai

hesicke emma degec,\* “Ge yoc furia denec, imoc naric edenunubesena.

<sup>20</sup>Yoc imoc kedzacnina furia, imocac ge haniagoc dena negembeso anemmede.”

<sup>21</sup>Ateng ngic kuric nga ama mingina sasawa, yeni yoacsiduc furia negemma yoc imocsac denegeng amma siduc homac angkegcec.

<sup>22</sup>Ifi anu Pauro ye Areopage tutumang botucfu namma ngic yofi edeyunuec, “Ateng ngic, ni wiac sasawa hemma haniangina yofi hentegecd-uae, ngeni nemu hania hania homac eweheyem-mema yeneac faka hania hania mekecdae.

<sup>23</sup>Ni taongnginau kengha amma nemuongafocngina yenengkecma arata monnu kibi yofi oho ohoya feu henai, ‘Nemu mi hennegeng angana, yeac arata.’ Nga nemu imoc mi negemma eweheimiandae, yeac hania dekperagingemmeba neggcec.

<sup>24</sup>Anutu yennoc bangectoa bangec nga wiac sasawa ihai fede, imoc meficgema witiau wiac sasawa faidarec, yeng bangec nga kurumeng imocac mingina kecede. Ye womong ngic maringo memea, imohai tacyac mi angkecede.

<sup>25</sup>Amma wiac mong hoforu ngicngo ua mema meficgeminade, imoc mi fede, kpac. Ye yenge-naoc kecec nga asu amma wiac sasawa ngic yem-mekecede.

<sup>26</sup>Amma ngic mocgu meficgema deu yearunac ngic bangeha bangeha nga habuya habuya fin-gesaha kecgcedec deec. Amma naso nga kpete,

---

\* **17:19:** Areopage bangec ihai kpekpeturang ama mong feec. Yeni ihai kpeturanggema yoc hania hania denegeng angkegcec.

imoc yengngoc deyemmeec.

<sup>27</sup> Nga ngic yeni yenaoc ubanginango Kebu yengena hofocma meficgeandae, ye imoc negensima ifi anec. Foracngoc, ye hereau kpac, ye ngic nenang botucfu kecde.

<sup>28</sup> Nga yennoc kekecninaac hania, nenang yeac kucfu kecma angammeme angkecdimbe. Amma ngenaeac negen negengngic goango yofinoc degec, 'Nenang Anutuarunac fingering.'

<sup>29</sup> Anu nenang Anutuarunac, imocac amma ngic yeni ubau negemma gol me siriwa me hocngo marikibi meandae, Anutungo ifi isoc ande, imoc mi negensibisia. Anutu ye kuctoa mingina.

<sup>30</sup> Ngeni warac wiac imoc mi negentegecgecac Anutungo hemma imocac yoara mi deec. Yaguc ine bangeha bangeha ngicngac sasawa ubangina dzigeneudeac demeseri ayemmekecde.

<sup>31</sup> Yeng bicngoc naso mong deec, imoc fede. Naso imohai bangeha bangeha ngicngac hanianina desima turunga dindingac merennemmeude. Amma ngic mong ye ua imocnoc meudeac demiec, ye ngic imoc edzacnunuudeac homecfunac megboriu yarec."

<sup>32</sup> Anu Pauro ye homecfunac yacyac, imocac yocac deu goango demembaic ammigeac nga goango degec, "Yocac imoc naso monnu dena monggoc negembisina."

<sup>33</sup> Ifi degec Paurongo wayunuma kenec.

<sup>34</sup> Anu ngic goango ine Pauroaru kpeketahema Yesu negensinggegec. Imoc yenearunac desi desi ngickuneng mong kpara Dionisio, ye Areopageac memba mong nga ngac mong kpara Damari,

amma ngicngac goa.

## 18

<sup>1</sup> Paurongo uaya mesima Ateng wama Korinti taonnu kenec.

<sup>2</sup> Ihai yudangic mong meficgeec kpara Akpira, ye Ponto bangecfu fingerec. Amma ye enema Prisika yegoc Itaria bangecfu kecmaec ngic-tau Sisa Kraudiongo yudangicngac Roma taonnu kecgec, yeneac dedeseriyoac dema sueyunuu kendagec. Imocac yeri Roma wama Korinti taonnu gbori gbori hama kefoc. Anu Paurongo yerearu kenec.

<sup>3</sup> Pauro ye seriamama memengic nga Akpira ye ua imocngoc mekefecac ye ameau tacyac amma meficgeu yerahafoc hiedzo memeac ua imoc mekefoc.

<sup>4</sup> Mekecma Paurongo sabata tatac nasosoc yudangic yeneac kpekpeturang amau emma yudangic nga grikgic denegeng ammagec yoc deireckeyemmec.

<sup>5</sup> Anu Sira nga Timoteo yeri Makedonia bangec-funac haec Paurongo ua goa wama siduc gombung dedeac hombananga kefec. Amma yudangic yoc deireckeyemmekefec, imoc yofi, “Yesu ye Messianoc.”

<sup>6</sup> Ifi ayemmu yeni yoara surema deendema ammigec yeng fakangina wama wambaya kpeihaiu yube mau yofi edeyunuec, “Ngeneac sacngo ngenang orucfu habeso. Nga kopocsicnginaac turunga neac mi anude, imoc ngenang anude. Imocac yaguc wangunuma bangec monnunac ngicngac, yenearu kembade.”

<sup>7</sup> Paurongo ifi dema yuda yeneac kpekpeturang ama wama ngic mong kpara Titio Yusto, yeac amau emma tacyac anec. Ngic imoc ye Anutu eweheimima kefec nga amea imoc yudangic yeneac kpekpeturang ama tegiau tarec.

<sup>8</sup> Nga yudangic yeneac kpekpeturang amaac gareng kpara Krispo, ye nga arengfora yeni Yesu negensinggegec. Nga Korinti ngicngac homacngo Kebu negensinggema mitidoku nadzicgec.

<sup>9</sup> Anu Tofocnac monnu Kebungo Pauro ongau yoac yofi edeec, “Ni nanggegubade, imocac amma kengec amma enackidzic mi ambesena, ge serima kecma enacyoacna debesena.

<sup>10</sup> Neac ngichabutoa taong yomohai kecdaec ngic yeneng gumeme mi anggecde.”

<sup>11</sup> Ifi edeu Paurongo kifa mocgu nga noboha ihai tacma Anutuac yoac ngicngac edekpou ayem-meec.

<sup>12</sup> Gariong ye Akaia bangecfu kiatoa kecmanu yudangic yeni uba mocgu amma Pauro ngaba ammima yoacfu mekenggec.

<sup>13</sup> Mekemma kiaaru nesunggema yofi edegec, “Ngc yomoc ye dedeseriyoacnina kpeande. Ye sing mong tima Anutu eweheimigecdeac ngic fenggeyunuande.”

<sup>14</sup> Edegec Paurongo enacefac amma yoac debeso ammanu Gariongngo yudangic yofi edeyunuec, “O yudangic, ngic ye kopocsic ebiria meficgebac dede yoacngina naric negembai.

<sup>15</sup> Nga ngeni ine ngenang edekpouyoac nga kpac hania hania amma singngina imocac yoacngina engemmama andeac ngenaoc desibisia.



Yoaç ifia neng naric mi desibade, imoc neac ua kpahac.”

<sup>16</sup> Ifi dema yoacfunac kisangyunuu magec.

<sup>17</sup> Mama yeni uba mocgu amma kpekpeturang ama imocac gareng Sostene kiaac kicfu kpegec kiango imoc hemma yohoc bahoc anec.

<sup>18</sup> Paurongo Korinti kecma Yesuac habu dekpemac ayemmema Siria bangecfu kenudeac Kengkereai taonnu kemema wageu enec. Amma Prisika nga Akpira yerigoc yenahafoc kenggec. Kemma ye Anutugoc dedeseri deecac Kengkereai ihai orucdzoea merecgema wedzerec.

<sup>19</sup> Yeni Efeso taonnu sikema Paurongo Akpira nga Prisika wayuruma yudangic yeneac kpekpeturang amau emma yenigoc Anutuac enacyoaç denegeng anggec.

<sup>20</sup> Amma yudangic yenigoc kefudeac desambic ammigec ye imoc wama yenigoc yoac yofi dedzege anec.

<sup>21</sup> “Anutungo negennenude isoc ni ngenearu monggoc dzigenebade.” ifi dema Efeso taong wama wageu emma kenec.

<sup>22</sup> Kengkecma Kaisarea sikema kpebung yenearu emma yenigoc yoac yoac amma Antiokia kemeeç.

<sup>23</sup> Paurongo Antiokia imohai naso goau kefec. Kecma taong imoc wama Garatia nga Firigia bangeç yerecgema Yesuac habu demeseri ayemmema kenec.

<sup>24</sup> Naso imohai Efeso taonnu yudangic monghaec, kpara Aporo. Ye Aresandria taonnu fingecma kibiamatoa mesima mitikibiu yoac oho ohoya fec, imocac hania negentegecdarec.

25 Ye Kebuac enacyoac kpoumigece negenece. Anu ye Yohaneace dokunadzice, imocac sirihasece negenece. Nga ye Yesuace sing gerece gerehagoc tongganangngoc deece.\*

26 Ye yudangice yeneace kpekpeturang amau siduce gombunge kengeha kpac edeyunuece. Amma ihai siduce gombunge deu Prisika nga Akpira yeri yoara negemma hoanggema Anutuace sing gboria tongganang deireckemioc.

27 Nga Aporo ye Akaia bangecfu kembeso deu Yesuace habu yeni demeseri ammima Yesuace kpebung edi kegece, yeneace kibi yofi ohogec, “Ngice yomoc ye ngenearu hau ngeneng ama heimibisia.” ifi ohomigece mekengkecma ihai sikeece. Sikeu Anutungo ngicngace danggunuha yemmeu Yesu negensingkegece, yenearu kemma homace meficyunukefec.

28 Ye didiu yombong yoace kucgoc yudangice dedzameyunuma yofi dekperagiece, “Yesu yennoc Messia.” Ye mitikibigoc yoace imoc dema edzacyunuu ubangina kuha maec.

## 19

1 Aporo ye Korinti taonnu kecmamu Paurongo sifecfusing ferecece kengkecma Efeso sikema Yesuace habu goa meficyunuma

2 kpesiyemmece, “Ngeni Yesu negensinggema Tiri Asugoc anggece me kpac?” ifi deu yeneng

---

\* **18:25:** Ngicngace yeni Yesuace enace tofoc tofoho anggecedece Anutu Manggace nga Medace amma Tiri Asu yeneace kpacfu dokunadzice monggoc ambisia. Yohaneace dokunadzice imoc soha mi anec, imocace dedea, imoc mi negentegerece.

degec, “Kpac, Tiri Asu kecde, siduc ifia mong mi negening.”

<sup>3</sup> Ifi degec monggoc kpesiyemmeec, “Anu ngeni noc mitidoku nadzicgec?” deu yofi degec, “Neni Yohaneac mitidoku nadziring.”

<sup>4</sup> Ifi degec Paurongo yofi edeyunuec, “Yohanengo ngic ubangina dzigeneudeac doku nadzicyemmema yofi edeyunuec, ‘Ngadenau hama kecde, ngeni ye negensinggebisia.’ ye yoac imoc Yesuac negemma deec.”

<sup>5</sup> Ngic yeni yoac imoc negemma Kebu Yesuac kpacfu mitidoku nadzicgec.

<sup>6</sup> Mitidoku nadzicgec Paurongo maria sebinginau faiu Tiri Asungo yenearu maec. Mama ubangina wakeu yeni nedzarangyoac nga profeteyoac degec.

<sup>7</sup> Ngic ifi anggec, yeneac kpetengina 12 isoc anec.

<sup>8</sup> Paurongo yudangic yeneac kpekpeturang amau emma kengeha kpac kecma afo harebec siduc gombang dekperagiyemmekefec. Amma ye Anutuac eucererenggac hania yenigoc demereng angemema defengge ayemmeec.

<sup>9</sup> Ifi anu ngic goa yeni ubaseri amma Yesuac sing gombang ngadehema ngicngac habutoa yeneac kicfu imoc demanganegec Paurongo wayunuec. Wayunuma Yesuac habu kpedzucyunuma wenac-soc ngic mong kpara Tirano, yeac kpoukpou amau siduc gombang dekpou ayemmekefec.

<sup>10</sup> Ye kifa yohockang ifi kecmanu Asia bangectoau yudangic nga griknigic ifingoc Kebuac yoac negendacgec.

<sup>11</sup> Nga Anutungo Pauro nonggo tacmimanu faka kiwa morora kuhagoc meec.

<sup>12</sup> Paurongo uakporuc nga keremmeme mekefec, ngicngac yeni imoc mema hafeigoc yenearu mekenggec, yeneng imoc kpeserema ngereegec nga asu mangana herenginaunac erema woragec.

<sup>13</sup> Yudangic goa bangec yerecgema asu mangana yunukporac anggec, yenearunac ngic goango ngicngac asu manganagoc yeneac witiu Yesuac kpac kpacma tobanggema ua yofi mema degec, “Yesu kpacsiduha Paurongo dekperagiande, ge ngic yeac kpacfu worabesena.”

<sup>14</sup> Amma yudangic mong kpara Skewa, ye womong gareng enara kefec nga yeac medacfora 7 yeni ifinoc anggec.

<sup>15</sup> Ifi amma degec asumanganango yoac yofi merengyemmeec, “Yesu negenduae amma Pauro ifingoc negenduae. Anu ngeni merac?”

<sup>16</sup> Ifi dema ngic asu manganagocngo kucgoc yacma wasai mema medac sasawa yunudacma ngakpingina mesuc kpesuc mema sebingina mercegeu yeni sac nadzicma senggang yacma amaunac mama woragec.

<sup>17</sup> Anu Efeso taonnu yudangic nga grikgic yeni imocac siduc negendacma kucngina mau dzonong fede fede anggec. Ifi amma Kebu Yesu afehema dengeregec.

<sup>18</sup> Dengerema ngicngac Yesu negensinggegec, yenearunac homacngo sikema angammemengina mangana angkecgec, imoc nonongkac deficgedacgec.

<sup>19</sup> Deficgegec ngicngac homacngo warac bangecac hadehadegoc faka megec, yeni kibingina

kpeturanggema ngic yeneac kicfu faigec gerecfu dzeec.\* Kpeturanggema faigec dzeec, kibi imoc ngic 10 yeneng kifa 16 kampani ua mema ua bummegecde, dzo kpetea imocacsoc anec.

<sup>20</sup> Nga yeni ifi anggec Kebuac yoacsiducngo kucgoc fingectegecma noboc noboc sokoma kenec.

<sup>21</sup> Paurongo mising ua imoc mesidacma yofi deec, “Asungo ubanau negen negeng nendeac Makedonia nga Akaia bangec ferecgema Yerusarennu kemma tacba wisickeu Roma taonnu kembesare.”

<sup>22</sup> Ifi dema memefihora Timoteo nga Erasto sueyuruu Makedonia bangecfu waraima kenoc. Nga yengena ine Asia bangecfu monggoc kapia torokpema kefec.

<sup>23</sup> Naso imohai Efeso taonnu Yesuac yoacsiducac amma kpeborongtoa fingerec.

<sup>24</sup> Imoc yofi: Siritwango marikibimemengic mong kefec kpara Demetrio, yeng Atemis nemu womonggac ongea kaptic kaptic siritwango meu enu ngic yeni bummekecgec. Bummegec ye nga ua ngic tosofora hiedzo homac kirecgeyemkefec.

<sup>25</sup> Demetriongo ua ngic tosofora nga marikibimemengic sasawa kpedzucyunuma yofi edeyunuec, “Ngicwiac, ngeni uanina imocngo dzofinac meficgenemmeande, imoc negendae.

<sup>26</sup> Nga ngic mong hama kecde kpara Pauro, yeac hania negendae. Ye Efeso amaunac nga Asia bangec goaunac ngic noc efea fenggeyunuma

---

\* **19:19:** Drakma 50 tauseng nande nga drakma mocgu, imoc uameme mocguac uabung.

uba mesufu ayemmema yofi edeyunuande, ‘Nemuonga ngicmaringo memea, imoc wiac fora kpac-hac.’

<sup>27</sup> Yeng ifi anu uanina kuha mabacac nga imocsac kpac. Nemutoanina Atemis yeac womong efaibacac amma Atemis yengena kpacsiduha kuha madacbacac. Anu Asia bangecfunac nga bangec noboc nobocnac ngic yenahafoc eweheimiandae amma siduha dafi kpac anude, imoc obohode.”

<sup>28</sup> Demetrio yeng yoac ifi edeyunuu yeni herebu kuneng negemma arohoma yofi degec, “Efeso yeneac Atemis ye engenatoa!”

<sup>29</sup> Ifi amma ngic homacngo yenearu torokpema taong wakema dzomu gerehagoc meficgebesonga kpekpeturangsobennu yenahafoc nedzima kendagec. Amma Makedonianac ngic yohockang Pauro modaroc, kpacngira Gaio nga Aristako, yeri meyuruma kpedziyuru kenggec.

<sup>30</sup> Nga Paurongo ifi negemma ngic kpekpeturannu kembeso deu Yesuac habu yeneng segeregec.

<sup>31</sup> Amma prowinsiac ngickuneng goa Pauroac toso kecgec, yeneng ifingoc kpekpeturang sobennu mi kenudeac dederacyoac yearu faigec kenec.

<sup>32</sup> Nga kpekpeturang ihai ngicngac yeneng yoa-corong homac anggec yoac sufudarec. Sufudaru goatoango “Hania damocac yei hama nandimbe?” ifi dema obohogec.

<sup>33</sup> Obohoma nammagec yudangic tosongina mong kpara Aresande, ye ngichabutoa botucnginau nammanu deede ammigec yoac dzaeu

emma yoac demendzic anudeac ngic maribarac kpouyemmeec.

<sup>34</sup> Enu ngic yeneng ye yudangic, ifi hentegecma yenhafoc aua yohockang ferahema arohoma yofi degec, “Efeso yeneac Atemis ye engenatoa.”

<sup>35</sup> Ifi angkecmagec Efeso taonggac kibi oho ohongicngo hama yofi edeyunuec, “Ngeni waickema tacdagec! Efeso ngicngac ngeni negenggec, Atemistoaninaac ongea nga womonga henggareng angkecdimbe. Amma yeac onga sawaunac maec, imoc bangectoa bangecac ngicngac sasawango negendacdae.

<sup>36</sup> Imocac ngeni ubangina mau faka sicsauc mi ambisia.

<sup>37</sup> Anu ngic yohockang meyuru hadae, yeri nemuninaac womonnunac wiac mong hamangec mi medaoc me Atemis mi emmidaoc.

<sup>38</sup> Demetrio nga ua ngic ogofora yeni ngic monggac negenggec manganedeu ye yoacfu faibisia. Anu yoacfu faifaia, imocac naso fede amma kia kecdae. Ebicngina imoc yenearu mekemma yoacfu faiemebisia.

<sup>39</sup> Me ngenang yoac mong fedeu enarameme yeneac kpekpedzucfu mekenggec demengere ambisia.

<sup>40</sup> Ebicnina yofi fede, ngeni yaguc dzomugerec anggecac amma yoacfu fainunubauac. Dzomugerec meficgegec hania kpacfu ngickuneng hagecde isoc yoacac obohogecde.”

<sup>41</sup> Kibi oho ohongicngo yoac ifi dema sueyunuu kenggec.

## 20

<sup>1</sup> Yoac orongtoa kpac anu Paurongo Yesuac habu heitaiyunuu hagec. Hagec dederecge ayamema meseriyunuma maringina mema Makedonia bangecfu kenec.

<sup>2</sup> Kemma bangec imoc ferecgema Yesuac habu tackenggec, yeneac negen negeng midima demeseriyoac homac ayemmekenec. Kengkecma Grik bangecfu kemma

<sup>3</sup> ihai afo harebec kefec. Kecma kondunnu kemema wageusing Siria bangecfu kembeso deu yudangic yeneng ngabayoac dema dekiric anggec ye Makedonia bangecfusing dzigeneudeac negemma kenec.

<sup>4</sup> Anu ngic yofigucngo sinnu Pauro modackenggec: Piroac medac Sopate Bereanac nga Aristako nga Sekundo yeri Tesaronikenac, amma Gaio Derebenac nga Timoteo nga Tikiko amma Tirofimo, yeri Asia bangec dumbengaunac.\*

<sup>5</sup> Ngic imoc yeneng waraima Troa taonnu tomainina kecgec.

<sup>6</sup> Tomainina kecmagec neni ine ic sogong yisya kpac nene, imocac tacnegennaso wisickeu Firipinac wage meing. Wage mema wenac 5 kengkecma Troa taonnu kemma ihai uameme 7 kefing.

<sup>7</sup> Anu neni sondau maung nenideac kpedzuc-neni Paurongo wereckengau kenudeac negemma Anutuac enacyoac edeyunuma kefec.

<sup>8</sup> Edeyunukecmanu tofocnac dzongineu amamana wi taring, imohai kifa homac dzeec.

---

\* **20:4:** Rukango kibi yomoc ohoec, yeng Paurogoc Makedonia bangecfu earoc.



<sup>9</sup> Anu Paurongo yoacherec deu medac mong kpara Eutiko, ye gauac turic takecma nigeckpeu titing houhouyau ferecgema bangecfu kemema kpema feec. Femanu miacgec homemea anec. Ye ama mana harebec witiau wi, ihacnac makpeec.

<sup>10</sup> Makpeu Paurongo kemema medac witiau fo-forahema fema ngicngac yofi edeyunuec, “Medac ye gbori fedecac ngeni kiacma mi ewehomegec.”

<sup>11</sup> Ifi dema ama manau emma maung gume-cyunuma yenigoc yaka neec. Neu wisickeu yenigoc mitiac denegeng amma kecmanu ama wereckenu wayunuma kenec.

<sup>12</sup> Ngic yeni ine medac gboriu ameau hes-icke kemma wosongina nomanu ubangerec nenggec.

<sup>13</sup> Anu goa neneng Paurogoc Aso taonnu eac-nideac suenunuu kporuc wageu emma kenni yengena ine hanising haec, yeng areng ifi faiec.

<sup>14</sup> Hama ihai meficnunuma wageu ereu neni nenahafoc kengkecma Mitirene taonnu kensikeing.

<sup>15</sup> Ihanac kengkecma wereckenu dzintau Kio nucfu kemma kondung ferecgema mitiwocfu Samo nucfu kening. Ihanac seikponoc Mirete taonnu kensikeing.

<sup>16</sup> Paurongo pentekos tatak nasou Yerusarennu bic tarudeac deec. Nga neni Asia bangec dumb-engau tacmina naso segebacac Efeso eng ferecge kengkecma Mirete sikeec.

<sup>17</sup> Sikema ihai namma Efeso yoc faiu kenu kpebung enarafocngina hagec.

<sup>18</sup> Hagec Paurongo yoc yofi edeyunuec, “Ni Asia bangecfu hama ngenearu uana dafi hana-

hema mekefai, imoc haniaunacngoc negenghaandae.

<sup>19</sup> Ni memaemeyombonggema Kebuac enac tofoc tofoho kecbare yudangic yeneng ngaba dekiric anemmagec kiacubahodungoc nga faitobannu kefai.

<sup>20</sup> Anu yoac desahengemmema mong mi medadanggeba feec. Nga ngeni ngereegecdeac yoac homac ngicngac amasobengnginau nga amea amea kpoungemmekenai.

<sup>21</sup> Ni bic seria kpoungemmeba yudangic nga grikgic ubamereng amma Anutuaru kemma Kebunina Yesu negensinggegecdeac ubana kuha mi mamanu dekperagingemmekefai.

<sup>22</sup> Anu yoc Asungo ubanau derecgenendeac Yerusarennu kenduae. Kamba faka mong dafia ihai fingechnude, imoc mi negenghomeduae.

<sup>23</sup> Ni yofisac negenduae, witicama nga kpendzengngo edi tomaina fede, imoc amasoc haba Tiri Asungo deficgenengkecde.

<sup>24</sup> Deficgenenu ni ine neanna kekecnaac negemba buma engena mi angande. Ni eng sing derecgenenna timodacbadeac anengande. Nga Anutu danggunuhaac siduc gombung desahebadeac Kebu Yesungo denenec, ua imoc mekecma mesibadeac ubana ande.

<sup>25</sup> Amma yomoc deba negenggec, ni Kebuac eucererenggac yoacsiduc ngicngac botucnginau dekperagingemmeba negengandae, ngeneng ngade kecma kicna monggoc mi henggecde.

<sup>26-27</sup> Anutungo yoac sasawa derecgenemmeande, imoc hafoangoc edengunuai, imohacnac wiac mong mi waba feec. Imocac yaguc kedzac

hesari angemmeba negenggec: mongngo nge-  
nearunac sufuudeu kopocsihaac turunga nearu  
mi feude.

<sup>28</sup> Ngeni ngenang garengemema Anutuac  
kpebung gombunga garengyunudacbisia. Ye  
yengena sacngo bummengunuec nga Tiri  
Asungo kpebung yeneac enara kecceac  
meisingngunuecac ngeni ramagareng isoc  
Kebuac kpebungfora yenenggareng ambisia.

<sup>29</sup> Ni yofi negenduae: Ni wangunuba katekasi  
enaragocngo ngenearu hama rama memanga-  
nengunubeso anggecde.

<sup>30</sup> Amma ngenang botucfunac ngic fingecma  
yoac fora denggbaringgema Yesuac habu goa utac  
mengunugecdeac anggecde.

<sup>31</sup> Ngeni imocac negentegecma efaima  
kecbisia. Ni kifa harebec hadzing tofocnac  
kiacubamanganggac nonosaeng tembuc tembuc  
dema gorongina kpekefai, imoc wagec mi maec,  
imocac ngeni uana imoc negensima kecbisia.

<sup>32</sup> Ni Kebuac mariu faingunuduae amma yeac  
danggunucyoac gombungau kpedzucngunuma  
faingunuduae. Imocngo kuc megecdeac  
meseringunuu ngeni ngicngac kpetiac kekec  
megec kecdae, yenigoc ngenahafoc maridzoming  
megecde.

<sup>33</sup> Anu ni ngenigoc kecma hiedzoac dewaidzoc  
mi angemmeba

<sup>34</sup> marinango ua meba hiedzo kirecgenemmeu  
neanna nga ngicfocna iwainina bummeing, ngeni  
imoc bic negendae.

<sup>35</sup> Uana sasawa mekefai, imohai yofi  
kpoungemmeai: Ngeni makpekpea mefi-

cyunugecdeac ua kucgoc mebisia. Kebu Yesungo yoc yofi deec, 'Ge ubangerecfu ogoga wiac mong minade, imocac ubangerec buma kuneng gearu fingerude. Nga ubangerecfu ogogango wiac mong genude, imocac ubangerec buma gearu efea fingerude.' yoc imoc mi nigecongubeso."

<sup>36</sup> Paurongo yoc ifi desima yenigoc fafoc heima numuec.

<sup>37</sup> Numuu wisickeu negemma kiachodung kiaru yeni hoanggema titikokoc ammigec.

<sup>38</sup> Ye warac yoc mong yofi edeyunuec, "Ngeni kicmesuna monggoc mi henggede." Imocac yeni ubahodungtoa negemma hesicke kemma wageu faigec emma kenec.

## 21

<sup>1</sup> Neni wayunuma kporucwageu emma Ko nucfu kemma wereckengau Rodo nucfu kemma Patara taonnu sikeing.

<sup>2</sup> Ihai kporucwageu mong Foiniki bangecfu kenudeac efaimanu meficgema ihai emma kening.

<sup>3</sup> Kengkecma Kipiro nuc kanaugeng taru hemma ferahadacma Siria bangectoaugeng kengkefec. Nga wagengo Tiro taonnu sikema finac ihai faiudeac kenec.

<sup>4</sup> Faimanu neni amau emma Yesuac habu meficyunuma yenigoc wenac 7 kefing. Kecmina Asungo meyunuu yeni Pauroac goroyoac dema Yerusarennu mi kenudeac degec.

<sup>5</sup> Anu kekeng nasonina wegeneu ngicngac nambaracfcnginagoc hesicnunugec nenahafoc taong

wama kondung tegiau kemeing. Kemema sangiu fafoc heima numuing.

<sup>6</sup> Numuni wisickeu marimeme amma wageu emmina yeni amau dzigenegec.

<sup>7</sup> Tirounac kengkecma Toremai taonnu sikemina wageu kekeng imoc wisickeec. Wisickeu neni Yesuac habu ihai yugucyunuma wenac mocgu yenigoc taring.

<sup>8</sup> Wereckengau kengkecma Kaisarea sikema Yesuac siducedede Firipo meficgeing. Firipo ye memefic 7 faiyunugec, yeneac botucfunac. Anu neni yeac amaunoc ening.

<sup>9</sup> Ye naroangfora neakpac ngacnaroang kecgec, yeni Anutungo wosoefac ayemmeu profeteyoac dekecgec.

<sup>10</sup> Ihai uameme dafiguc kecmina Yudaia bangecfunac profete mong kpara Agabo, ye nenearu hasikeec.

<sup>11</sup> Hasikema Pauroac fadenga mema imocngo yengena hanimaria dzegema yofi deec, “Tiri Asungo yofi dede, ‘Fadeng yomocac mingina ye Yerusarennu kensikeu yudangic yeni yofinoc ammima bangec monnunac ngicngac, yeneac mariu faigece.’ ”

<sup>12</sup> Yoac ifi deu neni nga amafora neneng Pauro Yerusarennu mi enudeac desegere ammima edeni

<sup>13</sup> yeng yofi deec, “Ngeni homac kiacma wosoumeme mi anenggec. Ni Yerusarennu witicfu embade, imocsac kpahac. Ni ifingoc Kebu Yesuac momoc homebadeacnoc efaiduae.”

<sup>14</sup> Yoac edeni mi negenu wama yofi deing, “Kebu negenec, imoc fingecheso.”

15 Uameme goa wisickeu Yerusarennu ennideac efaiing.

16 Efaini Kaisareanac Yesuac habuunac goa yeneng hesicnunuma ngic mong kpara Manasong, yeac amaunoc fainunugec. Anu Manasonggo Kipiro nucfu fingerec nga waraima ubamereng anec.

17 Anu kengkecma Yerusarennu sikenimohacnac negenengsinggoc tosofocnina yeneng ogo anemmema ubangerec negenggec.

18 Nga wereckengau Paurongo Yakoboac amau hesicnunuu ening. Emma tacmina kpebung yeneac enara yeni hagec.

19 Hadacgec Paurongo maringina meec. Mema Anutungo nonggo tacmimanu bangec monnunac ngicngac, yenearu misingua meu fora fingerec, imocac yoacsiduc sasawa ayemmeec.

20 Paurongo yoacsiduc ayemmeu Anutu afehegec wisickeu Pauro yofi edegec, "Tosonina, ge yudangic tauseng dafiguc ferahema habunoc efeango Yesu negensinggema kecdae. Nga yeni sawango Moseac dedeseriyoac seria mekecandae.

21 Anu geac yoacsiduc yofi hau yeni negengkecdae: Ge yudangic bangec monnu ngicngac, yeneac botucfu kecdae, yeni Moseac yoac wagecdeac amma sabacfocngina yeneac sebi tosangina mi herecgegecdeac deracyunuanec. Amma yudangic fakanina wagecdeac edeyunuanec.

22 Amma ngic yeneng geac ifi negengandaec dafi ambesonga obohode. Ge Yerusarennu hadang, imocac siducnoc negenggecde.

<sup>23</sup> Imocac neni yocac mong edeguni modache-sena. Nenearu ngic 4 kecdae, yeni Anutu-goc dedeseri anggecac orucdzongina mi merec merecge kecdae.

<sup>24</sup> Geng yenearu tahockema faka kpetiac fede, imoc yenigoc modacma hosuc heiheingina bum-mena orucdzongina merecgema wedzecgec. Ge ifi anna gemma geac yofi negenggecde, 'Yoara hau negening, imoc fora kpac. Ye yengenaoc Moseac dedeseriyoac tofohokecde.' Ge ifi anna yudangic Yesu negensinggedae, yeni geac ngaba mi anggecde.

<sup>25</sup> Anu bangec monnunac ngicngacngo Yesu negensinggedae, yeneac warac singyoac deing, imocac yoacsiduc kibi yofisac ohoma bic faiyemme-ing, ngicngac yeni nemunginaac sese dema yang heiyemmegec ngeneng imoc wama mi nebisia. Ngeni yamberec fusia sawagoc mi nebisia amma sac wamaguc mi nebisia. Amma ngeni kaisero faka wama imoc mi ambisia."

<sup>26</sup> Ifi degec Paurongo yocngina negemma ngic 4 yenearu tahockeu wereckengau yenahafoc Anutuac womonnu emma faka kpetiac hanahegec, imocac nasoya wisic wisickea amma sesengina faima hosuc tembuc tembucngina heigecdeac dekperagiyemmegec.

<sup>27</sup> Faka kpetiac imocac uameme 7 wisickebeso ammanu Paurongo Anutuac womonnu emma kecmanu Asia bangecfunac yudangic yeni ye hemma ngic ngaba ammima arohogec habutoa wosongina miaru

<sup>28</sup> Pauro mendanggema arohogec, "Oe Israengic, ngeni hama meficnunugec meni!

Ngic yomocngo bangecsoc kengkecma yudangic nenang nga dedeseriyoacnina amma womonnina, imocac ngaba ambesonga, ngic ifi edeyunukecde. Amma womonninau grikgic hesicyunuma ereu kpetiac amanina yomoc goteng heidae.”\*

<sup>29</sup> Pauro ye Efesonac ngic mong kpara Trofimo yegoc taonnu kengha anec yerenggec, imocac ye womonnu hesickeu yerahafoc endaoc, ifi eng negensima degec.

<sup>30</sup> Imocac amafora yeneng arongina negemma yacma gbindindingema hama kpeturanggedacgec. Kpeturanggemagec ngic goango Pauro mendanggema womonnunac kpedzima magec, imohaingoc nagu heidacgec.

<sup>31</sup> Ngabangic yeneng Pauro mema kpehomebeso ammagec Roma wasaingic yeneac garengtoaaruu yoac yofi kenu negenec, “Yerusarengngic sasawa yeni yenahafocngoc ngaba sicsauc angemedae.”

<sup>32</sup> Yoac ifi negemma imohaingoc wasai engena mamea meemema nedzima habutoa yenearu kemegec. Kemema henggec ngic yeni Pauro kpema kecgec garengtoa nga wasaifora sikegec, yenemma engsac wagec.

<sup>33</sup> Anu wasai garengtoango sikema deu medacfora yeneng Pauro mendanggema seng yohockangngo dzegegec. Dzegegec Pauro ye merac amma noc wiac anec, imocac kpesi kpesi ua meec.

---

\* **21:28:** Anutu womonga gotengagoc hemma ngaba ambacac yeni yoac imoc degec. Bangec monnunac ngic, yeneng ihai naric mi enggec, imoc kpaagoc.



<sup>34</sup> Anu ngic yeni arona aroga anggec kpeboronnu yoac hania negenudeac obohoma deu wasai yeneng Pauro mema yenang uaamau dzi-gene kenggec.

<sup>35</sup> Anu Paurongo tireu embeso anu ngic yeneng yerecgema kucgoc igockegecac wasaingic yeneng Pauro mohockema enggec.

<sup>36</sup> Ifi anggec ngic habutoango modacyunuma aroho aroho kemma yofi degec, “Ngic ye kpeni kpac ambeso!”

<sup>37</sup> Ifi dema Pauro ama manau meembeso amagec, yeng wasai garengtoa kpesimiec, “Ni naric yoac edegubai me?” deu garengngo deec, “Ge grikyoac negennec?”

<sup>38</sup> Warac aigitangic mongngo ngaba meficgeudeac godzungic 4 tauseng wangecyunuu bangec kisiu hocsiragocfu kenggec. Ge ngic imoc me mong?”

<sup>39</sup> Kpesimiu Paurongo yofi edeec, “Ni yudangic yombong amma Kirikia bangecfu Tarso taong tacde, imohacnac. Ge naric negennenna ngicngac yoac kapia edeyunuba.”

<sup>40</sup> Ifi deu negemmiu Pauro ye tireu namma ngicngac maribarac kpouyemmeu yoacngina kpac anu waickema tacgec hebiraio yoacfusing yofi edeyunuec.

## 22

<sup>1</sup> “Kunengfocna nga tosofocna, ni neanna hania edengunuba negenggec.”

<sup>2</sup> Anu Paurongo hebiraio yoacfusing deu negemma ning kpedacgec.

<sup>3</sup> Nga ye tahockema edeyunuec, “Ni yudangic, Kirikia bangecfu Tarso taonnu fingeema imohai kecma yadiai. Kpoukpou Gamarie yeac bageau kecbare yeng kisicfocnina yeneac singyoac sasawa kpounenu negendarai. Amma ngeni yofinenggac faka andae, imoc ifingoc Anutungo negengngereenubeso dema yoac imoc seria yombong mekefai.

<sup>4</sup> Amma ngicngac momoc sing gboria modacgec yunukporac ayemmema witicyunuma witicamau faiyunukecma yunukpebuc ayemmegecdeac deaingoc.

<sup>5</sup> Womong garengtoa nga yudangic gamangtoangina yeneng neac hepuc naric amma hania ifia dekperagibau. Yenennoc kibi mong ohogec, imocac siriha yofi: Ngicngac sing gboriau modacgec ni meficyunuma witicyunuma Yerusarennu meyunu haanduae. Nga turunga yemmegecdeac tosofocngina Damasko kecandae, yenearu mekembadeac nenggec.

<sup>6</sup> Ifi dema sing kengkecma wenac dzongiau isoc Damasko ama mewegenebare, imohaingoc kurumennunac kperagitoango gereagoc mama nerarannuec.

<sup>7</sup> Nerarannuu bangecfu todingge kpe fema yoac mong yofi fingeru negenai, ‘Sauro Sauro, ge nocac nukporac anemma kecannec?’

<sup>8</sup> Ifi negemma yofi deai, ‘Kebu ge merac?’ Deba yofi edenuc, ‘Nukporac angannec, Yesu Nadzaretenc ninoc.’

<sup>9</sup> Ngic nigoc kecgec, yeni kperagitoa henggec, yoac edenuc imoc ine obohogec.

<sup>10</sup> Obohogec neng kpesiai, ‘Kebu, noc wiac

ambadeac denennec.’ deba Kebungo yofi edenuec, ‘Ge yacma Damasko kenna wiac anna dema degecdegena, imoc edegucecde.’

<sup>11</sup> Nga kperagitoango kicnau neraranggeu fiba kundung kpeec. Ifi amba ngicfocna yeneng marinau mema Damasko menu kenggec.

<sup>12</sup> Ihai ngic mong kefec kpara Anania, yeng dedeseriyoac henanggema memodacma kefu yudangic taong imohaingoc kegec, yeni sasawango yeac negenggec ngereec.

<sup>13</sup> Ngic yennoc nearu wegenac hasikema yofi edenuec, ‘Tosona Sauro, ge kicga fitegecna.’ ifi deu ihaingoc kicna fitegecma ye henai.

<sup>14</sup> Ifi dema yoac yofi edenuec, ‘Kisicfocnina yeneac Anutu, yeng uaya mena dema edeedzacgu anu geng Dindingac mingina hemma yeac enacfunac yoac negennadeac meisingguec.

<sup>15</sup> Ge yeac siducedede amma wiac hennegeng annec, siduc imoc bangecsoc ngic edeyunu kembesena.

<sup>16</sup> Negennec, ge naso mi ukuna! Yacma Yesuac kpac kpacna yeac kpacfu mitidoku nadzicma kopocsicga dzuacna.’

<sup>17</sup> Ifi deu Yerusarennu dzigenema Anutuac womonnu emma numuba kicna merecgeu Kebu henai.

<sup>18</sup> Hembra yoac yofi edenuec, ‘Ama yomocac ngicngac yeni geac enacfunac neac siducna negemma wagecde, imocac amma ge Yerusareng wama bic kenna.’

<sup>19</sup> Ifi deu yoac yofi meremmiyai, ‘Kebu, ge negensingguec, ni witicfu meyunuma

kpekpeturangamea amea meyunu emma dzikacngo yunukefai, imoc bic negendae.

<sup>20</sup> Amma siducededega Stefano sacgoc homemea kpegecdeac ngakpingina hesigec garenggebare kpegec negemba ngereec, yeni imoc negendac-dae.'

<sup>21</sup> Ifi deba Kebungo yofi edenuc, 'Kpahac, ni bangec hereau bangec monnunac ngicngac, yenearu sueguba kennadeac ge bic efaima kenna.' "

<sup>22</sup> Ngic yeni kedzac kpemagec, Paurongo yudangic wayunuma bangec monnunac ngicngac, yenearu kenudeac warac Anutungo edeec, yoc imoc edeyunuu yeni seriangoc arohogec, "Ngc ifia imoc kekeha kpac ambeso. Ye kefu naric mi ande."

<sup>23</sup> Ifi dema arohoma ngatangyunuu ngakpingina herea hesima yube figec enu meuku angcec.

<sup>24</sup> Angcec garengtoango deu wasai yeneng Pauo amanginau meengcec. Amma ngic yeni nocac homac arohomic faka negenudeac dzikacngo kpegec kopocsiha deficgeudeac desiyemmec.

<sup>25</sup> Desiyemmu yeni dzikacngo kpegecdeac witicngo mendangge dzegema taigec. Taigec Paurongo enarangina yofi dema kpesimiec, "Ngeni ngic mong romanic yeneac arennu torokpema kecde, ye yocfu mi faifai manganaac areng desima dzikacngo naric kpegecde me? Imoc singyoacngina kpede."

<sup>26</sup> Ifi deu enarainango garengtoaaruu kemma edeec, "Dafi ambesonga? Ngic ye romanic yeneac arennu torokpeec kecde."

<sup>27</sup> Ifi deu garengtoango Pauroaru kemma kpesimiec, “Dena, ge foracngoc romangic arennu torokpema kecnecc me?” deu Paurongo deec, “Imoc fora ni romangic yeneac arennunac.”

<sup>28</sup> Ifi deu yeng deec, “Ni hiedzo homac faiba kirecgenuu romangic anai.” Ifi deu Paurongo deec, “Ni ine fingecc fingeccna romangic yeneac arennu fingerai.”

<sup>29</sup> Ifi deu yeni imohaingoc Pauro faka ammibeso degcc, imoc wagecc. Wasai garengtoa yeng ine yofi negenecc “Pauro ye romangic. Ni ngicc ifia witicfu faidua, imoc naricc kpac!” Ye ifi negemma kengecc kpeec.

<sup>30</sup> Wereckengau wasai garengtoango yudangicc yeni Pauro hania damocacc yoacfu faigcc, imocacc hania yombong negenudeacc womong gareng enara nga yudangicc tutumangtoanginaacc memba deu sasawa kpedzucnegecc. Ammanu Pauro yungeccma hesicce kemema kpedzucnegecc, yeneacc kicfu faiecc.

## 23

<sup>1</sup> Paurongo yudangicc tutumangtoanginaacc memba yenearu serima yoacc yofi edeyunuecc, “Tosofocna, deba negenggecc, Anutuacc kicfu ni kopocsicnaacc negengfagunga kpac kecerema yagucc kecduaengoc.”

<sup>2</sup> Ifi deu womong garengtoa kpara Anania, yeng ngicc Pauro yafinggema nanggecc, yeni yofi dema edeyunuecc, “Ngeni dumbengau kpegecc.”

<sup>3</sup> Ifi deu Paurongo yofi edeccc, “Anutungo guude, ge katapa mangana gbakingo oho ohoya, ifia manau bic dzame dzamea. Ge dedeseriyoacc

modacma yoacna isinggema desinnunadeac ua mebesena. Nga imoc wama nugecdeac serima denec, ifi amma dedeseriyoac fede, imoc ferahanec.”

<sup>4</sup> Ifi deu ngic nanggec, yeneng yofi edegec, “Ge Anutuac womong garengtoa kuha memama yoac ifia mi demina!”

<sup>5</sup> Ifi degec Paurongo yofi deec, “Tosofocna, ye womong garengtoa kecede, imoc mi negemma yoac singau mi dedua. Mitikibiu yofi oho ohoya fede,

‘Ge enaramemefocga mi sowecyunubesena.’”  
(*Makekeng 22:28*)

<sup>6</sup> Anu enarameme goa yeni sadukaiongic nga goa farisaio arenunac ifingo kecgec. Kecmagec Paurongo imoc negemma ubea miacma tutumangtoau yofi edeyunuec, “Tosofocna, ni farisaiongic amma yeneac arenunac fingerai. Nga homecfunac yacyac fingerudeac negensinggema kecma yoac imoc nanggeanduae, imocac yoacfu fainudae.”

<sup>7</sup> Yoac ifi deu farisaiongic nga sadukaiongic yeni yenaocngoc easiemegec tutumangngina tohoec.

<sup>8</sup> Nga sadukaiongic yeni deandae, “Homecfunac yacyac nga angero amma bangecac hadehade nga yafing hania hania, imoc mi fede.” Nga farisaiongic yeneng deandae, “Imoc fora fedacde.”

<sup>9</sup> Amma imocac tutumangnginau orongtoa megec. Mekecma farisaio yeneac habuunac mitiac negen negengngic goa yacma yoac gereagoc yofi degec, “Neni ngic yomocac kopocsic hofocdimbe. Angero me asu mongngo yoac edeecfu neni imocac yoac mong mi debisina.”

10 Dema yoacnginango easiemegec wasai garengtoango Pauro taima merecgebauac kengec kpeu deu wasaingic yeneng kemema Pauro ngic botucnginaunac taimama ua amanginau mekenggec.

11 Mekemma tofocnac imohaingoc Kebungo Pauro fingeemima yofi edeec, “Ge kucga mena, ge yei Yerusarennu neac hepuc amma haniana dekperagiyemmenec, imoc ifingoc Roma taonnu neac hepuc amma haniana dekperagiyemmebe-sena.”

12 Ama wereckenu yudangic goango yoac dedzege amma yenaocngoc dedeseri seria yofi degec, “Nenang nenedoku segekecma Pauro kpehomemaguc nenedoku nebisina.”

13 Ngic yeni uba mocgu amma yoac imoc dedzege anggec, yeneac kpetengina 40 ferahaec.

14 Ngabangic yenennoc womong gareng enara nga yudangic enarafocngina yenearu kemma deficgeyemmema yofi edeyunuget, “Neni nenedoku segekecma Pauro kpehomemaguc nenedoku nenide, yoac imoc deseriding.

15 Imocac ngeni tutumangtoaac memba yenigoc wasai garengtoaaruu yoac yofi faigec kembeso, ‘Ge Pauro neneac tutumannu suena hau yoara monggoc dehomebisina.’ Anu yoacngina negemma ifi anu nenang sinnu sufuma Pauro mema kpehome-nide.”

16 Ifi degec Pauro deuyango yareyoac imoc negemma wasaiamau emma aniha edeec.

17 Edeu Paurongo wasai yeneac enara mong kpacma yofi edeec, “Ge medac yomoc

wasaignengtoaaruu hesicke kenna. Yeng yoac mong edeude.”

<sup>18</sup> Ifi deu ngic yeng medac imoc wasai garengtoaaruu hesicke kemma yofi edeec, “Witicngic Pauro yeng kpacnuma edenuu medac yomoc yoac edeguudeac hesicke haduae.”

<sup>19</sup> Ifi dema edeu garengtoango medac mariauu mema hedzihau meicke kemma tembucngira tacma kpesimiec, “Ge noc yoac mehanec, dena negemba.”

<sup>20</sup> Kpesimiu medacngo yofi edeec, “Yudangic yeni gearu yoac faigec haudeac denegeng andau. Nga geng Pauro tutumangnginau hesicke kenna yeac haniaya seng negenggede, ifi kpesigenggede.

<sup>21</sup> Kpesigemma haniaya seng negenggedeac fenggegugec mi negembesena. Ngic kpetengina 40 ferahede, yeni sinnu sufuma Pauro kpehomegedeac dedeseri seria yofi dedau, ‘Neni nenedoku segekecma Pauro kpehomemaguc yaka nenide.’ Yoac ifi deserima yeni bic efaima geac yoacac tomai kecdae.”

<sup>22</sup> Medac ye yoac ifi deu garengtoango yofi dera-hema sueec, “Ge yoacsiduc imoc hama deficgema edenunec, imoc ngic mong mi edeyunubesena.”

<sup>23</sup> Amma wasai garengtoango wasaingic yeneac enara yohockang kpacyuruma yofi edeyuruec, “Ngeri kemma yofi ambesera, wasaingic 200 yeni haningo sing kekeng nga becosic witiau kekeng 70 amma sangarameme 200, ifigucngo efaima tofocnac 9 kiroc ammanu Kaisarea mekemmbisia.

<sup>24</sup> Amma Pauroac becosic goa meficyunuma sate heiyemmebisia. Anu ngeni ye aikic



garenggema ngictau Feriki, yearu mekembisia.”

<sup>25</sup> Ifi dema ngictauac kibi mong yofi dema ohoec.

<sup>26</sup> “Kraudio Risia neng Ngictau Feriki geac kibi yomoc ohoduae.

Wenacngerec.

<sup>27</sup> Wasaingic yeneng ngic mong mehadae, yudangic yeneng mema kpehomebeso anggec. Anu neng ye romangic yeneac arenunac, yeac ifi negemma wasaingic yenigoc kemma maringinaunac mesiiing.

<sup>28</sup> Mesini yoacfu faigec, imocac hania negemba dema enara tutumangnginau mekenai.

<sup>29</sup> Mekemma singyoacnginaac tohoma kecdaeac amma yoacfu faigec, imoc meficgema yofi negenai, ‘Ye yoacfu faigec, imoc kpehome home me witicamau fai faiac siriha mi ande.’

<sup>30</sup> Hau ngic goa yeni sinnu sufuma Pauro mema kpegecdeac dekiric anggec negemma gearu bic sueba hade. Amma yoacfu faidau, ngic imoc ifingoc sueyunuba gearu hama yoara edegubisia.”

<sup>31</sup> Ifi ohoma yemmeu wasaingic yeni garengnginaac enac tofohoma Pauro tofocnacngoc hesicke kengkecma Antipatri taonnu kenggec.

<sup>32</sup> Wereckengau wasaingic tosea yeni amau dzigenemagec becosicfu tacgec, yeni yenaoc Pauro hesickema Kaisarea kenggec.

<sup>33</sup> Kemma ngictau kibi mima Pauro ifingoc mariaiu faigec.

<sup>34</sup> Faigec ngictaungo kibi osoma Pauro kpesimiec, “Ge Bangecga dahacnac?” deu Paurongo deec, “Ni Kirikia bangectoaunac.”

<sup>35</sup> Ifi deu ngictaungo yofi edeec, “Ge yoacfu faigugec, yeni hama fingecegcegec geac yoac debesonga.” Ye ifi dema Pauro Herodeac amau faima garenggegecdeac edeyunuec.

## 24

<sup>1</sup> Uameme 5 wisickeu womong garengtoa Anania nga yudangic enarafocngina goa amma singyoacac negen negengngic mong kpara Teaturo, yeni Kaisarea amau kemema ngictauaru Pauroac yoac degecdeac fingecegce.

<sup>2</sup> Fingecegce ngictaungo Pauro deu hau Teatur-ongo yeac yoac dema ngictau yofi edeec, “Ngictau gombunnina Feriki, ge gombunga garennununa ruaegoc kecdimbe. Amma geac negen negenggac amma kekecnina heimerenu gombunga kecni

<sup>3</sup> nenearu amasoc nga iwai sasawa ngereema ereec. Imocac geac negenni naric angkecde.

<sup>4</sup> Amma yoac deba uanaso ukubanggac mengisima negen negenninaac yoac weganec edeguba.

<sup>5</sup> Ngic yomocac faka yofi hening, ye deendema anemmekecde, imoc yudangic bangecsoc kecdae, yeni sasawango ngaba sicsauc meficgeyemme-ande amma Nadzarete mitiareng yeneac enarano- noc kecde.

<sup>6</sup> Ye Anutuac womong imoc goteng heibeso anu meing. [Mema dedeserininaac sinnu wiac am- mibeso

<sup>7</sup> ammuna wasaigarengtoa Risia ye medacfora yenahafoc kucgoc hama gereagoc wangecnunuec.

<sup>8</sup> Amma yeac hania degec, ngic imoc yeni gearu hama fingecgecdeac deyemmeec.] Nga neni yeac yoac edegudimbe, imoc geanggaoc dekpesi am-mima yoacfu faidimbe, imocac hania sasawa meireckenade.”

<sup>9</sup> Yoac ifi deu yudangic yeni meficgema yoara nanggegec.

<sup>10</sup> Anu ngictaungo Pauro yoac anudeac wadz-imiye ye yoac yofi meremmiec, “Ge bangec yomohai ngicngac yeneac desidesingic kifa homac kecannec, imoc negensima haniana ubangerecgoc deba.

<sup>11</sup> Ni Yerusarennu Anutu afeheba dema emma kecba uameme 12sac andac, ge yoac imoc negengyohoc amma ngic kpesiyemmena edegegec.

<sup>12</sup> Ni Anutuac womong manau ngic goa yenigoc yoacna engemmama mi anec. Me kpekpeturang ama goau me amasobennu haifaka mema ngicngac hagec, imoc mi anai. Faka imoc mong amba mi henggec.

<sup>13</sup> Ngic yomoc yeneng haniana dema edegudae, yoac imocac fora ifingoc edzacgugecdeacsoc mi ande.

<sup>14</sup> Amma mong deficgegemba negenna: Sing gboria goango miti miti deandae, imoc modacduae. Imocac sinnu kisicfocnina yeneac Anutu eweheimima yoac sasawango dedeserinina modacde, imoc nanggeanduae. Amma profete yeni yoac deoho anggec, imoc negensingeduae.

<sup>15</sup> Amma kecma ngic mangana nga gombunga homecfunac yacyac naso wegeneude, ngic yomoc yaguc nesunggedae, yeni nga ni nenahafoc wiac

imoc fingerudeac negensinggema kecdimbe.

<sup>16</sup> Ifi amma Anutuac kicfu nga ngic kicfu kopocsicnaac negengfagunga kpac ua serima memangoc kecanduae.

<sup>17</sup> Ni kifa goa bangec hereau kecma ubangerecac wiac ngic arengfocna yemmebadeac amma Anutuac sese faibadeac Yerusareng taonnu hayai.

<sup>18</sup> Amma hosuc heiheiac segekekec nga faka kpetiac mesima womonnu emma kecbare meficnugec. Ihai ngic habutoagoc me kpeboronggoc mi hayai.

<sup>19</sup> Asia bangecfunac yudangic goa, yeni ine kpeborongtoa ifi anggec. Yeninoc kopocsicac wiac mong mekecbau dede gearu hama neac yoac dekperagibau.

<sup>20</sup> Me ngic yoc nandae, yeneac memba tutumannu nambare neac kopocsic mong meficgegec isoc deficgebisia.

<sup>21</sup> Ni yoac mocgusac botucnginau namma yofi kpacma deai, 'Homecfunac yacyac fede, yoac imoc nanggeanduae.' Imocac yaguc geac kicfu menu hama yoacfu fainudae."

<sup>22</sup> Ngictau Feriki ye kekec gboriaac siduc negendarecac yofisac edeyunuec, "Wasai garengtoa Risiango Yerusarennac mau yoacngina desibade." Ifi dema yoacngina feudeac dema sueyunuec.

<sup>23</sup> Amma ye wasaigareng yofi edema sueec, "Ngeni Pauro garenggema ngabakic mi hembisia amma tosofora naric hama heimefic ammibisia."

<sup>24</sup> Uameme goa kecma Feriki ye nga enema, yudangac kpara Drusira, yeri yerahafoc hama Pauroac deec erema Yesu Kristo negensinggegecac hania edeyuruu negenoc.

<sup>25</sup> Nегemmaec yofi edeyuruec, “Faka dindingac modachesonга nga ubasebi garenggema faka mangana wabesonга amma desidesi nasoya haude.” Ifi deu Feriki kengec kpeu Pauro yofi edema sueec, “Naric kenna, kecma naso monnu titing mong fingechnenu monggoc kpacguba habesena.”

<sup>26</sup> Ngictau ye hakecmangoc yofi negenec: Paurongo hiedzo goa nenu witicamaunac waba maude. Negeunga ifi feecac nasosoc kpacma yegoc yoac denegeng angkefec.

<sup>27</sup> Ammanu kifa yohockang wisickeu kia mong kpara Porkio Festo, yeng ngictau Ferikiac tatic meec. Anu Ferikingo yudangic ubangerec kpeyemmedacma Pauro witicamau tacmanu wama kenec.

## 25

<sup>1</sup> Festo ye Yudaia bangectoaac ngictau ua hanaheec. Hanaheu uameme harebec wisickeu Kaisarea wama Yerusarennu enec.

<sup>2</sup> Enu womong gareng enara nga yudangick-uneng yeneng yearu hama Pauroac yoac dekper-agima

<sup>3</sup> hatahemima yofi degec, “Ge neneac wosoefac amma yoac faina kenu Pauro ye Yerusarennu habeso.” Yeni sinnu sufuma namma Pauro kpe-homegecdeac negemma ifi degec.

<sup>4</sup> Edegec Festongo yofi edeyunuec, “Pauro ye Kaisarea ihai witicamau taru ni yei kapianec tacmaguc monggoc dzigenema kemebade.

<sup>5</sup> Kemeba ngeni Pauro yoacfu faidauac wiac mong metacdaeu debeso dema ngeneacunac enarameme goa yeni nigoc kemegec kopocsic

mong meficgeec isoc yeni yeac yoac imoc dedacbisia.”

<sup>6</sup> Ifi dema uameme 8 me 10 Yerusarennu kecma Kaisarea kemma kemeec. Kemema wereckengau desidesi amau emma tacma deec, “Ngeni Pauro mehagec!” deu meenggec.

<sup>7</sup> Meenggec Yerusarennac yudangic yerecgedacma yoac hania hania homac nesunggema seria dema nanggec. Amma yeni yoac imocac fora meficgegecdeac obohogec.

<sup>8</sup> Nga Paurongo yoacngina turunga meremma hania yofi deec, “Ni yudangic dedeseriyoacngina me Anutuac womong me ngictau Sisa, yeni mong mi demanganeyunuai.”

<sup>9</sup> Ifi deu Festongo yudangic ubangerec kpeyemmedarudeac Pauro kpesimiec, “Ge Yerusarennu naric emma ihai yoacga desibai me?”

<sup>10</sup> Ifi deu Paurongo yofi meremmiec, “Yoc nand-uae, imoc ngictau Sisa yeac yoac desi desiamanoc nga neac yoac yomohai desibesonga. Ni yudangic faka mangana mong mi ayemmeai, imoc geangaoc negennec.

<sup>11</sup> Ni kopocsictoa mong meficgebai dede nuhomenadeac dena sebina mi segerebai. Nga yeni ikocfu nesunggema haniana dedaeu ngic mongngo yeneac mariu naric mi fainuude, imocac amma Roma ngictau Sisa yeng yoacna desiudeac deduae.”

<sup>12</sup> Ifi deu Festongo memeficfora yenigoc dene-geng amma Pauro yofi edeec, “Ge ngictau Sisa yearu kembeso denec, imocac yearu kembesena.”

13 Uameme goa wisickemanu ngictau Agripango naina Beanikegoc Kaisarea kemema Festo yuguckeoc.

14 Amma yeri uameme goa yegoc tacyac ammaec Festongo Pauroac yoacsiduc ngictau Agripa yofi edeec, “Ferikingo ngic mong witicamau faima kendaru takecde.

15 Anu hasikema Yerusarennu emba yudangic yeneac womong gareng enara nga enarameme yeni nearu hama kpedzucnema ngic ye kpegec homeudeac edenugec.

16 Edenugec ni yoac turunga yofi merengyemeai, ‘Ngic mong hania kpacfu memeting ammi-ammi, sing imoc romangic nenearu mong mi fede. Ngic yoaragocngo ngic yoacfu faide, yeri eacma nammaec fora debesonga.

17 Ifi meremba yei eacemeing, imohaingoc wereckengau ni desi desiamau emma Pauro mehagecdeac deai.’

18 Ifi dema Pauro yoacfu faigec yeni yeac faka mangana mong deficgegecde debare yeni yenang mitinginaac sing fede, imocac hesucemegec.

19 Ngic mong kpara Yesu, yeac yofi degec, ‘Ye bic homeec.’ Anu Paurongo yofi dekperagiec, ‘Ye gbori kecde.’ Yeni ifisac degec.

20 Nga ni yoac imoc negentegecbadeac osima yofi kpesimiai, ‘Ge Yerusarennu naric emma ihai yoacga desibesonga me?’

21 Edeba Pauro ye ngictau Sisango yoara desiudeac deec. Ifi deu desiai, ‘Pauro ye witicamau tomai tacmanu kecma sing mong meficgemaguc ngictau Sisaaru faiba kenude.’ ”

<sup>22</sup> Festongo ifi dema edeu Agripango deec, “Ni neannaoc ngic yengena enacfunac yoara negembadeac anende.” Ifi deu Festongo deec, “Wereckenu naric negennade.”

<sup>23</sup> Wereckengau Agripa nga Beanike yeri sebikibi meemema tutumang amau enoc. Nga wasai garengtoa nga ama imocac ngic engena yeni yenhafoc modacyuruma enggec. Anu Festongo deu Pauro meenggec.

<sup>24</sup> Meemmagec Festongo yofi edeyunuec, “Ngictau Agripa nga ngicfocna yaguc nigoc tacdae, edengunuba negenggec: Ngic yomoc nande, yeac amma yudangic noc efeango yei nga Yerusarennu kpacnuma hatahenemma deandae, ‘Ye naric mi kecbeso.’

<sup>25</sup> Nga yengenaoc Roma ngictau Sisango yoara desiudeac deecac yearu sueba kenude. Nga neng ine ye homeudeac kopocsic mong mi meficgeai.

<sup>26</sup> Amma yoac fora hofocma ngictau Sisa yeac kibi ohoba dema obohoduae. Imocacnoc ngic yomoc ye ngenearu nga ngictau Agripa gearu faiba nanu ngeni haniaya negemma fora meficgegec kibi ohoma faiba kembeso.

<sup>27</sup> Nga ni ngic mong witicamaunac kopocsihaac kibi mi ohoma Roma taonnu eng sueba kekenggac negemba naric mi ande.”

## 26

<sup>1</sup> Agripango Pauro yofi edeec, “Geanggaoc haniaga dena negenni.” Ifi deu Pauro ye maria sinema yengena haniaya yofi edeyunuec,

<sup>2</sup> “Ngictau Agripa, yudangic yeni yoacfu fainudae, imocac turunga gearu debade.



<sup>3</sup> Geng yudangic neneac haifaka nga deendemanina fede, imoc negendacnec, imoc fora, amma negennemma tacmana yoacna debadeac ubana ngereede.

<sup>4</sup> Ni sabacfungoc amanau kekecmemena kecerema Yerusarennu kenai, imocac hania yudangic yeni negendacdae.

<sup>5</sup> Ni waracngoc farisaio singngina tongganang yeneac botucfunoc kefai. Nga haniaana hennegeng anggecngo dena imoc naric edegubau.

<sup>6</sup> Anutungo homemea megboriyunuude, yeng yoac imoc bangecfocnina bicngoc deseriyemema edeyunuec, yoac imoc fora fingerude, imoc negensinggeduaeac yaguc yoacfu nanduae.

<sup>7</sup> Israehabu 12 yeni hadzing tofocnac nasoya kpac Anutungo wiac deseriyemmeec, imoc fingecdarudeac negensinggema Anutu afehema kecdac. O ngictau Agripa, imocac hania imoc nenahafoc negensinggemaguc yudangic yeneng yoacfu fainudau.

<sup>8</sup> Amma Anutungo homemea megboriyunukecde, imoc ngeni nocac negenggec mi angana isoc angkecde.

<sup>9</sup> Amma ni Yesu Nadzaretenac, yeac kpacsiduhaac kuc sing hania haniau memabesare dema yofi anai.

<sup>10</sup> Anu womong gareng enarango uakibi nenggec mekecbare kpetiac arengfora noc efea witicamau faiyunukecma yunuhomegecdeac degec, imoc hepuc amma negengyemmeai. Imocngoc Yerusarennu anai.

<sup>11</sup> Amma ni naso homac yudangic

yeneac kpekpeturang amaya amaya kemma ubamereng kpemeting ayemmema Yesu denggbaringgegecdeac ayemmema yunukporac ayemmekefai. Amma herebu yombong ayemmeai, imoc efea kpac amma imoc yeisac mi anai, kpac. Ni bangec goaac taonnu ifingoc kemma yunukporac ayemmekefai.

<sup>12</sup> Ifi angkecba womong gareng enara yeneac dedeu uakibi mema Damaskou ua ifingoc mebadeac fainugec kenai.

<sup>13</sup> O ngictauna, ni sinnu kembare naso 12 kiroc ammanu kurumennunac kperagi mong kuneng wenacac kperagia ferahade, ifiango mama ni nga arengfocna nerarannunuec.

<sup>14</sup> Nerarannunuu neni bangecfu todingge kpededacma hebiraiyo yoacfu yoac mong yofi fingeru negenai, 'Sauro Sauro, ge nocac nukporac anemma kecannec? Ge ubaseri ifi angkecma yasu biringa enaragocfu geanggaoc kpena nendangguu kpendzeng kpenade.'\*

<sup>15</sup> Ifi negemma yofi deai, 'Kebu ge merac?' deba yofi edenuc, 'Nukporac anengkecnec, Yesu ninoc.

<sup>16</sup> Ge yacma nanna. Yaguc neac enac tofoc tofohongic annadeac fingeccenduae. Imocac wiac yaguc hennec nga ngade edzacguba hennade, imocac enacededena kecbesena.

<sup>17</sup> Ni yaguc arengfocga nga bangecareng, yeneac mariunac mesigukecbade.

---

\* **26:14:** Naso imohai yeni burumakangina yasu biringagocngo odau faiyunubesonga yasu imocngo sebingina nendangge kecgec.

18 Amma ni yenearu sueguba ge kemma ngicngac kicngina merecgena kundung ngadehema kperagiu kembisia. Amma Satanggac kuc herecgena yeni Anutuaru kembisia. Ifi amma kopocsicngina kpac anu Kebu ni negensinnuma kpetiac kekec yemmeyemnea, yeneac habuu torokpegede.'

19 Ngictauna Agripa, ni kurumennunac onga henai, imoc mi kpeai.

20 Ni hanahema Damasko kemma dzigenema Yerusareng nga Yudaia bangecac yuda ngicngac amma bangec monnunac ngicngac, yenearu kenai. Kemma yeni ubangina dzigeneu Anutuaru kpeketahema ubamerem merenggac angameme meficgegedeac edeyunukefai.

21 Ni ifi anaiac yudangic yeneng womonnu menuma nuhomebeso anggec

22 Anutungo garennukecmanu enacyoara deai amma yaguc deduae. Ni ngic engena mamea ngenahafocngoc tacmagec yomoc namma eden-gunuduae. Profete nga Mose yeneng wiac fingerudeac dema ohogec, imocngoc dekecduae.

23 Messia ye kpendzeng negengkecma homeec. Amma homemea yeneac enara mema yacma yudangic nga bangec monnunac ngicngac momoc kperagiyoara dekperagiyemmedarude. Yoac imocnoc Mose nga profete yeneng ohogec."

24 Pauro ye haniaya ifi dema edeyunuu Festongo yofi arohomiec, "Ge negen negengtoagango ubasufu meficgegende."

25 Ifi deu Paurongo yoac yofi meremmiec, "Ngictau Festo, ni ubasufu mi anduae. Ni yoac fora

tongganang deduae.

<sup>26</sup> Yoac deduae, imocac hania ngictau Agripa yeng negendeacnoc yearu efea deduae. Yoac deduae, imoc sufu sufu mi fingerec. Ngictau ge negen negeng monggac mi obohoneyec.

<sup>27</sup> Ngictau Agripa, ge profete yeneac yoac negensinggenec me? Negensinggenec, imoc negenduae.”

<sup>28</sup> Ifi deu Agripango yofi edeec, “Anengkecmana mi hereemanu Kristoac areng ambaiaac.”

<sup>29</sup> Ifi deu Paurongo deec, “Naso herea me wegena, imoc mi debade. Ge nga ngic goa yaguc yoac yomoc deba negendae, ngeni ni isoc anggecdeac numuduae. Senggoc tacduae, imocgoc anggecdeac ine mi deduae.”

<sup>30</sup> Ifi deu ngictau Agripa nga Festo amma Beanike nga goa tagec yeni yacma

<sup>31</sup> kendacma denegeng amma yofi degec, “Ngic ye homecac me witicamaac areng mong mi ande.”

<sup>32</sup> Amma Agripango Festo yofi edeec, “Ngic yomoc ye ngictau Sisango yoara desiudeac mi debac dede, ge naric yungecna kemma kecbac.”

## 27

<sup>1</sup> Anu wasaingic enara mong kpara Yurio, yeng Sisaac habu, imohacnac wasaingic 100 garengyunuec. Nga Itaria bangecfu kennideac naso wegeneu ngictaungo deu Pauro nga witicngic goa Yurio yeac mariu faiyunugec, yeng meyunuu yenahafoc kporucwageu enggec.

<sup>2</sup> Nga wage imoc Adramiteng taonnunac amma Asia bangec dumbengau modacma taong tackenec, ihai enudeac dedea, neni wage

imohainoc emma Tesaronikenac makedoniangic mong kpara Aristako, yegoc nenahafoc kening.

<sup>3</sup> Wereckengau wage Sidong taonnu emmanu Yuriongo Pauro ogo ammima negemmiu taonnu keng emma ogofora yugucyunuu heimefic am-migec.

<sup>4</sup> Nga wageu monggoc emma taong wamina firanggo kennideugeng haecac Kipiro nuc nga Asia bangec botucngirau kening.

<sup>5</sup> Kemma Kirikia nga Pamfiria bangec fer-ecgema kengkecma Mira taonnu Rikia bangecfu kensikeing.

<sup>6</sup> Kensikeni ihai Aresandria taonnunac kporucwage mong tacma Itaria bangecfu kembeso anec. Nga wasaingic enarango imoc meficgema ihai menunuu ening.

<sup>7</sup> Emma uameme goa dengec dengec kengkecma ua ebiriangoc mema Kinido taong tarecfugeng sikeing. Sikeni firanggo kpemerennunuu Kreta nucfugeng kening.

<sup>8</sup> Kengkecma nuc imocac dumbenga mong kpara Sarimone ferecema Rasaia mewegenema kondung medaha mong feec, kpara Wage bris gombunga, neni uaesa mekecmangoc ihai ening.

<sup>9</sup> Kondunnu naso herea kengkefing amma kianomang naso mewegenenunu kecma memanganenunubacac Paurongo goroyoac yofi deec,

<sup>10</sup> “Ngicwiac, yoc monggoc kennide negemba heocnenide. Wage nga finacsac kpac, ngic nenahafoc kondunnu kemebinggac.” imoc hemma negenduae.

<sup>11</sup> Ifi edeu wasaigareng yeng ine Pauroac yoac mi negensingema wagehareng nga wage mingina yereac yoac negemma tofohoec.

<sup>12</sup> Nga kondung medaha bic henggec wagengo ihai kianomangoc tatacacsoc mi anec. Ifi anu yeni imoc wama Kreta nuc imocac taong mong brisiagoc kpara Foiniki, ihai naric endacma tacmagec kianomang naso wisickeudeac homacngo degec. Ihai mura seria mi kpeande, yowarecn-gosac efea kpeande.

<sup>13</sup> Anu kondunggac firang firang gombunga kpeu wagengic yeneng degec, “Naric kennide.” dema angka kpedzigeac ereu Kreta nuc kpegegengema kening.

<sup>14</sup> Kemmina naso mi hereemanu firang kpara murango nuc ferecgema wage sebikpengau kucgoc kpeec.

<sup>15</sup> Kpema wage mefaheu firanggac kucfu wage garenggegecdeac ambibiema wagec firanggac songou kenu kening.

<sup>16</sup> Kengkecma nuc kapia mong kpara Kauda, imoc wadzahemima kemmina dinggi kondunnu kemebeso anu mi mebinggacsoc

<sup>17</sup> uaesa mekecma dinggi wage witiau kpedzima faiing.

Nga wage tohobacac imoc witicngo meserima kpefuseing. Kpefusema dzegema Siriti sangiu, ihai embinggac amma wage yomeaac kporuc kuneng kpedzigeac mau firangngo finunuu kening.

<sup>18</sup> Kenni firang kuhagoc kpema feu memanganenunubacac wereckengau finac goa kondunnu

ukugec kemeec.

<sup>19</sup> Kemeu hadzing tofocnac harebec anu wageac finac goa monggoc ukugec kemeec.

<sup>20</sup> Kemeu hadzing tofocnac homac firang yadango kpema feec. Feu neni wenac me asomeng mong mi fingeru hemma negen negennina fonggou kekecnina mi fingerudeac negening.

<sup>21</sup> Anu ngic yeni naso herea nenedoku wama kecmagec Paurongo kemma botucnginau namma yofi edeyunuec, “Ngicwiac, ngeni neac yoac negembau dede Kreta nuc mi wabing. Amma forangoc, wage mi manganeu finac naric mi ukubing.

<sup>22</sup> Nga nenang botucfunac mongngo mi kpac anudeac ubangina kuha mi mabeso. Nga wage ine kpedzameude.

<sup>23</sup> Worang tofocnac Anutunaac enac tofoc tofohoya kecduae, yeac angero mongngo nearu hama namma

<sup>24</sup> yofi edenudac, ‘Pauro, mi kengecguu, ge Roma ngictau Sisa yeac kicfu nambesena, imoc fingeCBSO. Anutungo geac nunumuac amma yofi dede, “Ngic yomoc ngeni wageu kecdae, ngenearunac mongngo mi kpac anude.” ’

<sup>25</sup> Imocac ngic yomoc ngeni ubangina ngereeu. Anutungo yoac edenuande, imoc ifi fingerude, imoc negensinggeduae.

<sup>26</sup> Anu wagengo ine nuc monnu enu wani nedzamebeso.”

<sup>27</sup> Ifi deu Adria kondunnu meang kpeang kecmina hadzing tofocnac 14 anec. Amma

tofocnac dzongiau wagengic yeni bangec mewegene

<sup>28</sup> negemma kpete ukugec kemeu mita 36 anec. Iohanec wisicke kemma kpete monggoc ukugec kemeu mita 27 anec.

<sup>29</sup> Anu hoc witiau embinggac dema kengencyunuu wage buyau angka 4 ukugec kemeu ama wereckenudeac numugec.

<sup>30</sup> Numumagec wagengic yeni wage wama worabeso negensima wage dinggia faigec kemeu ikoc amma yofi degec, “Neni wage dumbengau angka mong faini kemeude.”

<sup>31</sup> Ifi degec Paurongo wasaigareng nga ngicfora yofi edeyunuec, “Wagengic woragecdeu ngeni komoc mi kpegecde.”

<sup>32</sup> Edeyunuu wasaingic yeni dinggiac witic herecgegec kondunnu kemeec.

<sup>33</sup> Kemeu ama werec wereckenggac Paurongo ngic yeni yaka negecdeac ngombongyunuma yofi edeyunuec, “Ngeni ebicfu yaka wama kecmagec, yaguc uameme 14 ande.

<sup>34</sup> Herenginango yakaac derecgemanu yaka mi nene kecma homebauac ngombongngunuma deduae.” Ifi dema yofi deec, “Ngeni ubayohoc mi anggec nocac orucdzongina mong mi mama sufude.”

<sup>35</sup> Ifi deu yeni sasawango hemmagec kicnginau ic sogong mong mema Anutu dangge edema merecgema neec.

<sup>36</sup> Neu yeni imoc hemma ubangina ngereeu ifingoc yaka nedacgec.

<sup>37</sup> Ngic wageu kefing, neneac kpetenina 276.

<sup>38</sup> Anu yaka negec gebecyunuu wage efaiudeac



wit homac wageu feec, imoc kondunnu ukugec kemeu wage efaiee.

<sup>39</sup> Ama wereckenu bangec mi hehenaac hembibiegec. Amma kondung medaha mong hoc kpa-hac sangisac feu yeni imoc hemma wage imohai naric enudeac degec.

<sup>40</sup> Ifi degec ngic yeneng angka witicngina herecgegec kondunnu kemeu naso socfungoc wage gombunga garenggegecdeac somba yungecma kporuc kpedzigec enu firang kporucfu kpeu kondung kpendzicma kenggec.

<sup>41</sup> Kemma kondung botuhau sangi mong erema feec, ihai emma wage dumbengau hendanggeu serimanu siritembong yadango wage buyaubigeng kpedzameec.

<sup>42</sup> Wage dzameu witicamangic yeni fifia mema worabauac wasaingic yeneng yunuhomebeso degec.

<sup>43</sup> Ifi degec wasaingic garengnginango Pauro onggongeudeac negemma kpetariyemmema yofi edeyunuec, “Fifia meme ngeneng kondunnu waraima yuma kemema fifia mema tegiau enggec.

<sup>44</sup> Amma goa neneng katapa witiau nga goa wage kpedzac kpedzamea witiau kenggec.” Neni nenahafoc ifingo ifi amma tegiau endacni nen-earunac monggac sebia mi manganeeec.

## 28

<sup>1</sup> Neni kondung tegiau gombunga emma nan-ing. Nanni nuc imoc kpara Merite degec negen-ing.

<sup>2</sup> Anu nuc imocac ngicngac yeneng hoannunuma kianomang nasoac amma gerectoa yukenemmegec dzeu negening. Amma faka gombunga goa ifia homac anemmegec.

<sup>3</sup> Anu Paurongo gerec kpiriria kpedzucnema medzucke hama gerecfu faiu kemeec. Kemeu boudzoc mong gerec negemmima gereckpiriria manaunac erema Pauo mariaiu kima kpataingge nanec.

<sup>4</sup> Ifi nanu bangec imocac ngicngac yeneng imoc hemma denegeng amma degec, “Ngic imoc ye ngic kpehomeecnoc, ye kondunnu mi kemema homedac, imoc fora. Nga ye kondung tegiau yei eremanu turunga sikemiu homeude.”

<sup>5</sup> Ifi degec Paurongo boudzoc gigima kpesiu gerecfu kemeu sebiau ebic mong mi fingerec.

<sup>6</sup> Yeni imoc hemma yofi degec “Boudzoc enara imohai yadiude me ye makpema homedarude.” ifi dema tomai tacmagec sebiau ebic mong mi fingeru yeni hemma negemma degec, “Ngic ye nemu.”

<sup>7</sup> Nuc imocac ngickuneng kpara Popirio, yeac ama bangeha wegenac feu yeng ama heinemmeu uameme harebec yegoc tacyac aning.

<sup>8</sup> Ammina Popirio mamango amau sebigerec hafei amma kerac ukuuku ammiu feec. Feu Paurongo ameau emma maria sebiau faima numuma ngic mengereec.

<sup>9</sup> Mengereu ngereeu nuc imocac ngicngac siduc imoc negemma hafeigoc homac yeneng ifingoc sikedagec mengereyunudarec.

<sup>10</sup> Mengereyunuu ngicngac yeni ubangerectoa negennemmema kekennaso wegeneu singgac

neneyaka nga hieffinacgoc kennideac sirihau wageu fainemmegec.

<sup>11</sup> Kporucwage mong kianomang nasoac ihai nangkefec. Nga afo harebec wisickeu neni wage imohai emma kening. Wage imoc Aresandria taonnunac nga dumbengau nemuonga mong nanec, kpara Kasotoro nga Porukisi. Kasotoro nga Porukisi yeri foratombosonga.

<sup>12</sup> Kengkecma Siraku taonnu kensikema emma ihai uameme harebec tacma

<sup>13</sup> taong imoc wama Regiong taonnu kemma taring. Imohai tacni wereckengau ngadeninausing yowarec kpeu uameme mong wisickeu Puteori taonnu kening.

<sup>14</sup> Kensikema negen negensinggoc tosofocnina goa meficyununi heitainunugec uameme 7 yenigoc tacyac amma imohacnac hanising kengkecma Roma kening.

<sup>15</sup> Kensikeni Roma taonnu Yesuac habungo siducnina bic negenggecac goango hakecma Apio yeneac emenecfu meficnunugec. Nga goango ama mong kpara Kiang ama harebec, imohai meficnunugec. Meficnunugec Paurongo yenemma Anutu dangge edema ubangerec negemma kuc meficgeec.

<sup>16</sup> Roma taonnu siken i Pauro witicamau mi faima ama monnu tarudeac deu yeni naric degec. Ye imohai tacma worabacac wasaingic mongngo ye garenggema kefec.

<sup>17</sup> Ye ifi tacmanu uameme harebec anu yudangic yeneac garengfocngina kpacyunuu sikema yenahafoc tacgec yoc yofi edeyunuec, "Tosofocna, ni yudangic arengfocnina mi

memayunuai me kisicfocnina yeneac singyoac nga fakangina deendema mi anai, imoc fora. Anu yeni Yerusarennu mendannuma romangic yeneac mariu eng fainugec.

<sup>18</sup> Fainugec romangic yeneng haniana dekpesi amma hania kpacfu nuhomegecdeac dema kopocsicna hofocma yungecnugecdeac degec.

<sup>19</sup> Ifi degec yudangic yeneng yoac imocac igocnuma kpetarigecac ngictau Sisango yoacna de-siudeac deai. Yudangic yeneac yoac mong yei mehama deba dema mi hayai.

<sup>20</sup> Ni imocacnoc negemma ngenigoc denegeng annideac kpacngunuba sikedau. Israengicngac nenang Anutu dedeseriyaac fora fingerudeac negensinggema kecdimbeac amma seng yomoc marinau witicnugec kecduae.”

<sup>21</sup> Ifi deu degec, “Yudaia bangecfunac geac yoackibi mong mi faigec hau hening. Me ngic mong suegec hama geac kopocsic yoac mong mi deu negening.

<sup>22</sup> Imocac wiac negennec, imoc geanggaoc dena negenni naric ande. Ge mitiareng denec, imoc bangecsoc deendema anggec negendimbe.”

<sup>23</sup> Ifi dema tutumanggac naso mong degec naso imoc hau yudangic kpetengina homacngo Pauroac amau kpeturanggegec. Kpeturanggemagec, yeng Anutuac eucererenggac hania edeyunuec. Amma ye Moseac dedeseriyoac nga profete yeneac yoac, imoc osoma yenang negen negengngina wama Yesu negensinggegecdeac deireckeyemmeudeac ua meec. Ye asoacngoc hanahema ifi dema kecmanu ama toforeyemmeec.

24 Amma ngic goa yeneng imoc ireckema yegoc uba mocgu anggec nga goa yeni mi negens-inggegec.

25 Amma yudangic yeni yenaocngoc yoacngina feracemeu Paurongo yoac mocgu yofi edeyunuec, “Tiri Asungo profete Yesaiaac enacfu kisicfocngina yeneac yoac yofi deec,

26 ‘Ge kemma ngichabu yofi edeyununa: Ngicngac kedzacngo negen negeng, yeni imoc negemma naric mi negentegecgecde. Amma kicngo heheng yeni imoc hemma naric mi hentegecgecde.

27 Imoc yofiac, ngicngacareng yomoc yeni herengina tondzera nga kedzacnginango yoac negenggecdeac ebiridae amma kicnginango wiac henggecdeac mepisickegec. Yeni kicnginango wiac mong hembauac nga kedzacnginango negembauac amma negen negengnginango wiac mong negentegecbauac, imoc yeni ubangina dafiu dzigeneu mengereyunubade.’ *(Yesaia 6:9-10)*

Ngeni yeni isocngoc.

28 Imocac edengunuba negenggec, Anutungo memengerec sing meficgeec, imoc bangec monnunac ngicngac, yeneac arennoc ande, yeneng yoacna negemma komoc kpegecde.” Paurongo ifi deu negemma wama kenggec.

29 [Kemma sinnu yudangic yenaocngoc yoacngina feracemeu kenggec.]

30 Pauro yengenaoc ama kuric bummema kifa yohockang ihai kecmanu ngicngac yearu kengha anggec, yeni ama heiyemmekefec.

<sup>31</sup> Heiyemmema kengeha kpac yombong kecma Anutuac eucerereng dekperagiyemmeec. Ye Kebu Yesu Kristoac hania kpouyemmekefu ngic mongngo mi kpetarimiec.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

19b7c48c-f4ce-5007-838d-58f01dc01ecc